

遂生擒阿波。上書請其死生之命。隋主下其議。樂安公元諧請就彼梟首。武陽公李充請生取入朝。顯戮以示百姓。隋主謂長孫晟於卿何如。晟對曰。若突厥背誕。須齊之以刑。今其昆弟自相夷滅。阿波之惡。非負國家。因其困窮。取而為戮。恐非招遠之道。不如兩存之。左僕射高穎曰。骨肉相殘。教之蠹也。宜存養以示寬大。隋主從之。○甲戌。隋遣兼散騎常侍楊同等來聘。○五月乙亥朔。日有食之。○秋七月己丑。隋衛昭王爽卒。○八月。隋主徵梁主入朝。梁主帥其羣臣二百餘人。發江陵。庚申。至長安。隋主以梁主在外。遣武鄉公崔弘度將兵戍江陵。軍至都州。梁主叔父太傅安平王巖弟荆州刺史義興王瓚等。恐弘度襲之。乙丑。遣其都官尙書沈君公詣荆州刺史宜黃侯慧紀請降。九月庚寅。慧紀引兵至江陵城下。辛卯。巖等驅文武男女十萬口來奔。隋主聞之。廢梁國。遣尙書左僕射高穎。安集遺民。梁中宗世宗。各給守冢十戶。拜梁主琮柱國。賜爵莒公。○甲午。大赦。○冬十月庚申。隋主如同州。癸亥。如蒲州。○十一月丙子。以蕭巖為開府儀同三司。東揚州刺史蕭瓚為吳州刺史。○丁亥。以豫章王叔英兼司徒。○甲午。隋主如馮翊。親祠故社。戊戌。還長安。是行也。內史令李德林。以疾不從。隋主自同州敕書追之。與議伐陳之計。及還。帝馬上舉鞭南指曰。待平陳之日。以七寶裝嚴公。使自山以東。無及公者。○初。隋主受禪以來。與陳鄰好甚篤。每獲陳諜。皆給衣馬。禮遣之。而高宗猶不禁。侵掠。故太建之末。隋師入寇。會高宗殂。隋主即命班師。遣使赴弔。書稱姓名頓首。帝答之益驕。書末云。想彼統內。如宜。此宇宙清泰。隋主不悅。以示朝臣。上柱國楊素。以為主辱臣死。再拜請罪。隋主問取陳之策於高穎。對曰。江北地寒。田收差晚。江南水田早熟。量彼收穫之際。徵徵士馬。聲言掩襲。彼必屯兵守禦。足得廢其農時。彼既聚兵。我便解甲。再三若此。彼以為常。後更集兵。彼必不信。猶豫之頃。我乃濟師。登陸而戰。兵氣益倍。又江南土薄。舍多茅竹。所有儲積。皆非地窖。若密遣行人。因風縱火。待彼修立。復更燒之。不出數年。

自可財力俱盡。隋主用其策。陳人始困。於是楊素。賀若弼。及光州刺史高勸。魏州刺史崔仲方等。爭獻平江南之策。仲方上書曰。今唯須武昌以下。斬和除方。吳海等州。更帖精兵。密營度計。益信襄荊。基郢等州。速造舟楫。多張形勢。為水戰之具。蜀漢二江。是其上流。水路衝要。必爭之所。賊雖於流頭。荆門。延洲。公安。巴陵。隱磯。夏首。蘄口。溢城。置船。然終聚漢口。峽口。以水戰大決。若賊必以上流有軍。令精兵赴援者。下流諸將。即須擇便橫度。如擁衆自衛。上江諸軍。鼓行以前。彼雖恃九江五湖之險。非德無以為固。徒有三吳百越之兵。非恩不能自立矣。隋主以仲方為基州刺史。及受蕭巖等降。隋主益忿。謂高穎曰。我為民父母。豈可限一衣帶水。不拯之乎。命大作戰船。人請密之。隋主曰。吾將顯行天誅。何密之有。使投其梯於江曰。若彼懼而能改。吾復何求。楊素在永安。造大艦名曰五牙。上起樓五層。高百餘尺。左右前後。置六拍竿。竝高五十尺。容戰士八百人。次曰黃龍。置兵百人。自餘。平乘。柁。各有一等。差晉州刺史皇甫績將之。官稽首言陳有三可滅。帝問其狀。曰。大吞小。一也。以有道伐無道。二也。納叛臣蕭巖於我有詞。三也。陛下若命將出師。臣願展絲髮之效。隋主勞而遣之。時江南妖異特衆。臨平湖草久塞。忽然自開。帝惡之。乃自賣於佛寺為奴。以厭之。又於建康造大皇寺。起七級浮圖。未畢。火從中起而焚之。吳興章華。好學。善屬文。朝臣以華素無伐閱。競排詆之。除太市令。華鬱鬱不得志。上書極諫。略曰。昔高祖南平百越。北誅逆虜。世祖東定吳會。西破王琳。高宗克復淮南。辟地千里。三祖之功。勤亦至矣。陛下即位。于今五年。不思先帝之艱難。不知天命之可畏。溺於嬖寵。惑於酒色。祠七廟而不出。拜三妃而臨軒。老臣宿將。棄之草莽。諂佞讒邪。升之朝廷。今疆場日蹙。隋軍壓境。陛下如不改弦易轍。臣見麋鹿復遊於姑蘇矣。帝大怒。即日斬之。

二年春正月辛巳。立皇子恮為東陽王。恬為錢塘王。○遣散騎常侍袁雅等聘于隋。又遣散

騎常侍九江周羅暎將兵屯峽口。侵隋峽州。三月甲戌。隋遣兼散騎常侍程尙賢等來聘。戊寅。隋主下詔曰。陳叔寶據手掌之地。恣溪壑之欲。劫奪閭閻。資產俱竭。驅逼內外。勞役弗已。窮奢極侈。俾晝作夜。斬直言之客。滅無罪之家。欺天造惡。祭鬼求恩。盛粉黛而執干戈。曳羅綺而呼警蹕。自古昏亂。罕或能比。君子潛逃。小人得志。天災地孽。物怪人妖。衣冠鉗口。道路以目。重以背德。違言搖蕩。疆場晝伏夜遊。鼠竊狗盜。天之所覆。無非朕臣。每關聽覽。有懷傷惻。可出師授律。應機誅殄。在斯一舉。永清吳越。又送璽書。暴帝二十惡。仍散寫詔書三十萬紙。遍諭江外。○太子胤。性聰敏。好文學。然頗有過失。詹事袁憲切諫。不聽。時沈后無寵。而近侍左右。數於東宮往來。太子亦數使人至后所。帝疑其怨望。甚惡之。張孔二貴妃。日夜構成。后及太子之短。孔範之徒。又於外助之。帝欲立張貴妃子始安王深爲嗣。嘗從容言之。吏部尙書蔡徵。順旨稱贊。袁憲厲色折之曰。皇太子。國家儲副。億兆宅心。卿是何人。輕言廢立。帝卒從徵議。夏六月。庚子。廢太子胤爲吳興王。立揚州刺史始安王深爲太子。徵。景歷之子也。深亦聰惠。有志操。容止儼然。雖左右近侍。未嘗見其喜愠。帝聞袁憲嘗諫胤。卽用憲爲尙書僕射。帝遇沈后素薄。張貴妃專後宮之政。后澹然。未嘗有所忌怨。身居儉約。衣服無錦繡之飾。唯尋閱經史。及釋典爲事。數上書諫爭。帝欲廢之。而立張貴妃。會國亡不果。○冬十月。己亥。立皇子蕃爲吳郡王。○己未。隋置淮南行省於壽春。以晉王廣爲尙書令。帝遣兼散騎常侍王琬。兼通直散騎常侍許善心。聘于隋。隋人留於客館。琬等屢請還。不聽。甲子。隋以出師有事於太廟。命晉王廣。秦王俊。清河公楊素。皆爲行軍元帥。廣出六合。俊出襄陽。素出永安。荊州刺史劉仁恩。出江陵。蕪州刺史王世積。出蕪春。廬州總管韓擒虎。出廬江。吳州總管賀若弼。出廣陵。青州總管弘農燕榮。出東海。凡總管九十。兵五十一萬八千。皆受晉王節度。東接滄海。西距巴蜀。旌旗舟楫。橫亘數千里。以左僕射高穎爲晉王元帥。長史。右僕射王韶爲

司馬。軍中事。皆取決焉。區處支度。無所凝滯。十一月。丁卯。隋主親餞將士。乙亥。至定城。陳師誓衆。○丙子。立皇帝叔榮爲新昌王。叔匡爲太原王。○隋主如河東。十二月。庚子。還長安。○突厥莫何可汗。西擊鄰國。中流矢而卒。國人立雍虞閭。號頡伽施多那都藍可汗。○隋軍臨江。高穎謂行臺吏部郎中薛道衡曰。今茲大舉。江東必可克乎。道衡曰。克之。嘗聞郭璞有言。江東分王三百年。復興中國。合今此數將周。一也。主上恭儉勤勞。叔寶荒淫驕侈。二也。國之安危。在所委任。彼以江總爲相。唯事詩酒。拔小人施文慶。委以政事。蕭摩訶。任蠻奴。爲大將。皆一夫之用耳。三也。我有道而大。彼無德而小。量其甲士。不過十萬。西自巫峽。東至滄海。分之。則勢懸而力弱。聚之。則守此而失彼。四也。席卷之勢。事在不疑。穎忻然曰。得君言。成敗之理。令人豁然。本以才學相期。不意籌略乃爾。秦王俊。督諸軍屯漢口。爲上流節度。詔以散騎常侍周羅暎。都督巴峽。緣江諸軍事。以拒之。楊素引舟師。下三峽。軍至流頭灘。將軍戚昕。以青龍百餘艘。守狼尾灘。地勢險峭。隋人患之。素曰。勝負大計。在此一舉。若晝日下船。彼見我虛實。灘流迅激。制不由人。則吾失其便。不如以夜掩之。素親帥黃龍數千艘。銜枚而下。遣開府儀同三司王長襲。引步卒。自南岸擊昕。別柵。大將軍劉仁恩。帥甲騎。自北岸趣白沙。遲明而至。擊之。昕敗走。悉俘其衆。勞而遣之。秋。毫不犯。素帥水軍東下。舟艦被江。旌甲曜日。素坐平乘大船。容貌雄偉。陳人望之。皆懼曰。清河公。卽江神也。江濱鎮戍。聞隋軍將至。相繼奏聞。施文慶。沈客卿。竝抑而不言。初。上以蕭巖。蕭瓚。梁之宗室。擁衆來奔。心忌之。故遠散其衆。以巖爲東揚州刺史。瓚爲吳州刺史。使領軍任忠。出守吳興郡。以襟帶二州。使南平王巖。鎮江州。永嘉王彥。鎮南徐州。尋召二王。赴明年元會。命緣江諸防船艦。悉從二王還都。爲威勢。以示梁人之來者。由是江中。無一鬪船。上流諸州兵。皆阻楊素軍。不得至。湘州刺史。晉熙王叔文。在職既久。大得人和。上以其據有上流。陰忌之。自度素與羣臣少恩。恐不爲用。無可任者。

乃擢施文慶爲都督湘州刺史。配以精兵二千。欲令西上。仍徵叔文還朝。文慶深喜其事。然懼出外之後。執事者持己短長。因進其黨沈客卿。以自代。未發間。二人共掌機密。護軍將軍樊毅言於僕射袁憲曰。京口采石。俱是要地。各須銳兵五千。并出金翅二百。緣江上下。以爲防備。憲及驃騎將軍蕭摩訶。皆以爲然。乃與文武羣臣共議。請如毅策。施文慶恐無兵從己。廢其述職。而客卿又利文慶之任。己得專權。俱言於朝。必有論議。不假面陳。俱作文啓。卽爲通奏。憲等以爲然。二人齎啓入白帝曰。此是常事。邊城將帥。足以當之。若出人船。必恐驚擾。及隋軍臨江。間諜驟至。憲等殷勤奏請。至于再三。文慶曰。元會將逼。南郊之日。太子多從。今若出兵。事便廢闕。帝曰。今且出兵。若北邊無事。因以水軍從郊。何爲不可。又曰。如此。則聲聞鄰境。便謂國弱。後又以貨動江總。總內爲之遊說。帝重違其意。而迫羣官之請。乃令付外詳議。總又抑憲等。由是議久不決。帝從容謂侍臣曰。王氣在此。齊兵三來。周師再來。無不摧敗。彼何爲者邪。都官尙書孔範曰。長江天塹。古以爲限。隔南北。今日虜軍。豈能飛度邪。邊將欲作功勞。妄言事急。臣每患官卑。虜若度江。臣定作太尉公矣。或妄言。北軍馬死。範曰。此是我馬。何爲而死。帝笑以爲然。故不爲深備。奏伎縱酒。賦詩不輟。○是歲。吐谷渾裨王拓跋木彌。請以千餘家降隋。隋主曰。普天之下。皆是朕臣。朕之撫育。俱存仁孝。渾賊悖狂。妻子懷怖。竝思歸化。自救危亡。然叛夫背父。不可收納。又其本意。正自避死。今若違拒。又復不仁。若更有音信。但宜慰撫。任其自拔。不須出兵應接。其妹夫及甥欲來。亦任其意。不勞勸誘也。○河南王移茲哀卒。隋主令其弟樹歸襲統其衆。

資治通鑑卷第一百七十六

資治通鑑卷第一百七十七

隋紀一

高祖文皇帝上之上

開皇九年春正月乙丑朔。陳主朝會羣臣。大霧四塞。入人鼻皆辛酸。陳主昏睡。至晡時乃寤。是日。賀若弼自廣陵引兵濟江。先是。弼以老馬多買陳船。而匿之。買弊船五六十艘。置於濱內。陳人覘之。以爲內國無船。弼又請緣江防人。每交代之際。必集廣陵。於是大列旗幟。營幕被野。陳人以爲隋兵大至。急發兵爲備。既知防人交代。其衆復散。後以爲常。不復設備。又使兵緣江時獵。人馬喧譟。故弼之濟江。陳人不覺。韓擒虎將五百人。自橫江宵濟采石。守者皆醉。遂克之。晉王廣帥大軍屯六合。鎮桃葉山。丙寅。采石戍主徐子建馳啓告變。丁卯。召公卿入議。軍旅戊辰。陳主下詔曰。犬羊陵縱。侵竊郊畿。蜂蠆有毒。宜時掃定。朕當親御六師。廓清八表。內外竝可戒嚴。以驃騎將軍蕭摩訶護軍將軍樊毅中領軍魯廣達竝爲都督。司空司馬消難。湘州刺史施文慶竝爲大監軍。遣南豫州刺史樊猛帥舟師出白下。散騎常侍臯文奏。將兵鎮南豫州。重立賞格。僧尼道士。盡令執役。庚午。賀若弼攻拔京口。執南徐州刺史黃恪。弼軍令嚴肅。秋毫不犯。有軍士於民間酤酒者。弼立斬之。所俘獲六千餘人。弼皆釋之。給糧勞遣。付以敕書。令分道宣諭。於是所至風靡。樊猛在建康。其子巡攝行南豫州事。辛未。韓擒虎進攻姑孰。半日拔之。執巡及其家口。臯文奏敗還。江南父老。素聞擒虎威信。來謁軍門者。晝夜不絕。魯廣達之子世真。在新蔡。與其弟世雄。及所部降於擒虎。遣使致書。招廣達。廣

達時屯建康。自劾詣廷尉請罪。陳主慰勞之，加賜黃金，遣還營。樊猛與左衛將軍蔣元遜將青龍八十艘於白下遊奕，以禦六合兵。陳主以猛妻子在隋軍，懼有異志，欲使鎮東大將軍任忠代之。令蕭摩訶徐諭猛，猛不悅。陳主重傷其意而止。於是賀若弼自北道，韓擒虎自南道，竝進。緣江諸戍，望風盡走。弼分兵斷曲阿之衝而入。陳主命司徒豫章王叔英屯朝堂，蕭摩訶屯樂遊苑，樊毅屯耆閤寺，魯廣達屯白土岡，忠武將軍孔範屯寶田寺。己卯，任忠自吳興入赴，仍屯朱雀門。辛巳，賀若弼進據鍾山，頓白土岡之東。晉王廣遣總管杜彥與韓擒虎合軍步騎二萬屯于新林，斬州總管王世積。以舟師出九江，破陳將紀瑛於蘄口。陳人大駭。降者相繼。晉王廣上狀，帝大悅，宴賜羣臣。時建康甲士尚十餘萬人，陳主素怯懦，不達軍士。唯日夜啼泣，臺內處分，一以委施文慶。文慶既知諸將疾己，恐其有功，乃奏曰：「此輩怏怏，素不伏官，迫此事機，那可專信。由是諸將凡有啓請，率皆不行。賀若弼之攻京口也，蕭摩訶請將兵逆戰，陳主不許，及弼至鍾山，摩訶又曰：『弼懸軍深入，壘塹未堅，出兵掩襲，可以必克。』又不許。陳主召摩訶任忠於內殿，議軍事，忠曰：『兵法客貴速戰，主貴持重。今國家足兵足食，宜固守臺城，緣淮立柵，北軍雖來，勿與交戰。分兵斷江路，無令彼信得通。』給臣精兵一萬，金翅三百艘，下江徑掩六合，彼大軍必謂其度江將士已被俘獲，自然挫氣，淮南士人與臣舊相知悉，今聞臣往，必皆景從。臣復揚聲欲往徐州，斷彼歸路，則諸軍不擊自去。待春水既漲，上江周羅睺等衆軍必沿流赴援，此良策也。陳主不能從。明日，欬然曰：『兵久不決，令人腹煩，可呼蕭郎，一出擊之。』任忠叩頭苦請，勿戰。孔範又奏請作一決，當爲官勒石燕然。陳主從之。謂摩訶曰：『公可爲我一決。』摩訶曰：『從來行陳爲國爲身，今日之事，兼爲妻子。』陳主多出金帛，賦諸軍以充賞。甲申，使魯廣達陳於白土岡，居諸軍之南。任忠次之，樊毅孔範又次之。蕭摩訶軍最在北。諸軍南北互二十里，首尾進退，不相知。賀若弼將輕騎登山，望見衆軍，因馳下與

所部七總管楊牙、員明等甲士凡八千，勸陳以待之。陳主通於蕭摩訶之妻，故摩訶初無戰意。唯魯廣達以其徒力戰，與弼相當。隋師退走者數四，弼麾下死者二百七十三人。弼縱烟以自隱，窘而復振。陳兵得人頭，皆走獻。陳主求賞，弼知其驕惰，更引兵趣孔範，範兵暫交即走。陳諸軍顧之，騎卒亂潰，不可復止。死者五千人。員明擒蕭摩訶，送於弼，弼命牽斬之。摩訶顏色自若。弼乃釋而禮之。任忠馳入臺，見陳主言敗狀曰：『官好住，臣無所用力矣。』陳主與之金兩廩，使募人出戰。忠曰：『陛下唯當具舟楫，就上流衆軍，臣以死奉衛。』陳主信之，敕忠出部分。令宮人裝束以待之。怪其久不至，時韓擒虎自新林進軍，忠已帥數騎迎降於石子岡。領軍蔡徵守朱雀航，聞擒虎將至，衆懼而潰。忠引擒虎軍直入朱雀門，陳人欲戰，忠揮之曰：『老夫尙降，諸軍何事？』衆皆散走。於是城內文武百司皆遁。唯尙書僕射袁憲在殿中，尙書令江總等數人居省中。陳主謂袁憲曰：『我從來接遇卿，不勝餘人。今日但以追愧，非唯朕無德，亦是江東衣冠道盡。』陳主遣使將避匿。憲正色曰：『北兵之入，必無所犯。大事如此，陛下下去欲安之。』臣願陛下正衣冠，御正殿，依梁武帝見侯景故事。陳主不從。下榻馳去。曰：『鋒刃之下，未可交當。』吾自有計。從宮人十餘，出後堂景陽殿，將自投于井。憲苦諫，不從。後閣舍人夏侯公韻以身蔽井。陳主與爭，久之乃得入。既而軍人窺井，呼之不應，欲下石。乃聞叫聲，以繩引之，驚其太重，及出，乃與張貴妃、孔貴嬪同東而上。沈后居處如常。太子深年十五，閉閣而坐。舍人孔伯魚侍側。軍士叩閣而入，深安坐勞之曰：『戎旅在塗，不至勞也。』軍士咸致敬焉。時陳人宗室王侯在建康者百餘人，陳主恐其爲變，皆召入，令屯朝堂，使豫章王叔英總督之。又陰爲之備。及臺城失守，相帥出降。賀若弼乘勝至樂遊苑，魯廣達猶督餘兵苦戰不息。所殺獲數百人。會日暮，乃解甲，面臺再拜慟哭。謂衆曰：『我身不能救國，負辜深矣。士卒皆流涕歔歔，遂就擒。諸門衛皆走。弼夜燒北掖門入，聞韓擒虎已得陳叔寶，呼視之。叔寶惶懼，流汗股栗，向

弼再拜。弼謂之曰：小國之君，當大國之卿，拜乃禮也。入朝不失作歸命侯，無勞恐懼，既而恥功在韓擒虎後，與擒虎相詢，挺刃而出，欲令蔡徵爲叔寶作降箋，命乘騾車歸。已事不果，弼置叔寶於德教殿，以兵衛守。高頴先入建康，頴子德弘爲晉王，廣記室，廣使德弘馳詣頴所，令留張麗華。頴曰：昔太公蒙面以斬妲己，今豈可留麗華？乃斬之於青溪。德弘還報，廣變色曰：昔人云：無德不報，我必有以報高公矣。由是恨頴。丙戌，晉王廣入建康，以施文慶受委，不忠，曲爲諂佞，以蔽耳目。沈客卿重賦厚斂，以悅其上。與大市令陽慧朗、刑法監徐析、尚書都令史暨慧，皆爲民害，斬於石頭下。以謝三吳，使高頴與元帥府記室裴矩收圖籍，封府庫，資財一無所取。天下皆稱廣以爲賢。矩讓之弟子也。廣以賀若弼先期決戰，違軍令，收以屬吏。上驛召之，詔廣曰：平定江表，弼與韓擒虎之力也。賜物萬段，又賜弼與擒虎詔，美其功。開府儀同三司王頴，僧辯之子，夜發陳高祖陵，焚骨取灰，投水而飲之。既而自縛，歸臺於晉王廣。廣以聞，上命赦之。詔陳高祖世祖高宗陵，總給五戶分守之。上遣使以陳亡告許善心，善心衰服號哭於西階之下，藉草東向坐三日，赦書唁焉。明日有詔，就館拜通直散騎常侍，賜衣一襲，善心哭盡哀，入房改服，復出北面立，垂泣再拜受詔。明日乃朝，伏泣於殿下，悲不能興。上顧左右曰：我平陳國，唯獲此人，既能懷其舊君，即我之誠臣也。敕以本官直門下省。陳水軍都督周羅暎與郢州刺史荀法尚守江夏，秦王俊督三十總管，水陸十餘萬屯漢口，不得進，相持踰月。陳荊州刺史陳慧紀遣南康內史呂忠肅屯岐亭，據巫峽，於北岸鑿巖，綴鐵鎖三條橫截上流，以遏隋船。忠肅竭其私財以充軍用。楊素劉仁恩奮兵擊之，四十餘戰，忠肅守險力爭，隋兵死者五千餘人。陳人盡取其鼻，以求功賞。既而隋師屢捷，獲陳之士卒三縱之。忠肅棄柵而遁，素徐去其鎖，忠肅復據荆門之延洲，素遣巴蠻千人乘五牙四艘以拍竿碎其十餘艦，遂大破之。俘甲士二千餘人，忠肅僅以身免。陳信州刺史顧覺屯安蜀城，棄

城走。陳慧紀屯公安，悉燒其儲蓄，引兵東下。於是巴陵以東無復城守者。陳慧紀帥將士三萬人，樓船千餘艘，沿江而下，欲入援建康，爲秦王俊所拒，不得前。是時陳晉熙王叔文罷湘洲，還至巴州，慧紀推叔文爲盟主，而叔文已帥巴州刺史畢寶等致書請降於俊。俊遣使迎勞之，會建康。晉王廣命陳叔寶手書招上江諸將，使樊毅詣周羅暎，陳慧紀子正業詣慧紀，諭指時諸城皆解甲。羅暎乃與諸將大臨三日，放兵散，然後詣俊降。陳慧紀亦降。上江皆平。楊素下至漢口，與俊會。王世積在蕪口，聞陳已亡，告諭江南諸郡。於是江州司馬黃偁棄城走。豫章諸郡太守皆詣世積降。癸巳，詔遣使者巡撫陳州郡。二月乙未，廢淮南行臺省。○蘇威奏請五百家置鄉正，使治民間辭訟。李德林以爲本廢鄉官判事，爲其里閭親識，割斷不平。今令鄉正專治五百家，恐爲害更甚。且要荒小縣，有不至五百家者，豈可使兩縣共管一鄉？帝不聽。丙申，制五百家爲鄉，置鄉正一人，百家爲里，置里長一人。○陳吳州刺史蕭瓚能得物情，陳亡，吳人推瓚爲主。右衛大將軍武川宇文述帥行軍總管元契、張默言等討之。落叢公燕榮以舟師自東海至，陳永新侯陳君範自晉陵奔瓚，并軍拒述。述軍且至，瓚立柵於晉陵城東，留兵拒述。遣其將王褒守吳州，自義興入太湖，欲掩述後。述進破其柵，迴兵擊瓚，大破之。又遣兵別道襲吳州，王褒衣道士服棄城走。瓚以餘衆保包山，燕榮擊破之。瓚將左右數人匿民家，爲人所執，述進至奉公埭，陳東揚州刺史蕭巖以會稽降，與瓚皆送長安，斬之。楊素之下荆門也，遣別將龐暉將兵略地，南至湘州，城中將士莫有固志。刺史岳陽王叔慎年十八，置酒會文武僚史，酒酣，叔慎歎曰：君臣之義盡於此乎？長史謝基伏而流涕，湘州助防遂與侯正理在坐，乃起曰：主辱臣死，諸君獨非陳國之臣乎？今天下有難，實致命之秋也。縱其無成，猶見臣節。青門之外，有死不能，今日之機，不可猶豫。後應者斬。衆咸許諾，乃刑牲結盟，仍遣人詐奉降書於龐暉，暉信之。尅期入城，叔慎伏甲待之，暉至，執之以徇，并其

衆皆斬之。叔慎坐于射堂，招合士衆，數日之中，得五千人。衡陽太守樊通、武州刺史鄔居業，皆請舉兵助之。隋所除湘州刺史薛胄，將兵適至，與行軍總管劉仁恩共擊之。叔慎遣其將陳正理與樊通拒戰，兵敗，胄乘勝入城，禽叔慎。仁恩破鄔居業於橫橋，亦擒之。俱送秦王俊，斬於漢口。○嶺南未有所附，數郡共奉高涼郡太夫人洗氏爲主，號聖母，保境拒守。詔遣柱國韋洸等安撫嶺外。陳豫章太守徐璿據南康拒之。洸等不得進。晉王廣遣陳叔寶遣夫人書諭以國亡使之歸隋。夫人集首領數千人，盡日慟哭。遣其孫馮魂帥衆迎洸，洸擊斬徐璿。入至廣州，說嶺南諸州皆定。表馮魂爲儀同三司，冊洸氏爲宋康郡夫人。洸，洸之子也。衡州司馬任瓌勸都督王勇據嶺南，求陳氏子孫立以爲帝，勇不能用。以所部來降。瓌棄官去。瓌，忠之弟子也。於是陳國皆平。得州三十，郡一百，縣四百。詔建康城邑宮室，竝平蕩耕墾。更於石頭置蔣州，晉王廣班師，留王韶鎮石頭，委以後事。三月己巳，陳叔寶與其王公百司發建康詣長安，大小在路五百里，纍纍不絕。帝命權分長安土民宅以俟之。內外修整，遣使迎勞。陳人至者如歸。夏四月己亥，帝幸驪山，親勞旋師。乙巳，諸軍凱入，獻俘于太廟。陳叔寶及諸王侯將相并乘輿服御，天文圖籍等，以次行列。仍以鐵騎圍之。從晉王廣、秦王俊入列于殿庭，拜廣爲太尉，賜輅車乘馬，袞冕之服。玄圭白璧，丙午，帝坐廣陽門觀，引陳叔寶於前。及太子諸王二十八人，司空司馬消難以下，至尙書郎，凡二百餘人。帝使納言宣詔勞之。次使內史令宣詔責以君臣不能相輔，乃至滅亡。叔寶及其羣臣竝愧懼，伏地屏息，不能對。既而宥之。初，武元帝迎司馬消難與消難結爲兄弟，情好甚篤。帝每以叔父禮事之。及平陳，消難至，特免死，配爲樂戶。二旬而免，猶以舊恩引見。尋卒於家。庚戌，帝御廣陽門宴將士，自門外夾道列布帛之積，達于南郭。班賜各有差，凡用三百餘萬段。故陳之境內，給復十年。餘州免其租賦。樂安公元諧進曰：陛下威德遠被，臣前請以突厥可汗爲候正。陳叔寶爲令史，今可

用臣言矣。帝曰：朕平陳國，本以除逆，非欲誇誕。公之所奏，殊非朕心。突厥不知山川，何能警候。叔寶昏醉，寧堪驅使，諧默然而退。辛酉，進楊素爵爲越公。以其子玄感爲儀同三司。玄獎爲清河郡公，賜物萬段，粟萬石。命賀若弼登御坐，賜物八千段。加位上柱國。進爵宋公。仍各加賜金寶。及陳叔寶妹爲妾，賀若弼韓擒虎爭功於帝前。弼曰：臣在蔣山死戰，破其銳卒，擒其驍將，震揚威武，遂平陳國。韓擒虎略不交陳，豈臣之比。擒虎曰：本奉明旨，令臣與弼同時合勢，以取僞都。弼乃敢先期，逢賊遂戰，致令將士傷死甚多。臣以輕騎五百，兵不血刃，直取金陵，降任蠻奴，執陳叔寶，據其府庫，傾其巢穴。弼至夕，方扣北掖門。臣啓關而納之。斯乃救罪不暇，安得與臣相比。帝曰：二將俱爲上勳，於是進擒虎位上柱國，賜物八千段。有司劾擒虎放縱士卒，淫汙陳宮，坐此不加爵邑。加高穎上柱國，進爵齊公，賜物九千段。帝勞之曰：公伐陳後，人言公反，朕已斬之。君臣道合，非青蠅所能間也。帝從容命穎與賀若弼論平陳事。穎曰：賀若弼先獻十策，後於蔣山苦戰破賊。臣文吏耳，焉敢與大將論功。帝大笑，嘉其有讓。帝之伐陳也，使高穎問方略於上儀同三司李德林。以授晉王廣。至是，帝賞其功，授柱國。封郡公，賞物三千段。已宣勅訖，或說高穎曰：今歸功於李德林，諸將必當憤惋。且後世觀公，有若虛行。穎入言之，乃止。以秦王俊爲揚州總管，四十四州諸軍事，鎮廣陵。晉王廣還并州。晉王廣之戮陳五佞也，未知都官尙書孔範散騎常侍王瑳、王儀、御史中丞沈攸之、故得免。及至長安，事竝露。己未，帝暴其過惡，投之邊裔，以謝吳越之人。瑳刻薄貪鄙，忌害才能，儀傾巧側媚，獻二女以求親昵。攸之險慘苛酷，發言邪諂。故同羣焉。帝給賜陳叔寶甚厚，數得引見。班同三品，每預宴，恐致傷心，爲不奏。吳音，後監守者奏言：叔寶云：既無秩位，每預朝集，願得一官號。帝曰：叔寶全無心肝，監者又言：叔寶常醉，罕有醒時。帝問飲酒幾何，對曰：與其子弟日飲一石。帝大驚，使節其酒。既而曰：任其性，不爾何以過日。帝以陳氏子弟既多，恐其在京

城爲非。乃分置邊州。給田業。使爲生。歲時賜衣服。以安全之。詔以陳尚書令江總爲上開府儀同三司。僕射袁憲。驃騎蕭摩訶。領軍任忠。皆爲開府儀同三司。吏部尚書吳興姚察。爲祕書丞。上嘉袁憲雅操。下詔以爲江表稱首。授昌州刺史。聞陳散騎常侍袁元友。數直言於陳叔寶。擢拜主爵侍郎。謂羣臣曰。平陳之初。我悔不殺任蠻奴。受人榮祿。兼當重寄。不能橫尸狗國。乃云無所用力。與弘演納肝。何其遠也。帝見周羅睺。慰諭之。許以富貴。羅睺垂泣對曰。臣荷陳氏厚遇。本朝淪亡。無節可紀。得免於死。陛下之賜也。何富貴之敢望。賀若弼謂羅睺曰。聞公郢漢捉兵。卽知揚州可得。王師利涉。果如所量。羅睺曰。若得與公周旋。勝負未可知。頃之拜上儀同三司。先是。陳將羊翔來降。伐陳之役。使爲鄉導。位至上開府儀同三司。班在羅睺上。韓擒虎於朝堂戲之曰。不知機變。乃立在羊翔之下。能無愧乎。羅睺曰。昔在江南。久承令問。謂公天下節士。今日所言。殊非所望。擒虎有愧色。帝之責陳君臣也。陳叔文獨欣然有得色。旣而復上表自陳。昔在巴州。已先送款。乞知此情。望異常例。帝雖嫌其不忠。而欲懷柔。江表乃授叔文開府儀同三司。拜宜州刺史。初。陳散騎常侍韋鼎。聘于周。遇帝而異之。謂帝曰。公當大貴。貴則天下一家。歲一周天。老夫當委質於公。及至德之初。鼎爲太府卿。盡賣田宅。大匠卿毛彪。問其故。鼎曰。江東王氣。盡於此矣。吾與爾當葬長安。及陳平。上召鼎。爲上儀同三司。鼎。叡之孫也。壬戌。詔曰。今率土大同。合生遂性。太平之法。方可流行。凡我臣民。澡身浴德。家家自修。人人克念。兵可立威。不可戡刑。可助化。不可專行。禁衛九重之餘。鎮守四方之外。戎旅軍器。皆宜停罷。世路旣夷。羣方無事。武力之子。俱可學經。民間甲仗。悉皆除毀。頒告天下。咸悉此意。賀若弼撰其所畫策。上之。謂爲御授平陳七策。帝弗省。曰。公欲發揚我名。我不求名。公宜自載家傳。弼位望隆重。兄弟竝封郡公。爲刺史。列將家之珍玩。不可勝計。婢妾曳羅綺者。數百。時人榮之。其後突厥來朝。上謂之曰。汝聞江南有陳國天子乎。對曰。

聞之上命左右引突厥詣韓擒虎前。曰。此是執得陳國天子者。擒虎厲色顧之。突厥惶恐。不敢仰視。左衛將軍龐晃等。短高頴於上。上怒。皆黜之。親禮逾密。因謂頴曰。獨孤公猶鏡也。每被磨瑩。皎然益明。初。頴父賓。爲獨孤信僚佐。賜姓獨孤氏。故上常呼爲獨孤。而不名。樂安公元諧。性豪俠。有氣調。少與上同學。甚相愛。及卽位。累歷顯仕。諧好排詆。不能取媚左右。與上柱國王誼善。誼誅。上稍疎忌之。或告諧與從父弟上開府儀同三司滂。臨澤侯田儼。上儀同三司祈緒等。謀反。下有司案驗。奏諧謀令祈緒勒黨項兵。斷巴蜀。又諧嘗與滂同謁上。諧私謂滂曰。我是主人。殿上者賊也。因令滂望氣。滂曰。彼雲似蹲狗走鹿。不如我輩有福德雲。上大怒。諧。滂。儼。竝伏誅。○閏月己卯。以吏部尚書蘇威爲右僕射。六月乙丑。以荊州總管楊素爲納言。○朝野皆稱封禪。秋七月丙午。詔曰。豈可命一將軍。除一小國。遐邇注意。便謂太平。以薄德而封名山。用虛言而干上帝。非朕攸聞。而今而後言及封禪。宜卽禁絕。○右衛大將軍廣平王雄。貴寵特盛。與高頴。虞慶則。蘇威。稱爲四貴。雄寬容下士。朝野傾屬。上惡其得衆。陰忌之。不欲其典兵馬。八月壬戌。以雄爲司空。實奪之權。雄旣無職務。乃杜門不通賓客。○帝踐祚之初。柱國沛公鄭譯。請修正雅樂。詔太常卿牛弘。國子祭酒辛彥之。博士何妥等議之。積年不決。譯言古樂十二律。旋相爲宮。各用七聲。世莫能通。譯因龜茲人蘇祇婆。善琵琶。始得其法。推演爲十二均。八十四調。以校太樂所奏。例皆乖越。譯又於七音之外。更立一聲。謂之應聲。作書宣示朝廷。與邳公世子蘇夔議。累忝定律。時人以音律久無通者。非譯夔一朝可定。帝素不悅學。而牛弘不精音律。何妥自恥宿儒。反不逮譯等。常欲沮壞其事。乃立議。非十二律。旋相爲宮。及七調。競爲異議。各立朋黨。或欲令各造樂。待成。擇其善者而從之。妥恐樂成。善惡易見。乃請帝張樂試之。先白帝云。黃鍾象人君之德。及奏黃鍾之調。帝曰。滔滔和雅。甚與我心會。妥因奏。止用黃鍾一宮。不假餘律。帝悅從之。時又有樂工萬寶常。妙達鍾律。

譯等爲黃鍾調。成奏之。帝召問寶常。寶常曰。此亡國之音也。帝不悅。寶常請以水尺爲律。以調樂器。上從之。寶常造諸樂器。其聲率下鄭譯調一律。損益樂器。不可勝紀。其聲雅淡。不爲時人所好。太常善聲者。多排毀之。蘇夔尤忌寶常。夔父威方用事。凡言樂者。皆附之。而短寶常。寶常樂。竟爲威所抑。寢不行。及平陳。獲宋齊舊樂器。并江左樂工。帝令廷奏之。歎曰。此華夏正聲也。乃調五音。爲五夏二舞。登歌。房內十四調。寶祭用之。仍詔太常置清商署。以掌之。時天下既壹。異代器物。皆集樂府。牛弘奏。中國舊音。多在江左。前克荊州。得梁樂。今平蔣州。又得陳樂。史傳相承。以爲合古。請加修緝。以備雅樂。其後魏之樂。及後周所用。雜有邊裔之聲。皆不可用。請悉停之。冬十二月甲子。詔弘與許善心。姚察。及通直郎虞世基。參定雅樂。世基。蒨之子也。○己巳。以黃州總管周法尙爲永州總管。安集嶺南。給黃州兵三千五百人。爲帳內。陳桂州刺史錢季卿等。皆詣法尙降。定州刺史呂子廓。據山洞。不受命。法尙擊斬之。○以駕部侍郎狄道辛公義爲岷州刺史。岷州俗畏疫。一人病疫。闔家避之。病者多死。公義命皆輿置己之廳事。暑月。病人或至數百。聽廊皆滿。公義設榻。晝夜處其間。以秩祿具醫藥。身自省問。病者既愈。乃召其親戚。諭之曰。死生有命。豈能相染。若相染者。吾死久矣。皆慙謝而去。其後。人有病者。爭就使君。其家親戚。固留養之。始相慈愛。風俗遂變。後遷并州刺史。下車先至獄中。露坐。親自驗問。十餘日間。決遣咸盡。方還聽事。受領新訟。事皆立決。若有未盡。必須禁者。公義卽宿聽事。終不還閣。或諫曰。公事有程。使君何自苦。公義曰。刺史無德。不能使民無訟。豈可禁人在獄。而安寢於家乎。罪人聞之。咸自款服。後有訟者。鄉閭父老。遽曉之曰。此小事。何忍勤勞使君。訟者多兩讓而止。

十年春正月乙未。以皇孫昭爲河南王。楷爲華陽王。昭。廣之子也。○二月庚申。上幸晉陽。命高顯居守。夏四月辛酉。至自晉陽。○成安文子李德林。恃其才望。論議好勝。同列多疾之。由

是。以佐命元功。十年。不徙級。德林數與蘇威異議。高顯常助威奏。德林狼戾。上多從威議。上賜德林莊店。使自擇之。德林請逆人高阿那肱。衛國縣市店。上許之。及幸晉陽。店人訴稱。高氏強奪民田。於內造店賃之。蘇威因奏。德林誣罔。妄奏自入。司農卿李圓通等。復助之曰。此店收利。如食千戶。請計日追贖。上自是益惡之。虞慶則等。奉使關東。巡省還。皆奏稱。鄉正專理。辭訟黨與。愛憎。公行貨賄。不便於民。上令廢之。德林曰。茲事。臣本以爲不可。然置來始爾。卽以軍法從事。不然者。紛紜未已。上遂發怒。大詬云。爾欲以我爲王莽邪。先是。德林稱父爲太尉。諮議。以取贈官。給事黃門侍郎。猗氏陳茂等。密奏。德林父。終於校書。妄稱諮議。上甚銜之。至是。上因數之曰。公爲內史。典朕機密。比不可豫計議者。以公不弘耳。寧自知乎。又罔冒取店。妄加父官。朕實忿之。而未能發。今當以一州相遣耳。因出爲湖州刺史。德林拜謝曰。臣不敢復望內史令。請但預散參。上不許。遷懷州刺史。而卒。李圓通。本上微時家奴。有器幹。及爲隋公。以圓通及陳茂爲參佐。由是信任之。梁國之廢也。上以梁太府卿柳莊爲給事黃門侍郎。莊有識度。博學善辭令。明習典故。雅達政事。上及高顯皆重之。與陳茂同僚。不能降意。茂譖之於上。上稍疎之。出爲饒州刺史。上性猜忌。不悅學。旣任智以獲大位。因以文法自矜。明察臨下。恆令左右。覘視內外。有過失。則加以重辜。又患令史臧汙。私使人以錢帛遺之。得犯立斬。每於殿庭捶人。一日之中。或至數四。嘗怒問事。揮楚不甚。卽命斬之。尙書左僕射高顯。治書侍御史柳彧等。諫以爲朝堂。非殺人之所。殿廷非決罰之地。上不納。顯等乃盡詣朝堂。請罪。上顧謂領左右都督田元曰。吾杖重乎。元曰。重。帝問其狀。元舉手曰。陛下杖。大如指。捶人三十者。比常杖數百。故多死。上不懌。乃令殿內去杖。欲有決罰。各付所由。後楚州行參軍李君才。上言。上寵高顯過甚。上大怒。命杖之。而殿內無杖。遂以馬鞭捶殺之。自是。殿內復

置杖未幾。怒甚。又於殿廷殺人。兵部侍郎馮基固諫。上不從。竟於殿廷殺之。上亦尋悔。宣慰馮基而怒羣臣之不諫者。○五月乙未。詔曰。魏末喪亂。軍人權置坊府。南征北伐。居處無定。家無完堵。地罕包桑。朕甚愍之。凡是軍人。可悉屬州縣。墾田籍帳。一與民同。軍府統領。宜依舊式。罷山東河南及北方緣邊之地。新置軍府。○六月辛酉。制。民年五十。免役收庸。○秋七月。癸卯。以納言楊素爲內史令。○冬十一月辛丑。上祀南郊。○江表自東晉已來。刑法疏緩。世族陵駕。寒門平陳之後。牧民者盡更變之。蘇威復作五教。使民無長幼悉誦之。士民嗟怨。民間復訛言。隋欲徙之入關。遠近驚駭。於是婺州汪文進。越州高智慧。蘇州沈玄愴。皆舉兵反。自稱天子。署置百官。樂安蔡道人。蔣山李悛。饒州吳世華。溫州沈孝徹。泉州王國慶。杭州楊寶英。交州李春等。皆自稱大都督。攻陷州縣。陳之故境。大抵皆反。大者有衆數萬。小者數千。共相影響。執縣令。或抽其腸。或斮其肉。食之曰。更能使儂誦五教邪。詔以楊素爲行軍總管。以討之。素將濟江。使始興麥鐵杖。戴束藁。夜浮渡江。覘賊。還而復往。爲賊所擒。遣兵仗三十人。防之。鐵杖取賊刀。亂斬防者。殺之。皆盡。割其鼻。懷之以歸。素大奇之。奏授儀同三司。素帥舟師。自楊子津入。擊賊帥朱莫問於京口。破之。進擊晉陵。賊帥顧世興。無錫。賊帥葉略。皆平之。沈玄愴敗走。素追禽之。高智慧據浙江東岸爲營。周亙百餘里。船艦被江。素擊之。子總管南陽來護兒。言於素曰。吳人輕銳。利在舟楫。必死之賊。難與爭鋒。公宜嚴陳以待之。勿與接刃。請假奇兵數千。潛度江。掩破其壁。使退無所歸。進不得戰。此韓信破趙之策也。素從之。護兒以輕舸數百。直登江岸。襲破其營。因縱火。烟焰漲天。賊顧火而懼。素因縱兵奮擊。大破之。賊遂潰。智慧逃入海。素躡之。至海曲。召行軍記室封德彝。計事。德彝墜水。人救獲免。易衣見素。竟不自言。素後知之。問其故。曰。私事也。所以不白。素嗟異之。德彝名倫。以字行。隆之之孫也。汪文進以蔡道人爲司空。守樂安。素進討。悉平之。素遣總管史萬歲。帥衆二千。自婺州

別道。踰嶺越海。攻破溪洞。不可勝數。前後七百餘戰。轉鬪千餘里。寂無聲問者十旬。遠近皆以萬歲爲沒。萬歲置書竹筒中。浮之於水。汲者得之。言於素。素上其事。上嗟歎。賜萬歲家錢十萬。素又破沈孝徹於溫州。步道向天台。指臨海。逐捕遺逸。前後百餘戰。高智慧走保閩越。上以素久勞於外。令馳傳入朝。素以餘賊未殄。恐爲後患。復請行。遂乘傳至會稽。王國慶自以海路艱阻。非北人所習。不設備。素泛海奄至。國慶惶遽。奔州走。餘黨散入海島。或守溪洞。素分遣諸將。水陸追捕。密令人說國慶。使斬送智慧。以自贖。國慶乃執送智慧。斬於泉州。餘黨悉降。江南大定。素班師。上遣左領軍將軍獨孤陀。至浚儀迎勞。比到京師。問者日至。拜素子玄獎爲儀同三司。賞賜甚厚。陀信之子也。楊素用兵多權略。馭衆嚴整。每將臨敵。輒求人過失而斬之。多者百餘人。少不下十數。流血盈前。言笑自若。及其對陳。先令一二百人赴敵。陷陳則已。如不能陷而還者。無問多少。悉斬之。又令二三百人復進。還如向法。將士股慄。有必死之心。由是戰無不勝。稱爲名將。素時貴幸。言無不從。其從素行者。微功必錄。至佗將。雖有大功。多爲文吏所譴却。故素雖殘忍。士亦以此願從焉。○以并州總管晉王廣爲楊州總管。鎮江都。復以秦王俊爲并州總管。○番禺夷王仲宣反。嶺南首領多應之。引兵圍廣州。韋洸中流矢卒。詔以其副慕容三藏檢校廣州道行軍事。又詔給事郎裴矩。巡撫嶺南。矩至南康。得兵數千人。仲宣遣別將周師舉。圍東衡州。矩與大將軍鹿愿擊斬之。進至南海。高涼洗夫人遣其孫馮暄。將兵救廣州。暄與賊將陳佛智素善。逗留不進。夫人知之。大怒。遣使執暄。繫州獄。更遣孫盎。出討佛智。斬之。進會鹿愿於南海。與慕容三藏合擊。仲宣衆潰。廣州獲全。洗氏親被甲乘介馬。張錦繖。引鼓騎。衛從裴矩。巡撫二十餘州。蒼梧首領陳坦等。皆來謁見。矩承制。署爲刺史。縣令。使還統其部落。嶺表遂定。矩復命。上謂高穎。楊素曰。韋洸將二萬兵。不能早度嶺。朕每患其兵少。裴矩以三千敵卒。徑至南海。有臣若此。朕亦何憂。以矩爲

民部侍郎拜馮盎高州刺史。追贈馮寶廣州總管。譙國公冊洗氏為譙國夫人。開譙國夫人幕府。置長史以下官屬。官給印章。聽發部落六州兵馬。若有機急。便宜行事。仍敕以夫人誠效之故。特赦暄逗留之罪。拜羅州刺史。皇后賜夫人首飾。及宴服一襲。夫人竝盛於金篋。并梁陳賜物各藏一庫。每歲時大會。陳之於庭。以示子孫。曰。我事三代主。惟用一忠順之心。今賜物具存。此其報也。汝曹皆念之。盡赤心於天子。番州總管趙訥貪虐。諸俚獠多亡叛。夫人遣長史張融上封事。論安撫之宜。并言訥罪。不可以招懷遠人。上遣推訥。得其贓賄。竟致於法。委夫人招慰亡叛。夫人親載詔書。自稱使者。歷十餘州。宣述上意。諭諸俚獠。所至皆降。上嘉之。賜夫人臨振縣。為湯沐邑。贈馮僕崖州總管平原公。

十一年春正月丙午。皇太子妃元氏薨。○二月戊午。吐谷渾遣使入貢。吐谷渾可汗夸呂聞陳亡。大懼。遁逃。保險。不敢為寇。夸呂卒。子世伏立。使其兄子無素奉表稱藩。并獻方物。請以女備後庭。上謂無素曰。若依來請。佗國聞之。必當相徵。何以拒之。朕情存安養。各令遂性。豈可聚斂子女。以實後宮乎。竟不許。○平鄉令劉曠有異政。以義理曉諭訟者。皆引咎而去。獄中草滿。庭可張羅。遷臨穎令。高頴薦曠。清名善政。為天下第一。上召見勉之。謂侍臣曰。若不殊獎。何以為勸。丙子。優詔擢為莒州刺史。○辛巳晦。日有食之。○初帝微時。與滕穆王瓚不協。帝為周相。以瓚為大宗伯。瓚恐為家禍。陰欲圖帝。帝隱之。瓚妃周高祖妹順陽公主也。與獨孤后素不平。陰為呪詛。帝命出之。瓚不可。秋八月壬申。瓚從帝幸栗園。暴薨。時人疑其遇鴆。乙亥。帝至自栗園。○沛達公鄭譯卒。

資治通鑑卷第一百七十七

資治通鑑卷第一百七十八

隋紀二

高祖文皇帝上之下

開皇十二年春二月己巳。以蜀王秀為內史令。兼右領軍大將軍。○國子博士何妥與尚書右僕射邴公蘇威爭議事。積不相能。威子夔為太子通事舍人。少敏辯。有盛名。士大夫多附之。及議樂。夔與妥各有所持。詔百僚署其所。同百僚以威故。同夔者什八九。妥恚曰。吾席間函丈。四十餘年。反為昨暮兒之所屈邪。遂奏威。與禮部尚書盧愷。吏部侍郎薛道衡。尚書右丞王弘。考功侍郎李同等。共為朋黨。省中呼弘為世子。同和為叔。言二人如威之子弟也。復言威以曲道。任其從父弟徹。肅罔冒為官等數事。上命蜀王秀。上柱國虞慶則等。雜案之。事頗有狀。上大怒。秋七月乙巳。威坐免官。爵以開府儀同三司。就第。盧愷除名。知名之士。坐威得罪者百餘人。初周室以來。選無清濁。及愷攝吏部。與薛道衡甄別士流。故涉朋黨之謗。以至得罪。未幾。上曰。蘇威德行。但為人所誤耳。命之通籍。威好立條章。每歲責民間五品不遜。或答云。管內無五品之家。其不相應。類多如此。又為餘糧簿。欲使有無相瞻。民部侍郎郎茂。以為煩迂不急。皆奏罷之。茂基之子也。嘗為衛國令。有民張元預。兄弟不睦。丞尉請加嚴刑。茂曰。元預兄弟。本相憎疾。又坐得罪。彌益其忿。非化民之意也。乃徐諭之。以義。元預等各感悔。頓首請罪。遂相親睦。稱為友悌。○己巳。上享太廟。○壬申晦。日有食之。○帝以天下用律者多踳駁。罪同論異。八月甲戌。制諸州死臯。不得輒決。悉移大理案覆。事盡然後上。

省奏裁。○冬十月壬午。上享太廟。○十一月辛亥。祀南郊。○己未。新義公韓擒虎卒。○十二月乙酉。以內史楊素爲尚書右僕射。與高穎專掌朝政。素性疎辯。高下在心。朝臣之內。頗推高穎。敬牛弘。厚接薛道衡。視蘇威蔑如也。自餘朝貴。多被陵轢。其才藪風調。優於穎。至于推誠體國。處物平當。有宰相識度。不如穎遠矣。右領軍大將軍賀若弼。自謂功名。出朝臣之右。每以宰相自許。既而楊素爲僕射。弼仍爲將軍。甚不平。形於言色。由是坐免官。怨望愈甚。久之。上下弼獄。謂之曰。我以高穎楊素爲宰相。汝每昌言曰。此二人。惟堪啗飯耳。是何意也。弼曰。穎。臣之故人。素。臣之舅子。臣竝知其爲人。誠有此語。公卿奏弼怨望。罪當死。上曰。臣下守法不移。公可自求活理。弼曰。臣恃至尊威靈。將八千兵度江。擒陳叔寶。竊以此望活。上曰。此已格外重賞。何用追論。弼曰。臣已蒙格外重賞。今還格外望活。既而上低回數日。惜其功。特令除名。歲餘。復其爵位。上亦忌之。不復任使。然每宴賜。遇之甚厚。○有司上言。府藏皆滿。無所容。積于廊廡。帝曰。朕既薄賦於民。又大經賜用。何得爾也。對曰。入者常多於出。略計每年賜用。至數百萬段。曾無減損。於是更闢左藏院。以受之。詔曰。寧積於人。無藏府庫。河北河東今年田租三分減一。兵減半。功調全免。時天下戶口歲增。京輔及三河地少而人衆。衣食不給。帝乃發使四出。均天下之田。其狹鄉。每丁纔至二十畝。老少又少焉。

十三年春正月壬子。上祀感生帝。○壬戌。行幸岐州。○二月丙子。詔營仁壽宮於岐州之北。使楊素監之。素奏。前萊州刺史宇文愷。檢校將作大匠。記室封德彝。爲土木監。於是夷山堙谷。以立宮殿。崇臺累榭。宛轉相屬。役使嚴急。丁夫多死。疲頓顛仆。推填坑坎。覆以土石。因而築爲平地。死者以萬數。○丁亥。上至自岐州。○己卯。立皇孫暕爲豫章王。暕。廣之子也。○丁酉。制私家不得藏緯候圖讖。○秋七月戊辰晦。日有食之。○是歲。上命禮部尚書牛弘等議明堂制度。宇文愷獻明堂木樣。上命有司。規度安業里地。將立之。而諸儒異議。久之不決。乃

罷之。上之滅陳也。以陳叔寶屏風賜突厥大義公主。公主以其宗國之覆。心常不平。書屏風爲詩。敍陳亡以自寄。上聞而惡之。禮賜漸薄。彭公劉昶。先尚周公主。流人楊欽。亡入突厥。詐言昶欲與其妻作亂攻隋。遣欽密告大義公主。發兵擾邊。都藍可汗信之。乃不修職貢。頗爲邊患。上遣車騎將軍長孫晟。使於突厥。微觀察之。公主見晟。言辭不遜。又遣所私胡人安遂。與楊欽計議。扇惑都藍。晟至京師。具以狀聞。上遣晟往索欽。都藍不與。曰。檢校客內。無此色人。晟乃賂其達官。知欽所在。夜掩獲之。以示都藍。因發公主私事。國人大以爲恥。都藍執安遂。使殺公主。時處羅侯之子染干。號突利可汗。居北方。遣使求婚。上使表矩謂之曰。當殺都藍。使殺公主。時處羅侯之子染干。號突利可汗。居北方。遣使求婚。上使表矩謂之曰。當殺大義公主。乃許婚。突利復譖之於都藍。都藍因發怒。殺公主。更表請婚。朝議將許之。長孫晟曰。臣觀雍虞閭。反覆無信。直以與玷厥有隙。所以欲依倚國家。雖與爲婚。終當叛去。今若得尙公主。承藉威靈。玷厥染干。必受其徵發。疆而更反。後恐難圖。且染干者。處羅侯之子。素有誠款。於今兩代。前乞通婚。不如許之。招令南徙。兵少力弱。易可撫馴。使敵雍虞閭。以爲邊捍。上曰。善。復遣晟慰諭染干。許尙公主。○牛弘使協律郎范陽祖孝孫等。參定雅樂。從陳陽山太守毛爽。受京房律法。布管飛灰。順月皆驗。又每律生五音。十二律爲六十音。因而六之。爲三百六十音。分直一歲之日。以配七音。而旋相爲宮之法。由是著名。弘等乃奏。請復用旋宮法。上猶記何妥之言。注弘奏下。不聽作旋宮。但用黃鍾一宮。於是弘等復爲奏。附順上意。其前代金石。竝銷毀之。以息異議。弘等又作武舞。以象隋之功德。郊廟饗用。一調。迎氣用五調。舊工稍盡。其餘聲律。皆不復通。

十四年春三月。樂成。夏四月乙丑。詔行新樂。且曰。民間音樂。流僻日久。棄其舊體。競造繁聲。宜加禁約。務存其本。萬寶常聽。太常所奏樂。泫然泣曰。樂聲淫厲而哀。天下不久將盡。時四

海全盛。聞者皆謂不然。大業之末。其言卒驗。實常貧而無子。久之。竟餓死。且死。悉取其書。燒之。曰。用此何爲。○先是。臺省府寺。及諸州。皆罷公廩錢。收息取給。工部尙書蘇孝慈。以爲官司出舉興生。煩擾百姓。敗損風俗。請皆禁止。給地以營農。上從之。六月。丁卯。始詔公卿以下。皆給職田。毋得治生。與民爭利。○秋。七月。乙未。以郅公蘇威爲納言。○初。張寶曆既行。廣平劉孝孫。冀州秀才。劉焯。竝言其失。寶方有寵於上。劉暉附會之。共短孝孫。斥罷之。後寶卒。孝孫爲掖縣丞。委官入京。上其事。詔留直太史。累年不調。乃抱其書。使弟子輿糶。來詣闕下。伏而慟哭。執法拘而奏之。帝異焉。以問國子祭酒何妥。妥言其善。乃遣與寶曆。比技短長。直太史勃海張胄玄。與孝孫共短寶曆。異論蜂起。久之不定。上令參問日食事。楊素等奏。太史凡奏日食二十有五。率皆無驗。胄玄所刻前後妙中。孝孫所刻。驗亦過半。於是上引孝孫。胄玄等親自勞徠。孝孫請先斬劉暉。乃可定曆。帝不懌。又罷之。孝孫尋卒。○關中大旱。民飢。上遣左右視民食。得豆屑雜糠。以獻。上流涕。以示羣臣。深自咎責。爲之不御酒肉。殆將一朞。八月。辛未。上帥民。就食於洛陽。勅斥候。不得輒有驅逼。男女參廁於仗衛之間。遇扶老攜幼者。輒引馬避之。慰勉而去。至艱險之處。見負擔者。令左右扶助之。○冬。閏十月。甲寅。詔以齊梁陳宗祀廢絕。命高仁英。蕭琮。陳叔寶。以時修祭。所須器物。有司給之。陳叔寶從帝登邙山。侍飲。賦詩曰。日月光天德。山河壯帝居。太平無以報。願上東封書。并表請封禪。帝優詔答之。它日。復侍宴。及出。帝目之曰。此敗豈不由酒。以作詩之功。何如思安時事。當賀若弼度京口。彼人密啓告急。叔寶飲酒。遂不之省。高穎至日。猶見啓在牀下。未開封。此誠可笑。蓋天亡之也。昔苻氏征伐。所得國。皆榮貴其主。苟欲求名。不知違天命。與之官。乃違天也。○齊州刺史盧賁。坐民飢。閉民糶。除名。帝後復欲授以一州。賁對詔失旨。又有怨言。帝大怒。遂不用。皇太子爲言。此輩竝有佐命功。雖性行輕險。誠不可棄。帝曰。我抑屈之。全其命也。徵劉昉。鄭譯。盧賁。柳

裘。皇甫績等。則我不至此。然此等皆反覆子也。當周宣帝時。以無賴得幸。及帝大漸。顏之儀等。請以趙王輔政。此輩行詐。願命於我。我將爲政。又欲亂之。故昉謀大逆。譯爲巫蠱。如賁之例。皆不滿志。任之則不遜。置之則怨望。自爲難信。非我棄之。衆人見此。謂我薄於功臣。斯不然矣。賁遂廢卒于家。○晉王廣。帥百官抗表。固請封禪。帝令牛弘。創定儀注。既成。帝視之曰。茲事體大。朕何德以堪之。但當東巡。因致祭泰山耳。十二月。乙未。車駕東巡。○上好禋祥小數。上儀同三司蕭吉。上書曰。甲寅。乙卯。天地之合也。今茲甲寅之年。以辛酉朔旦冬至。來年乙卯。以甲子夏至。冬至陽始。郊天之日。卽至尊本命。夏至陰始。祀地之辰。卽皇后本命。至尊德竝乾之覆育。皇后仁同地之載養。所以二儀元氣。竝會本辰。上大悅。賜物五百段。吉。懿之孫也。員外散騎侍郎王劭。言上有龍顏戴干之表。指示羣臣。上悅。拜著作郎。劭前後上表。言上受命符瑞甚衆。又採民間歌謠。引圖書讖緯。拮撫佛經。回易文字。曲加誣飾。撰皇隋靈感志三十卷。奏之。上令宣示天下。劭集諸州朝集使。盥手焚香而讀之。曲折其聲。有如歌詠。經涉旬朔。徧而後罷。上益喜。前後賞賜優洽。十五年。春。正月。壬戌。車駕頓齊州。庚午。爲壇于泰山。柴燎祀天。以歲早。謝愆咎。禮如南郊。又親祀青帝壇。赦天下。○二月。丙辰。收天下兵器。敢私造者。坐之。關中緣邊。不在其例。○三月。己未。至自東巡。○仁壽宮成。丁亥。上幸仁壽宮。時天暑。役夫死者。相次於道。楊素悉焚除之。上聞之不悅。及至。見制度壯麗。大怒曰。楊素殫民力。爲離宮。爲吾結怨天下。素聞之。惶恐。慮獲譴。以告封德彝。曰。公勿憂。俟皇后至。必有恩詔。明日。上果召素入對。獨孤后勞之。曰。公知吾夫婦老。無以自娛。盛飾此宮。豈非忠孝。賜錢百萬。錦絹三千段。素負貴恃才。多所陵侮。唯賞重德彝。每引之。與論宰相職務。終日忘倦。因撫其牀曰。封郎。必須據吾此坐。屢薦於帝。帝擢爲內史舍人。○夏。四月。己丑朔。赦天下。○六月。戊子。詔鑿底柱。○庚寅。相州刺史豆盧通

貢綾文布命焚之於朝堂。○秋七月。納言蘇威。坐從祠泰山不敬。免。俄而復位。上謂羣臣曰。世人言蘇威詐清。家累金玉。此妄言也。然其性狠戾。不切世要。求名太甚。從己則悅。違之必怒。此其大病耳。○戊寅。上至自仁壽宮。○冬十月。戊子。以吏部尚書韋世康爲荊州總管。世康。洸之弟也。和靜謙恕。在吏部十餘年。時稱廉平。常有止足之志。謂子弟曰。祿豈須多。防滿則退。年不待暮。有疾便辭。因懇乞骸骨。帝不許。使鎮荊州。時天下惟有四總管。并楊益。荆。以晉。秦。蜀。三王。及世康。爲之。當時以爲榮。○十一月。辛酉。上幸溫湯。○十二月。戊子。勅盜邊糧一升已上。皆斬。仍籍沒其家。○己丑。詔文武官。以四考受代。○汴州刺史令狐熙。來朝。考績爲天下之最。賜帛三百匹。頒告天下。熙。整之子也。

十六年春正月丁亥。以皇孫裕爲平原王。筠爲安成王。巖爲安平王。恪爲襄城王。該爲高陽王。詔爲建安王。嬰爲潁川王。皆勇之子也。○夏六月甲午。初制工商不得仕進。○秋八月丙戌。詔決死罪者。三奏然後行刑。○冬十月己丑。上幸長春宮。十一月壬子。還長安。○党項寇會州。詔發隴西兵討降之。○帝以光化公主妻吐谷渾可汗世伏。世伏上表請稱公主爲天后。上不許。

十七年春二月癸未。太平公史萬歲擊南寧羌平之。初梁睿之克王謙也。西南夷獠莫不歸附。唯南寧州酋帥爨震恃遠不服。睿上疏以爲南寧州漢世牂柯之地。戶口殷衆。金寶富饒。梁南寧州刺史徐文盛爲湘東王徵赴荊州。屬東夏尙阻。未遑遠略。土民爨瓚遂竊據一方。國家遙授刺史。其子震相承至今。而震臣禮多虧。貢賦不入。乞因平蜀之衆。略定南寧。其後南寧夷爨瓚來降。拜昆州刺史。既而復叛。乃以左領軍將軍史萬歲爲行軍總管。帥衆擊之。入自蜻蛉川。至于南中。夷人前後屯據要害。萬歲皆擊破之。過諸葛亮紀功碑。度西洱河。入渠濫川。行千餘里。破其三十餘部。虜獲男女三萬餘口。諸夷大懼。遣使請降。獻明珠徑寸。於

是勸石。頌美隋德。萬歲請將爨瓚入朝。詔許之。爨瓚陰有貳心。不欲詣闕。賂萬歲以金寶萬歲於是捨瓚而還。○甲寅。上幸仁壽宮。○桂州俚帥李光仕作亂。帝遣上柱國王世積與前桂州總管周法尙討之。法尙發嶺南兵。世積發嶺北兵。俱會尹州。世積所部遇瘴。不能進。頓于衡州。法尙獨討之。光仕戰敗。帥勁兵走保白石洞。法尙大獲家口。其黨有來降者。輒以妻子還之。居旬日。降者數千人。光仕衆潰而走。追斬之。帝又遣員外散騎侍郎何稠募兵討光仕。稠諭降其黨莫崇等。承制署首領爲州縣官。稠。妥之兄子也。上以嶺南夷越數反。以汴州刺史令狐熙爲桂州總管。十七州諸軍事。許以便宜從事。刺史以下官。得承制補授。熙至部。大弘恩信。其溪洞渠帥。更相謂曰。前時總管皆以兵威相脅。今者乃以手教相諭。我輩其可違乎。於是相帥歸附。先是州縣生梗。長吏多不得之官。寄政於總管府。熙悉遣之。爲建城邑。開設學校。華夷感化焉。俚帥竇猛力。在陳世。已據南海。隋因而撫之。拜安州刺史。猛力恃險驕倨。未嘗參謁。熙諭以恩信。猛力感之。詣府請謁。不敢爲非。熙奏。改安州爲欽州。○帝以所屬官不敬。憚其上。事難克舉。三月丙辰。詔諸司論屬官罪。有律輕情重者。聽於律外。斟酌決杖。於是上下相驅。迭行捶楚。以殘暴爲幹能。以守法爲懦弱。帝以盜賊繁多。命盜一錢以上。皆棄市。或三人共盜一瓜。事發卽死。於是行旅皆晏起早宿。天下懷懍。有數人劫執事而謂之曰。吾豈求財者邪。但爲枉人來耳。而爲我奏至尊。自古以來。體國立法。未有盜一錢而死者也。而不爲我以聞。吾更來。而屬無類矣。帝聞之。爲停此法。帝嘗乘怒。欲以六月杖殺人。大理少卿河東趙綽固爭曰。季夏之月。天地成長。庶類不可以此時誅殺。帝報曰。六月。雖曰生長。此時必有雷霆。我則天而行。有何不可。遂殺之。大理掌固來曠。上言。大理官司太寬。帝以曠爲忠直。遣每旦於五品行中參見。曠又告少卿趙綽。濫免徒囚。帝使信臣推驗。初無阿曲。帝怒。命斬之。綽固爭。以爲曠不合死。帝拂衣入閣。綽矯言。臣更不理曠。自有佗事。未及奏。

聞帝命引入閣。綽再拜請曰：臣有死辜三。臣爲大理少卿，不能制御掌固，使曠觸挂天刑，一也。囚不合死，而臣不能死爭，二也。臣本無佗事，而妄言求入，三也。帝解顏，會獨孤后在坐，命賜綽二金盃酒，并盃賜之。曠因免死，徙廣州。蕭摩訶子世略，在江南作亂，摩訶當從坐。上曰：世略年未二十，亦何能爲？以其名將之子，爲人所逼耳。因赦摩訶。綽固諫，不可。上不能奪，欲綽去而赦之。因命綽退食。綽曰：臣奏獄未決，不敢退。上曰：大理其爲朕特赦摩訶也。因命左右釋之。刑部侍郎辛亶嘗衣緋褱，俗云利官。上以爲厭，盡將斬之。綽曰：法不當死，臣不敢奉詔。上怒甚，曰：卿惜辛亶而不自惜也。命引綽斬之。綽曰：陛下寧殺臣，不可殺辛亶。至朝堂解衣當斬。上使人謂綽曰：竟何如？對曰：執法一心，不敢惜死。上拂衣而入。良久乃釋之。明日謝綽，勞勉之。賜物三百段。時上禁行惡錢，有二人在市，以惡錢易好者，武候執以聞。上令悉斬之。綽進諫曰：此人所坐當杖殺之非法。上曰：不關卿事。綽曰：陛下不以臣愚暗，置在法司，欲妄殺人，豈得不關臣事？上曰：撼大木不動者，當退。對曰：臣望感天心，何論動木？上復曰：啜羹者，熱則置之。天子之威欲相挫邪？綽拜而益前，訶之不肯退。上遂入，治書侍御史柳彧復上奏切諫，上乃止。上以綽有誠直之心，每引入閣中，或遇上與皇后同榻，卽呼綽坐，評論得失。前後賞賜萬計。與大理卿薛胄同時，俱名平恕。然胄斷獄以情，而綽守法，俱爲稱職。胄端之子也。帝晚節用法益峻。御史於元日不効，武官衣劍之不齊者，帝曰：爾爲御史，縱捨自由，命殺之。諫議大夫毛思祖諫，又殺之。將作寺丞以課麥穎遲晚，武庫令以署庭荒蕪，左右出使或授牧宰馬鞭，鸚鵡帝察知，竝親臨斬之。帝既喜怒不恆，不復依準科律，信任楊素，素復任情不平。與鴻臚少卿陳延有隙，嘗經蕃客館，庭中有馬屎，又衆僕於甃上擣蒲，以白帝。帝大怒，主客令及擣蒲者皆杖殺之。種陳延幾死。帝遣親衛大都督長安屈突通往隴西，檢覆羣牧，得隱匿馬二萬餘匹。帝大怒，將斬太僕卿慕容悉達，及諸監官千五百人。通諫曰：人命至

重，陛下奈何以畜產之故，殺千有餘人？臣敢以死請。帝瞋目叱之，通又頓首曰：臣一身分死，就陛下，何千餘人命？帝感寤曰：朕之不明，以至于此，賴有卿忠言耳。於是悉達等皆減死論擢，通爲左武侯將軍。○上柱國劉昶與帝有舊，帝甚親之。其子居士任俠不遵法度，數有罪。上以昶故，每原之。居士轉驕恣，取公卿子弟雄健者，輒將至家，以車輪括其頸，而棒之，殆死。能不屈者，稱爲壯士，釋而與交。黨餘三百人。毆擊路人，多所侵奪。至於公卿妃主，莫敢與較。或告居士謀爲不軌，帝怒，斬之。公卿子弟，居士除名者甚衆。○楊素牛弘等復薦張胄玄曆術，上令楊素與術數人立議六十一事，皆舊法久難通者。令劉暉與玄胄等辨析，暉杜口，一無所答。胄玄通者五十四。上乃拜胄玄員外散騎侍郎，兼太史令，賜物千段，令參定新術。至是，胄玄曆成。夏四月，戊寅，詔頒新曆。前造曆者劉暉四人，竝除名。○秋七月，桂州人李世賢反。上議討之。諸將數人請行，上不許。顧右武侯大將軍虞慶則曰：位居宰相，爵乃上公，國家有賊，遂無行意，何也？慶則拜謝恐懼，乃以慶則爲桂州道行軍總管，討平之。○秦王俊幼仁恕，喜佛教，嘗請爲沙門，不許。及爲并州總管，漸好奢侈，遠越制度。盛治宮室，俊好內，其妻崔氏，弘度之妹也。性妒，於瓜中進毒，由是得疾。徵還京師，上以其奢縱，丁亥，免俊官。以王就第，崔妃以毒，王廢絕，賜死於家。左武衛將軍劉昇諫曰：秦王非有佗過，但費官物，營靡舍而已。臣謂可容。上曰：法不可違。楊素復諫曰：秦王之過，不應至此。願陛下詳之。上曰：我是五兒之父，非兆民之父。若如公意，何不別制天子兒律？以周公之爲人，尙誅管蔡，我誠不及周公遠矣。安能虧法乎？卒不許。○戊戌，突厥突利可汗來逆女，上舍之。太常教習六禮，妻以宗女安義公主。上欲離間都藍，故特厚其禮，遣太常卿牛弘納言蘇威、民部尙書斛律卿相繼爲使。突利本居北方，尙主長孫晟說其帥衆南徙，居度斤舊鎮，錫賚優厚。都藍怒曰：我大可汗也，反不如染干。於是朝貢遂絕。亟來抄掠邊鄙，突利伺知動靜，輒遣奏聞。由是邊鄙每先

有備。○九月甲申。上至自仁壽宮。○何稠之自嶺南還也。審猛力請隨稠入朝。稠見其疾篤。遣還欽州。與之約曰。八九月間。可詣京師。相見。使還奏狀。上意不懌。冬十月。猛力病卒。上謂稠曰。汝前不將猛力來。今竟死矣。稠曰。猛力與臣約。假令身死。當遣子入侍。越人性直。其子必來。猛力臨終。果戒其子長真曰。我與大使約。不可失信。汝葬我畢。宜即登路。長真嗣爲刺史。如言入朝。上大悅曰。何稠著信蠻夷。乃至于此。○魯公虞慶則之討李世賢也。以婦弟趙什住爲隨府長史。什住通于慶則。愛妾恐事泄。乃宣言慶則不欲此行。上聞之。禮賜甚薄。慶則還至潭州。臨桂嶺。觀眺山川形勢。曰。此誠險固。加以足糧。若守得其人。攻不可拔。使什住馳詣京師。奏事。觀上顏色。什住因告慶則謀反。下有司案驗。十二月壬子。慶則坐死。拜什住爲柱國。○高麗王湯。聞陳亡。大懼。治兵積穀。爲拒守之策。是歲。上賜湯璽書。責以雖稱藩附。誠節未盡。且曰。彼之一方。雖地狹人少。今若黜王。不可虛置。終須更選官屬。就彼安撫。王若洒心易行。率由憲章。卽是朕之良臣。何勞別遣才彥。王謂遼水之廣。何如長江。高麗之人。多少陳國。朕若不存。含有責。王前愆命。一將軍。何待多力。殷勤曉示。許王自新耳。湯得書。惶恐。將奉表陳謝。會病卒。子元嗣立。上使使拜元爲上開府儀同三司。襲爵遼東公。元奉表謝恩。因請封王。上許之。○吐谷渾大亂。國人殺世伏。立其弟伏允爲主。遣使陳廢立之事。拜謝專命之罪。且請依俗尙主。上從之。自是朝貢歲至。

十八年春二月甲辰。上幸仁壽宮。○高麗王元帥靺鞨之衆萬餘寇遼西。營州總管韋沖擊走之。上聞而大怒。乙巳。以漢王諒王世積竝爲行軍元帥。將水陸三十萬伐高麗。以尙書左僕射高穎爲漢王長史。周羅睺爲水軍總管。○延州刺史獨孤陀。有婢曰徐阿尼。事猫鬼。能使之殺人。云每殺人。則死家財物。潛移於畜猫鬼家。會獨孤后及楊素妻鄭氏俱有疾。醫皆曰。猫鬼疾也。上以陀后之異母弟陀妻楊素異母妹。由是意陀所爲。令高穎等雜治之。具得

其實。上怒。令以犢車載陀夫妻。將賜死。獨孤后三日不食。爲之請命曰。陀若蠹政害民者。妾不敢言。今坐爲妾身。敢請其命。陀弟司勳侍郎整。詣闕求哀。於是免陀死。除名爲民。以其妻楊氏爲尼。先是有人訟其母爲猫鬼所殺者。上以爲妖妄。怒而遣之。至是。詔誅被訟行猫鬼家。夏四月辛亥。詔畜猫鬼蠱毒厭媚野道之家。竝投於四裔。○六月丙寅。下詔黜高麗王元寔爵。漢王諒軍出臨渝關。值水潦。餽運不繼。軍中乏食。復遇疾疫。周羅睺自東萊泛海。趣平壤城。亦遭風船多飄沒。秋九月己丑。師還。死者什八九。高麗王元亦惶懼。遣使謝罪。上表稱遼東糞土臣元。上於是罷兵。待之如初。百濟王昌遣使奉表。請爲軍導。帝下詔諭以高麗服罪。朕已赦之。不可致伐。厚其使而遣之。高麗頗知其事。以兵侵掠其境。○辛卯。上至自仁壽宮。○冬十一月癸未。上祀南郊。○十二月。自京師至仁壽宮。置行宮十有二所。○南寧夷爨翫復反。蜀王秀奏。史萬歲受賂縱賊。致生邊患。上責萬歲。萬歲詆調。上怒。命斬之。高穎及左衛大將軍元旻等固請曰。萬歲雄略過人。將士樂爲致力。雖古名將。未能過也。上意少解。於是除名爲民。

十九年春正月癸酉。赦天下。○二月甲寅。上幸仁壽宮。○突厥突利可汗因長孫晟奏言。都藍可汗作攻具。欲攻大同城。詔以漢王諒爲元帥。尙書左僕射高穎出朔州道。右僕射楊素出靈州道。上柱國燕榮出幽州道。以擊都藍。皆取漢王節度。然漢王竟不臨戎。都藍聞之。與達頭可汗結盟。合兵掩襲突利。大戰長城下。突利大敗。都藍盡殺其兄弟子姪。遂度河入蔚州。突利部落散亡。夜與長孫晟以五騎南走。比旦。行百餘里。收得數百騎。突利與其下謀曰。今兵敗入朝。一降人耳。大隋天子豈禮我乎。玷厥雖來。本無寬隙。若往投之。必相存濟。晟知之。密遣使者入伏遠鎮。令速舉烽。突利見四烽俱發。以問晟。晟給之曰。城高地適。必遙見賊來。我國家法。若賊少舉二烽。來多舉三烽。大逼舉四烽。彼見賊多而又近耳。突利大懼。謂其

衆曰追兵已逼且可投城既入鎮晟留其達官執室領其衆自將突利馳驛入朝夏四月丁酉突利至長安帝大喜以晟爲左勳衛驃騎將軍持節護突厥上令突利與都藍使者因頭特勒相辨詰突利辭直上乃厚待之都藍弟郁速六棄其妻子與突利歸朝上嘉之使突利多遺之珍寶以慰其心高顯使上柱國趙仲卿將兵三千爲前鋒至族蠡山與突厥遇交戰七日大破之追奔至乞伏泊復破之虜千餘口雜畜萬計突厥復大舉而至仲卿爲方陳四面拒戰凡五日會高顯大兵至合擊之突厥敗走追度白道踰秦山七百餘里而還楊素軍與達頭遇先是諸將與突厥戰慮其騎兵奔突皆以戎車步騎相參設鹿角爲方陳騎在其內素曰此乃自固之道未足以取勝也於是悉除舊法令諸軍爲騎陳達頭聞之大喜曰天賜我也下馬仰天而拜帥騎兵十餘萬直前上儀同三司周羅暉曰賊陳未整請擊之帥精騎逆戰素以大兵繼之突厥大敗達頭被重創而遁殺傷不可勝計其衆號哭而去○六月丁酉以豫章王暕爲內史令○宜陽公王世積爲涼州總管其親信安定皇甫孝諧有罪吏捕之亡抵世積世積不納孝諧配防桂州因上變稱世積嘗令道人相其貴不道人答曰公當爲國主又將之涼州其所親謂世積曰河西天下精兵處可圖大事世積曰涼州土曠人希非用武之國世積坐誅拜孝諧上大將軍○獨孤后性妬忌後宮莫敢進御尉遲迴女孫有美色先沒宮中上於仁壽宮見而悅之因得幸后伺上聽朝陰殺之上由是大怒單騎從苑中出不由徑路入山谷間二十餘里高顯楊素等追及上扣馬苦諫上太息曰吾貴爲天子不得自由高顯曰陛下豈以一婦人而輕天下上意少解駐馬良久中夜方還宮后俟上於閣內及至后流涕拜謝顯素等和解之因置酒極歡先是后以高顯父之家客甚見親禮至是聞顯謂己爲一婦人遂銜之時太子失愛於上潛有廢立之志從容謂顯曰有神告晉王妃言王必有天下若之何顯長跪曰長幼有序其可廢乎獨孤后知顯不可奪陰欲去之

會上令選東宮衛士以入上臺顯奏稱若盡取疆者恐東宮宿衛太劣上作色曰我有時出入宿衛須得勇毅太子毓德春宮左右何須壯士此極弊法如我意者恆於交番之日分向東宮上下團伍不別豈非佳事我熟見前代公不須仍踵舊風顯子表仁娶太子女故上以此言防之顯夫人卒獨孤后言于上曰高僕射老矣而喪夫人陛下何能不爲之娶上以后言告顯顯流涕謝曰臣今已老退朝唯齋居讀佛經而已雖陛下垂哀之深至于納室非臣所願上乃止既而顯愛妾生男上聞之極喜后甚不悅上問其故后曰陛下尙復信高顯邪始陛下欲爲顯娶顯心存愛妾而欺陛下今其詐已見安得信之上由是疎顯伐遼之役顯固諫不從及師無功后言於上曰顯初不欲行陛下強遣之妾固知其無功矣又上以漢王年少專委軍事於顯顯以任寄隆重每懷至公無自疑之意諒所言多不用諒甚銜之及還泣言於后曰兒幸免高顯所殺上聞之彌不平及擊突厥出白道進圖入磧遣使請兵近臣緣此言顯欲反上未有所答顯已破突厥而還及王世積誅推覈之際有宮禁中事云於顯處得之上大驚有司又奏顯及左右衛大將軍元旻元胄竝與世積交通受其名馬之贈旻胄坐免官上柱國賀若弼吳州總管宇文弼刑部尙書薛胄民部尙書斛律孝卿兵部尙書柳述等明顯無罪上愈怒皆以屬吏自是朝臣無敢言者秋八月癸卯顯坐免上柱國左僕射以齊公就第未幾上幸秦王俊第召顯侍宴顯獻欸悲不自勝獨孤后亦對之泣上謂顯曰朕不負公公自負也因謂侍臣曰我於高顯勝於兒子雖或不見常似目前自其解落瞑然忘之如本無高顯入臣不可以身要君自云第一也頃之顯國令上顯陰事稱其子表仁謂顯曰司馬仲達初託疾不朝遂有天下公今遇此焉知非福於是上大怒囚顯於內史省而鞠之憲司復奏沙門真覺嘗謂顯云明年國有大喪尼令暉復云七十八年皇帝有大厄十九年不可過上聞而益怒顯謂羣臣曰帝王豈可力求孔子以大聖之才猶不得天下

頽與子言。自比晉帝。此何心乎。有司請斬之。上曰。去年殺虞慶則。今茲斬王世積。如更誅頽。天下其謂我何。於是除名爲民。頽初爲僕射。其母戒之曰。汝富貴已極。但有一斫頭耳。爾其慎之。頽由是常恐禍變。至是。頽歡然無恨色。先是。國子祭酒元善言於上曰。楊素麤疎。蘇威怯懦。元胄元晏。正似鴨耳。可以付社稷者。唯獨高頽。上初然之。及頽得罪。上深責之。善憂懼而卒。九月乙丑。以太常卿牛弘爲吏部尚書。弘選舉。先德行而後文才。務在審慎。雖致停緩。其所進用。竝多稱職。吏部侍郎高孝基。鑒賞機晤。清慎絕倫。然爽俊有餘。迹似輕薄。時宰多以此疑之。唯弘深識其真。推心任委。隋之選舉得人。於斯爲最。時論彌服。弘識度之遠。冬十月甲午。以突厥突利可汗爲意利珍豆啓民可汗。華言意智健也。突厥歸啓民者。男女萬餘口。上命長孫晟將五萬人於朔州築大利城以處之。時安義公主已卒。復使晟持節送宗女義成公主。以妻之。晟奏。染干部落歸者益衆。雖在長城之內。猶被雍虞閭抄掠。不得寧居。請徙五原。以河爲固。於夏勝兩州之間。東西至河。南北四百里。掘爲橫塹。令處其內。使得任情畜牧。上從之。又令上柱國趙仲卿屯兵二萬爲啓民防達頭。代州總管韓洪等將步騎一萬鎮恆安。達頭騎十萬來寇。韓洪軍大敗。仲卿自樂寧鎮邀擊。斬首千餘級。○帝遣越公楊素出靈州行軍總管韓僧壽出慶州。太平公史萬歲出燕州。大將軍武威姚辨出河州。以擊都藍。師未出塞。十二月乙未。都藍爲部下所殺。達頭自立爲步迦可汗。其國大亂。長孫晟言於上曰。今官軍臨境。戰數有功。虜內自攜離。其主被殺。乘此招撫。可以盡降。請遣染干部下分道招慰。上從之。降者甚衆。

資治通鑑卷第一百七十八

資治通鑑卷第一百七十九

隋紀三

高祖文皇帝中

開皇二十年春二月。熙州人李英林反。三月辛卯。以揚州總管司馬河內張衡爲行軍總管。帥步騎五萬討平之。○賀若弼復坐事下獄。上數之曰。公有三太猛。嫉妬心太猛。自是非人。心太猛。無上心太猛。既而釋之。它日上謂侍臣曰。弼將伐陳。謂高頽曰。陳叔寶可平也。不作高鳥盡。良弓藏。邪。頽云。必不然。及平陳。遽索內史。又索僕射。我語頽曰。功臣正宜授勳官。不可預朝政。弼後語頽。皇太子於己。出口入耳。無所不盡。公終久。何必不得弼力。何脈脈邪。意圖廣陵。又圖荊州。皆作亂之地。意終不改也。○夏四月壬戌。突厥達頭可汗犯塞。詔命晉王廣楊素出靈武道。漢王諒。史萬歲。出馬邑道。以擊之。長孫晟帥降人爲秦州行軍總管。受晉王節度。晟以突厥飲泉。易可行。毒。因取諸藥。毒水上流。突厥人畜飲之。多死。於是大驚曰。天雨惡水。其亡我乎。因夜遁。晟追之。斬首千餘級。史萬歲出塞至大斤山。與虜相遇。達頭遣使問隋將爲誰。候騎報。史萬歲也。突厥復問。得非敦煌戍卒乎。候騎曰。是也。達頭懼而引去。萬歲馳追百餘里。縱擊大破之。斬數千級。逐北入磧數百里。虜遠遁而還。詔長孫晟復還大利城。安撫新附。達頭復遣其弟子俟利伐從磧東攻啓民。上又發兵助啓民守要路。俟利伐退走入磧。啓民上表陳謝曰。大隋聖人可汗。憐養百姓。如天無不覆地。無不載。染干如枯木更葉。枯骨更肉。千世萬世。常爲大隋典羊馬也。帝又遣趙仲卿爲啓民築金河。定襄二城。○

秦孝王俊。久疾未能起。遣使奉表陳謝。上謂其使者曰。我戮力創茲大業。作訓垂範。庶臣下守之。汝爲吾子。而欲敗之。不知何以責汝。俊慙怖。疾遂篤。乃復拜俊上柱國。六月。丁丑。俊薨。上哭之。數聲而止。俊所爲侈麗之物。悉命焚之。王府僚佐。請立碑。上曰。欲求名。一卷史書足矣。何用碑爲。若子孫不能保家。徒與人作鎮石耳。俊子浩。崔妃所生也。庶子曰湛。羣臣希旨。奏漢之栗姬子榮。郭后子彊。皆隨母廢。今秦王二子。母皆有罪。不合承嗣。上從之。以秦國官爲喪主。○初。上使太子勇。參決軍國政事。時有損益。上皆納之。勇性寬厚。率意任情。無矯飾之行。上性節儉。勇嘗文飾蜀鎧。上見而不悅。戒之曰。自古帝王。未有好奢侈。而能久長者。汝爲儲后。當以儉約爲先。乃能奉承宗廟。吾昔日衣服。各留一物。時復觀之。以自警戒。恐汝以今日皇太子之心。忘昔時之事故。賜汝以我舊所帶刀一枚。并殭鬻一合。汝昔作上士時。常所食也。若存記前事。應知我心。後遇冬至。百官皆詣勇。勇張樂受賀。上知之。問朝臣曰。近聞至日。內外百官。相帥朝東宮。此何禮也。太常少卿辛亶對曰。於東宮。乃賀也。不得言朝。上曰。賀者。正可三數十人。隨情各去。何乃有司徵召。一時普集。太子法服設樂。以待之。可乎。因下詔曰。禮有等差。君臣不雜。皇太子。雖居上嗣。義兼臣子。而諸方岳。正冬朝賀。任土作貢。別上東宮。事非典則。宜悉停斷。自是。恩寵始衰。漸生猜阻。勇多內寵。昭訓雲氏。尤幸。其妃元氏。無寵遇。心疾。二日而薨。獨孤后。意有佗故。甚責望勇。自是。雲昭訓專內政。生長寧王儼。平原王裕。安成王筠。高良娣生安平王嶷。襄城王恪。王良媛生高陽王該。建安王韶。成姬生潁川王暉。後宮生孝實。孝範。后彌不平。頗遣人伺察。求勇過惡。晉王廣。彌自矯飾。唯與蕭妃居處。後庭有子。皆不育。后由是數稱廣賢。大臣用事者。廣皆傾心與交。上及后。每遣左右至廣所。無貴賤。廣必與蕭妃。迎門接引。爲設美饌。申以厚禮。婢僕往來者。無不稱其仁孝。上與后。嘗幸其第。廣悉屏匿美姬於別室。唯留老醜者。衣以縵綵。給事左右。屏帳。改用雜素。故絕樂器之

絃。不令拂去塵埃。上見之。以爲不好。聲色。還宮。以語侍臣。意甚喜。侍臣皆稱慶。由是愛之。特異諸子。上密令善相者來和。徧視諸子。對曰。晉王。眉上雙骨隆起。貴不可言。上又問上儀同三司韋鼎。我諸兒誰得嗣位。對曰。至尊皇后所最愛者。當與之。非臣敢預知也。上笑曰。卿不肯顯言邪。晉王廣。美姿儀。性敏慧。沈深嚴重。好學善屬文。敬接朝士。禮極卑屈。由是聲名籍甚。冠於諸王。廣爲揚州總管。入朝。將還鎮。入宮辭后。伏地流涕。后亦泫然泣下。廣曰。臣性識愚下。常守平生昆弟之意。不知何罪。失愛東宮。恆蓄盛怒。欲加屠陷。每恐讒譖。生於投杼。媿以夫婦禮待之。專寵阿雲。使有如許豚犬。前新婦遇毒而天。我亦不能窮治。何故復於汝。發如此意。我在尙爾。我死後當魚肉汝乎。每思東宮。竟無正嫡。至尊千秋萬歲之後。遣汝等兄弟。向阿雲兒。前再拜問訊。此是幾許苦痛邪。廣又拜。嗚咽不能止。后亦悲不自勝。自是。后決意欲廢勇立廣矣。廣與安州總管宇文述素善。欲述近己。奏爲壽州刺史。廣尤親任。總管司馬張衡。衡爲廣畫奪宗之策。廣問計於述。述曰。皇太子。失愛已久。令德不聞於天下。大王。仁孝著稱。才能蓋世。數經將領。頻有大功。主上之與內宮。咸所鍾愛。四海之望。實歸大王。然廢立者。國家大事。處人父子骨肉之間。誠未易謀也。然能移主上意者。唯楊素耳。素所與謀者。唯其弟約。述雅知約。請朝京師。與約相見。共圖之。廣大悅。多贖金寶。資述入關。約時爲大理少卿。素凡有所爲。皆先籌於約。而後行之。述請約盛陳器玩。與之酣暢。因而共博。每陽不勝。所贖金寶。盡輸之約。約所得既多。稍以謝述。述因曰。此晉王之賜。反經合義。亦達者之令圖。自驚曰。何爲爾。述因通廣意。說之曰。夫守正履道。固人臣之常致。反經合義。亦達者之令圖。自古賢人君子。莫不與時消息。以避禍患。公之兄弟。功名蓋世。當塗用事。有年矣。朝臣爲足下家所屈辱者。可勝數哉。又儲后以所欲不行。每切齒於執政。公雖自結於人主。而欲危公者。

固亦多矣。主上一旦奔羣臣，公亦何以取庇。今皇太子失愛於皇后，主上素有廢黜之心，此公所知也。今若請立晉王，在賢兄之口耳，誠能因此時建大功，王必永銘骨髓，斯則去累卵之危，成太山之安也。約然之，因以白素。素聞之大喜，撫掌曰：「吾之智思，殊不及此。」賴汝啓予，約知其計行，復謂素曰：「今皇后之言，上無不用，宜因機會，早自結託，則長保榮祿。」傳祚子孫，兄若遲疑，一旦有變，令太子用事，恐禍至無日矣。素從之。後數日，素入侍宴，微稱晉王孝悌恭儉，有類至尊，用此揣后意。后泣曰：「公言是也。吾兒大孝愛，每聞至尊，及我遣內使到，必迎於境首，言及違離，未嘗不泣。又其新婦，亦大可憐。我使婢去，常與之同寢共食，豈若睨地伐與阿雲對坐，終日酣宴，昵近小人，疑阻骨肉，我所以益憐阿嬈者，常恐其潛殺之。素既知后意，因盛言太子不才，后遂遺素金，使贊上廢立。勇頗知其謀，憂懼計無所出，使新豐人王輔賢造諸厭勝，又於後園作庶人村，室屋卑陋，勇時於中寢息，布衣草褥，冀以當之。上知勇不自安，在仁壽宮，使楊素觀勇所爲，素至東宮，偃息未入，勇束帶待之，素故久不進，以激怒勇，勇銜之，形於言色。素還，言勇怨望，恐有佗變，願深防察。上聞素譖毀，甚疑之，后又遣人伺覘東宮，纖介事皆聞奏，因加誣飾，以成其辜。上遂疎忌勇，乃於玄武門達至德門，量置候人，以伺動靜，皆隨事奏聞。又東宮宿衛之人，侍官以上名籍，悉令屬諸衛府，有勇健者，咸屏去之。出左衛率蘇孝慈爲浙州刺史，勇愈不悅。太史令袁充言於上曰：「臣觀天文，皇太子當廢，上曰：『玄象久見，羣臣不敢言耳。』充君正之子也。晉王廣，又令督王府軍事，姑臧段達私賂東宮幸臣姬威，令伺太子動靜，密告楊素。於是內外誣謗，過失日聞，段達因脅姬威曰：『東宮過失，主上皆知之矣，已奉密詔，定當廢立，君能告之，則大富貴。』威許諾，即上書告之。秋九月壬子，上至自仁壽宮，翌日御大興殿，謂侍臣曰：『我新還京師，應開懷歡樂，不知何意，翻邑然愁苦。』吏部尚書牛弘對曰：『臣等不稱職，故至尊憂勞。』上既數聞譖毀，疑朝臣悉知之，故於衆中發

問。冀聞太子之過，弘對既失旨，上因作色，謂東宮官屬曰：「仁壽宮，此去不遠，而令我每還京師，嚴備仗衛，如入敵國，我爲下利，不解衣臥，昨夜欲近廁，故在後房，恐有警急，還移就前殿，豈非爾輩欲壞我國家邪？於是執太子左庶子唐令則等數人，付所司訊鞫，命楊素、陳、東宮事狀，以告近臣。素乃顯言之曰：『臣奉勅向京，令皇太子檢校劉居士餘黨，太子奉詔，作色奮厲，骨肉飛騰，語臣云：『居士黨盡伏法，遣我何處窮討。』爾作右僕射，委寄不輕，自檢校之，何關我事？』又云：『昔大事不遂，我先被誅，今作天子，竟乃令我不如諸弟。』一事以上，不得自遂，因長歎回視云：『我大覺身妨，去音。』上曰：『此兒不堪承嗣久矣。』皇后恆勸我廢之，我以布衣時所生地復居，長望其漸改，隱忍至今。勇嘗指皇后侍兒，謂人曰：『是皆我物，此言幾許異事。』其婦初亡，我深疑其遇毒，嘗責之，勇即懟曰：『會殺元孝矩，此欲害我而遷怒耳。』長寧初生，朕與皇后共抱養之，自懷彼此，連遣來索，且雲定與女在外，私合而生，想此由來，何必是其體胤。昔晉太子取屠家女，其兒卽好屠割，今儻非類，便亂宗祏。我雖德慙堯舜，終不以萬姓付不肖子。我恆畏其加害，如防大敵，今欲廢之，以安天下。左衛大將軍五原公元旻諫曰：『廢立大事，詔旨若行，後悔無及，讒言罔極，惟陛下察之。』上不應，命姬威悉陳太子辜惡，威對曰：『太子由來與臣語，唯意在驕奢，且云：『若有諫者，正當斬之。』不殺百許人，自然永息。』營起臺殿，四時不輟，前蘇孝慈解左衛率，太子奮髯揚肘曰：『大丈夫，會當有一日，終不忘之。』決當快意。又宮內所須，尚書多執法，不與，輒怒曰：『僕射以下，吾會戮一二人，使知慢我之禍。』每云：『至尊惡我多側，庶高緯、陳叔寶、豈孽子乎？』嘗令師姥卜吉凶，語臣云：『至尊忌在十八年，此期促矣。』上泫然曰：『誰非父母生，乃至於此。』朕近覽齊書，見高歡縱其兒子，不勝忿憤，安可效尤邪？於是禁勇及諸子，部分收其黨與，楊素舞文巧詆，鍛鍊以成其獄，居數日，有司承素意奏，元旻常曲事於勇，情存附託，在仁壽宮，勇使所親裴弘以書與旻，題云：『勿令入見。』上曰：『朕在仁壽宮，有纖介

事東宮必知。疾於驛馬。怪之甚久。豈非此徒邪。遣武士執旻於仗。右衛大將軍元胄時當下直。不去。因奏曰。臣向不下直者。爲防元旻耳。上以旻及裴弘付獄。先是。勇見老枯槐。問此堪何用。或對曰。古槐尤宜取火。時衛士皆佩火燧。勇命工造數千枚。欲以分賜左右。至是。獲於庫。又藥藏局貯艾數斛。索得之。大以爲怪。以問姬威。威曰。太子此意。別有所在。至尊在仁壽宮。太子常飼馬千匹。云徑往守城門。自然餓死。素以威言詰勇。勇不服。曰。竊聞公家馬數萬匹。勇忝備太子馬千匹。乃是反乎。素又發東宮服玩。似加珮飾者。悉陳之於庭。以示文武羣臣。爲太子之鼻。上及皇后。迭遣使責問勇。勇不服。冬十月乙丑。上使人召勇。勇見使者。驚曰。得無殺我邪。上戎服陳兵。御武德殿。集百官。立于東面。諸親立于西面。引勇及諸子。列於殿庭。命內史侍郎薛道衡宣詔。廢勇及其男女。爲王公主者。勇再拜言曰。臣當伏尸都市。爲將來鑒戒。幸蒙哀憐。得全性命。言畢。泣下流襟。旻而舞蹈而去。左右莫不閤默。長寧王儼上表。乞宿衛。辭情哀切。上覽之。閱然。楊素進曰。伏望聖心。同於螿手。不宜復留意。己巳。詔元旻。唐令則及太子家令鄒文騰。左衛率司馬夏侯福。典膳監元淹。前吏部侍郎蕭子寶。前主璽下士何竦。竝處斬。妻妾子孫。皆沒官。車騎將軍榆林閻毗。東郡公崔君綽。游騎尉沈福寶。瀛州術士章仇太翼。特免死。各杖一百。身及妻子。資財田宅。皆沒官。副將作大匠高龍父。率更令晉文建。通直散騎侍郎元衡。皆處盡。於是集羣官于廣陽門外。宣詔戮之。乃移勇于內史省。給五品料食。賜楊素物三千段。元胄楊約。竝千段。賞鞠勇之功也。文林郎楊孝政。上書諫曰。皇太子。爲小人所誤。宜加訓誨。不宜廢黜。上怒。撻其胸。初。雲昭訓父定興。出入東宮。無節。數進奇服異器。以求悅媚。左庶子裴政屢諫。勇不聽。政謂定興曰。公所爲不合法度。又元妃暴薨。道路籍籍。此於太子。非令名也。公宜自引退。不然。將及禍。定興以告勇。勇益疎政。由是出爲襄州總管。唐令則爲勇所昵狎。每令以絃歌教內人。右庶子劉行本責之曰。庶子當輔太

子以正道。何有取媚於房帷之間哉。令則甚慙。而不能改。時沛國劉臻。平原明克讓。魏郡陸爽。竝以文學。爲勇所親。行本怒。其不能調護。每謂三人曰。卿等止解讀書耳。夏侯福嘗於閣內。與勇戲。福大笑。聲聞於外。行本聞之。待其出。數之曰。殿下寬容。賜汝顏色。汝何物小人。敢爲褻慢。因付執法者治之。數日。勇爲福致請。乃釋之。勇嘗得良馬。欲令行本乘。而觀之。行本正色曰。至尊置臣於庶子。欲令輔導殿下。非爲殿下作弄臣也。勇慙而止。及勇敗。二人已卒。上歎曰。向使裴政。劉行本在。勇不至此。勇嘗宴宮中。唐令則自彈琵琶。歌賦媚娘。洗馬李綱起白勇曰。令則身爲宮卿。職當調護。乃於廣坐。自比倡優。進淫聲。穢視聽。事若上聞。令則罪在不測。豈不爲殿下之累邪。臣請速治其罪。勇曰。我欲爲樂耳。君勿多事。綱遂趨出。及勇廢。上召東宮官屬。切責之。皆惶懼。無敢對者。綱獨曰。廢立大事。今文武大臣。皆知其不可。而莫肯發言。臣何敢畏死。不一爲陛下別白言之乎。太子性本中人。可與爲善。可與爲惡。曷使陛下擇正人輔之。足以嗣守鴻基。今乃以唐令則爲左庶子。鄒文騰爲家令。二人唯知以絃歌鷹犬娛悅太子。安得不至于邪。此乃陛下之過。非太子之罪也。因伏地流涕。嗚咽。上慘然良久曰。李綱責我。非爲無理。然徒知其一。未知其二。我擇汝爲宮臣。而勇不親任。雖更得正人。何益哉。對曰。臣所以不被親任者。良由姦人在側故也。陛下但斬令則。文騰更選賢才。以輔太子。安知臣之終見疎弃也。自古廢立冢嫡。鮮不傾危。願陛下深留聖思。無貽後悔。上不悅。罷朝。左右皆爲之股栗。會尙書右丞缺。有司請人。上指綱曰。此佳右丞也。卽用之。太平公史萬歲。還自大斤山。楊素害其功。言於上曰。突厥本降。初不爲寇。來塞上。畜牧耳。遂寢之。萬歲數抗表陳狀。上未之悟。上廢太子。方窮東宮黨與。上問萬歲所在。萬歲實在朝堂。楊素曰。萬歲謁東宮矣。以激怒上。上謂爲信然。令召萬歲。時所將將士。在朝堂。稱冤者數百人。萬歲謂之曰。吾今日爲汝極言於上。事當決矣。旣見上。言將士有功。爲朝廷所抑。詞氣憤厲。上大

怒令左右操殺之。既而追之不及。因下詔陳其罪狀。天下共冤惜之。十一月戊子。立晉王廣為皇太子。天下地震。太子請降章服。宮官不稱臣。十二月戊午。詔從之。以宇文述為左衛率。始太子謀奪宗也。洪州總管郭衍預焉。由是徵衍為左監門率。帝囚故太子勇於東宮。付太子廣掌之。勇自以廢非其罪。頻請見上申冤。而廣遏之。不得聞。勇於是升樹大叫。聲聞帝所。冀得引見。楊素因言。勇情志昏亂。為癩鬼所著。不可復收。帝以為然。卒不得見。初帝之克陳也。天下皆以為將太平。監察御史房彥謙私謂所親曰。主上忌刻而苛酷。太子卑弱。諸王擅權。天下雖安。方憂危亂。其子玄齡亦密言於彥謙曰。主上本無功德。以詐取天下。諸子皆驕奢不仁。必自相誅夷。今雖承平。其亡可翹足待。彥謙法壽之玄孫也。玄齡與杜杲之兄孫如晦皆預選。吏部侍郎高孝基名知人。見玄齡歎曰。僕閱人多矣。未見如此郎者。異日必為偉器。恨不見其大成耳。見如晦謂曰。君有應變之才。必任棟梁之重。俱以子孫託之。○帝晚年深信佛道鬼神。辛巳。始詔有毀佛及天尊嶽鎮海瀆神像者。以不道論。沙門毀佛像。道士毀天尊像者。以惡逆論。○是歲徵同州刺史蔡王智積入朝。智積帝之弟子也。性修謹。門無私謁。自奉簡素。帝甚憐之。智積有五男。止教讀論語。不令交通賓客。或問其故。智積曰。卿非知我者。其意蓋恐諸子有才能。以致禍也。○齊州行參軍章武王伽。送流囚李參等七十餘人。詣京師。行至滎陽。哀其辛苦。悉呼謂曰。卿輩自犯國刑。身嬰縲紲。固其職也。重勞援卒。豈不_レ愧心哉。參等辭謝。伽乃悉脫其枷鎖。停援卒。與約曰。某日當至京師。如致前卻。吾當為汝受死。遂捨之而去。流人感悅。如期而至。一無離叛。上聞而驚異。召見與語。稱善久之。於是悉召流人。令攜負妻子俱入。賜宴於殿庭而赦之。因下詔曰。凡在有生。含靈稟性。咸知善惡。竝識是非。若臨以至誠。明加勸導。則俗必從化。人皆遷善。往以海內亂離。德教廢絕。吏無慈愛之心。民懷奸詐之意。朕思遵聖法。以德化民。而伽深識朕意。誠心宣導。參等感寤。自赴憲司。明

是率土之人。非為難教。若使官盡王伽之儔。民皆李參之輩。刑厝不用。其何遠哉。乃擢伽為雍令。○太史令袁充表稱。隋興已後。晝日漸長。開皇元年。冬至之景長一丈二尺七寸二分。自爾漸短。至十七年。短於舊三寸七分。日去極近。則景短而日長。去極遠。則景長而日短。行內道。則去極近。行外道。則去極遠。謹按元命包曰。日月出內道。璇璣得其常。京房別對曰。太平日行上道。升平行次道。霸代行下道。伏惟大隋啓運。上感乾元。景短日長。振古希有。上臨朝。謂百官曰。景長之慶。天之祐也。今太子新立。當須改元。宜取日長之意。以為年號。是後百工作役。竝加程課。以日長故也。丁匠苦之。

仁壽元年春正月乙酉朔。赦天下。改元。○以尚書右僕射楊素為左僕射。納言蘇威為右僕射。○丁酉。徙河南王昭為晉王。○突厥步迦可汗犯塞。敗代州總管韓弘於恆安。○以晉王昭為內史令。○二月乙卯朔。日有食之。○夏五月己丑。突厥男女九萬口來降。○六月乙卯。遣十六使巡省風俗。○乙丑。詔以天下學校生徒多而不精。唯簡留國子學生七十人。太學四門及州縣學。竝廢。殿內將軍河間劉炫。上表切諫。不聽。秋七月。改國子學為太學。○初帝受周禪。恐民心未服。故多稱符瑞。以耀之。其偽造而獻者。不可勝計。冬十一月己丑。有事于南郊。如封禪禮。板文備述。前後符瑞。以報謝云。○山獠作亂。以衛尉少卿洛陽衛文昇為資州刺史。鎮撫之。文昇名玄。以字行。初到官。獠方攻大牢鎮。文昇單騎造其營。謂曰。我是刺史。銜天子詔。安養汝等。勿驚懼也。羣獠莫敢動。於是說以利害。渠帥感悅。解兵而去。前後歸附者十餘萬口。帝大悅。賜緡二千匹。壬辰。以文昇為遂州總管。○潮成等五州獠反。高州酋長馮盎馳詣京師。請討之。帝勅楊素與盎論賊形勢。素歎曰。不意蠻夷中有如是人。即遣盎發江嶺兵擊之。事平。除盎漢陽太守。○詔以楊素為雲州道行軍元帥。長孫晟為受降使者。挾啓民可汗北擊步迦。

二年春三月己亥上幸仁壽宮○突厥思力俟斤等南度河掠啓民男女六千口雜畜二十餘萬而去楊素帥諸軍追擊轉戰六十餘里大破之突厥北走素復進追夜及之恐其越逸令其騎稍後親引兩騎并降突厥二人與虜竝行虜不之覺候其頓舍未定趣後騎掩擊大破之悉得人畜以歸啓民自是突厥遠遁積南無復寇抄素以功進子玄感爵柱國賜玄縱爵淮南公○兵部尚書柳述慶之孫也尙蘭陵公主枯寵使氣自楊素之屬皆下之帝問符璽直長萬年韋雲起外間有不便事可言之述侍側雲起奏曰柳述驕豪未嘗經事兵機要重非其所堪徒以主婿遂居要職臣恐物議以爲陛下官不擇賢專私所愛斯亦不便之大者帝甚然其言顧謂述曰雲起之言汝藥石也可師友之秋七月丙戌詔內外官各舉所知柳述舉雲起除通事舍人益州總管蜀王秀容貌瓌偉有膽氣好武藝帝每謂獨孤后曰秀必以惡終我在當無慮至兄弟必反矣大將軍劉噲之討西爨也帝令上開府儀同三司楊武通將兵繼進秀以嬖人萬智光爲武通行軍司馬帝以秀任非其人譴責之因謂羣臣曰壞我法者子孫也譬如猛虎物不能害反爲毛間蟲所損食耳遂分秀所統自長史元巖卒後秀漸奢僭造渾天儀多捕山獠充宦者車馬被服擬於乘輿及太子勇以讒廢晉王廣爲太子秀意甚不平太子恐秀終爲後患陰令楊素求其罪而譖之上遂徵秀秀猶豫欲謝病不行總管司馬源師諫秀作色曰此自我家事何預卿也師垂涕對曰師忝參府幕敢不盡忠聖上有勅追王以淹時月今乃遷延未去百姓不識王心儻生異議內外疑駭發雷霆之詔降一介之使王何以自明願王熟計之朝廷恐秀生變戊子以原州總管獨孤楷爲益州總管馳傳代之楷至秀猶未肯行楷諷諭久之乃就路楷察秀有悔色因勒兵爲備秀行四十餘里將還襲楷覘知有備乃止○八月甲子皇后獨孤氏崩太子對上及宮人哀慟絕氣若不勝喪者其處私室飲食言笑如平常又每朝令進二溢米而私令取肥肉脯鮓置竹

筍中以蠟閉口衣襖裹而納之著作郎王劼上言佛說人應生天上及生無量壽國之時天佛放大光明以香花妓樂來迎伏惟大行皇后福善禎符備諸祕記皆云是妙善菩薩臣謹按八月二十二日仁壽宮內再雨金銀花二十三日大寶殿後夜有神光二十四日卯時永安宮北有自然種種音樂震滿虛空至夜五更奄然如寐遂卽升遐與經文所說事皆符驗上覽之悲喜九月丙戌上至自仁壽宮○冬十月癸丑以工部尚書楊達爲納言達雄之弟也○閏月甲申詔楊素蘇威與吏部尚書牛弘等修定五禮○上令上儀同三司蕭吉爲皇后擇葬地得吉處云卜年二千卜世二百上曰吉凶由人不在於地高緯葬父豈不卜哉俄而國亡正如我家墓田若云不吉朕不當爲天子若云不凶我弟不當戰沒然竟從吉言吉退告族人蕭平仲曰皇太子遣宇文左率深謝余云公前稱我當爲太子竟有其驗終不忘也今卜山陵務令我早立我立之後當以富貴相報吾語之云後四載太子御天下若太子得政隋其亡乎吾前給云卜年二千者十字也卜世二百者取世二傳也汝其識之壬寅葬文獻皇后於太陵詔以楊素經營葬事勤求吉地論素此心事極誠孝豈與夫平戎定寇比其功業可別封一子義康公邑萬戶并賜田三十頃絹萬段米萬石金珠綾錦稱是○蜀王秀至長安上見之不與語明日使使切讓之秀謝罪太子諸王流涕庭謝上曰頃者秦王糜費財物我以父道訓之今秀蠹害生民當以君道繩之於是付執法者開府儀同三司慶整諫曰庶人勇既廢秦王已薨陛下見子無多何至如是蜀王性甚耿介今被重責恐不自全上大怒欲斷其舌因謂羣臣曰當斬秀於市以謝百姓乃令楊素等推治之太子陰作偶人縛手釘心枷鎖桎械書上及漢王姓名仍云請西岳慈父聖母收楊堅楊諒神魂如此形狀勿令散蕩密埋之華山下楊素發之又云秀妄述圖讖稱京師妖異造蜀地徵神并作檄文云指期問罪置秀集中俱以聞奏上曰天下寧有是邪十二月癸巳廢秀爲庶人幽之內

侍省不聽與妻子相見。唯獠婢二人驅使。連坐者百餘人。秀上表推謝曰：伏願慈恩賜垂矜愍。殘息未盡之間。希與瓜子相見。請賜一穴。令骸骨有所。瓜子其愛子也。上因下詔。數其十罪。且曰：我不知楊堅。楊諒是汝何親。後乃聽與其子同處。初楊素嘗以少譴。勅送南臺。命治書侍御史柳或治之。素恃貴。坐或牀。或從外來。於階下。端笏整容。謂素曰：奉勅治公之罪。素遽下。或據案而坐。立素於庭。辨詰事狀。素由是銜之。蜀王秀嘗從或。求李文博所撰治道集。或與之。秀遣或奴婢十口。及秀得罪。素奏。或以內臣交通諸侯。除名爲民。配戍懷遠鎮。帝使司農卿趙仲卿往益州。窮按秀事。秀之賓客經過之處。仲卿必深文致法。州縣長吏坐者太半。上以爲能。賞賜甚厚。久之。貝州長史裴肅遣使上書稱。高穎以天挺良才。元勛佐命。爲衆所疾。以至廢棄。願陛下錄其大功。忘其小過。又二庶人。得臯已久。寧無革心。願陛下弘君父之慈。顧天性之義。各封小國。觀其所爲。若能遷善。漸更增益。如或不悛。貶削非晚。今者自新之路永絕。愧悔之心莫見。豈不哀哉。書奏。上謂楊素曰：裴肅愛我家事。此亦至誠也。於是徵肅入朝。太子聞之。謂左庶子張衡曰：使勇自新。欲何爲也。衡曰：觀肅之意。欲令如吳太伯。漢東海王耳。肅至。上面諭以勇不可復收之意。而罷遣之。肅俠之子也。楊素弟約。及從父文思。文紀。族父忌。竝爲尙書列卿。諸子無汗馬之勞。位至柱國刺史。廣營資產。自京師及諸方都會處。邸店碾磴。便利田宅。不可勝數。家僮千數。後庭妓妾。曳綺羅者以千數。第宅華侈。制擬宮禁。親故吏。布列清顯。既廢一太子。及一王。威權愈盛。朝臣有違忤者。或至誅夷。有附會及親戚。雖無才用。必加進擢。朝廷靡然。莫不畏附。敢與素抗而不撓者。獨柳或。及尙書右丞李綱。大理卿梁毗而已。始毗爲西寧州刺史。凡十一年。蠻夷酋長。皆以金多者爲豪雋。遞相攻奪。略無寧歲。毗患之。後因諸酋長相帥以金遺毗。毗置金坐側。對之慟哭。而謂之曰：此物饑不可食。寒不可衣。汝等以此相滅。不可勝數。今將此來欲殺我邪。一無所納。於是蠻夷感悟。

遂不相攻擊。上聞而善之。徵爲大理卿。處法平允。毗見楊素專權。恐爲國患。乃上封事曰：臣聞臣無有作威作福。其害于而家。凶于而國。竊見左僕射。越國公素。幸遇愈重。權執日隆。搢紳之徒。屬其視聽。忤旨者嚴霜夏零。阿旨者甘雨冬澍。榮枯由其唇吻。廢興候其指麾。所私皆非忠讜。所進咸是親戚。子弟布列。兼州連縣。天下無事。容息異圖。四海有虞。必爲禍始。夫姦臣擅命。有漸而來。王莽資之於積年。桓玄基之於易世。而卒殄漢祀。終傾晉祚。陛下若以素爲阿衡。臣恐其心未必伊尹也。伏願揆鑒古今。量爲處置。俾洪基永固。率土幸甚。書奏。上大怒。收毗繫獄。親詰之。毗極言素擅寵弄權。將領之處。殺戮無道。又太子蜀王。罪廢之日。百僚無不震竦。唯素揚眉奮肘。喜見容色。利國家有事。以爲身幸。上無以屈。乃釋之。其後。上亦寢疎忌素。乃下勅曰：僕射國之宰輔。不可躬親細務。但三五日。一向省。評論大事。外示優崇。實奪之權也。素由是終仁壽之末。不復通判省事。出楊約爲伊州刺史。素既被疎。吏部尙書柳述。益用事。攝兵部尙書。參掌機密。素由是惡之。太子問於賀若弼曰：楊素。韓擒虎。史萬歲。皆稱良將。其優劣何如。弼曰：楊素。猛將。非謀將。韓擒虎。鬪將。非領將。史萬歲。騎將。非大將。太子曰：然則大將誰也。弼曰：唯殿下所擇。弼意自許也。○交州。俚帥李佛子。作亂。據越王故城。遣其兄子大權。據龍編城。其別帥李普鼎。據烏延城。楊素薦瓜州刺史長安劉方。有將帥之略。詔以方爲交州道行軍總管。統二十七營而進。方軍令嚴肅。有犯必斬。然仁愛士卒。有疾病者。親臨撫養。士卒亦以此懷之。至都隆嶺。遇賊擊破之。進軍臨佛子營。先諭以禍福。佛子懼。請降。送之長安。

三年秋八月壬申。賜幽州總管燕榮死。榮性嚴酷。鞭撻左右。動至千數。嘗見道次叢荊。以爲堪作杖。命取之。輒以試人。人或自陳無罪。榮曰：後有罪。當免汝。既而有犯。將杖之。人曰：前日被杖。使君許。以有罪宥之。榮曰：無罪尙爾。況有罪邪。杖之自若。觀州長史元弘嗣。遷幽州長

史懼爲榮所辱。固辭。上勅榮曰：弘嗣杖十已上罪，皆須奏聞。榮忿曰：豎子何敢玩我！於是遣弘嗣監納倉粟，廳得一糠一秕，皆罰之。每笞雖不滿十，然一日之中，或至三數。如是歷年，怨隙日構。榮遂收弘嗣付獄，禁絕其糧。弘嗣抽絮雜水咽之。其妻詣闕稱冤。上遣使案驗。奏：榮暴虐，賊穢狼籍，徵還賜死。元弘嗣代榮爲政，酷又甚之。○九月壬戌，置常平官。○是歲，龍門王通詣闕獻太平十二策。上不能用。罷歸。通遂教授於河汾之間。弟子自遠至者甚衆。累徵不起。楊素甚重之，勸之仕。通曰：通有先人之敝廬，足以蔽風雨。薄田足以具糗粥。讀書談道，足以自樂。願明公正身以治天下。時和歲豐，通也受賜多矣，不願仕也。或諧通於素曰：彼實慢公，公何敬焉。素以問通。通曰：使公可慢，則僕得矣。不可慢，則僕失矣。得失在僕，公何預焉。素待之如初。弟子賈瓊問：息謗，通曰：無辨，問止怨。曰：不爭，通嘗稱無赦之國，其刑必平。重斂之國，其財必削。又曰：聞謗而怒者，讒之囿也。見譽而喜者，佞之媒也。絕囿去媒，讒佞遠矣。大業末，卒于家。門人謚曰文中子。○突厥步迦可汗所部大亂，鐵勒僕骨等十餘部皆叛。步迦降於啓民，步迦衆潰。西奔吐谷渾。長孫晟送啓民置磧口。啓民於是盡有步迦之衆。

資治通鑑卷第一百七十九

資治通鑑卷第一百八十

隋紀四

高祖文皇帝下

仁壽四年春正月丙午，赦天下。○帝將避暑於仁壽宮，術士章仇太翼固諫，不聽。太翼曰：是行恐變輿，不返。帝大怒，繫之長安獄，期還而斬之。甲子，幸仁壽宮。乙丑，詔賞賜支度事無巨細，竝付皇太子。夏四月乙卯，帝不豫。六月庚申，赦天下。秋七月甲辰，上疾甚，臥與百僚辭訣，竝握手獻款。命太子赦章仇太翼，丁未，崩於大寶殿。高祖性嚴重，令行禁止，每旦聽朝，日昃忘倦。雖嗇於財，至於賞賜有功，卽無所愛。將士戰沒，必加優賞。仍遣使者勞問其家，愛養百姓。勸課農桑，輕徭薄賦。其自奉養務爲儉素，乘輿御物，故弊者隨宜補用，自非享宴，所食不過一肉。後宮皆服澣濯之衣，天下化之。開皇仁壽之間，丈夫率衣絹布，不服綾綺，裝帶不過銅鐵骨角，無金玉之飾。故衣食滋殖，倉庫盈溢。受禪之初，民戶不滿四百萬。末年，踰八百九十萬。獨冀州已一百萬戶。然猜忌苛察，信受讒言，功臣故舊，無始終保全者。乃至子弟，皆如仇敵。此其所短也。初，文獻皇后既崩，宣華夫人陳氏、容華夫人蔡氏，皆有寵。陳氏，陳高宗之女。蔡氏，丹楊之人也。上寢疾於仁壽宮，尙書左僕射楊素、兵部尙書柳述、黃門侍郎元巖，皆入閣侍疾。召皇太子入居大寶殿，太子慮上有不諱，須預防擬，手自爲書，封出問素。素條錄事狀以報。太子宮人誤送上所，上覽而大恚。陳夫人平旦出更衣，爲太子所逼，拒之得免。歸於上所，上怪其神色有異，問其故。夫人泣然曰：太子無禮，上恚抵床曰：畜生何足付大事！獨孤

誤我。乃呼柳述元巖曰。召我兒。述等將呼太子。上曰。勇也。述巖出。因爲勅書。楊素聞之。以白太子。矯詔。執述巖。繫大理獄。追東宮兵士。帖上臺宿衛。門禁出入。竝取宇文述。郭衍節度。令右庶子張衡入寢殿侍疾。盡遣後宮出。就別室。俄而上崩。故中外頗有異論。陳夫人與後宮。聞變。相顧戰栗失色。晡後。太子遣使者齎小金合帖紙於際。親署封字。以賜夫人。夫人見之。惶懼。以爲鳩毒。不敢發。使者促之。乃發。合中有同心結數枚。宮人咸悅。相謂曰。得免死矣。陳氏恚而却坐。不肯致謝。諸宮人共逼之。乃拜使者。其夜。太子蒸焉。乙卯。發喪。太子卽皇帝位。會伊州刺史楊約來朝。太子遣約入長安。易留守者。矯稱高祖之詔。賜故太子勇死。縊殺之。然後陳兵集衆。發高祖凶問。煬帝聞之。曰。令兄之弟。果堪大任。追封勇爲房陵王。不爲置嗣。八月丁卯。梓宮至自仁壽宮。丙子。殯于大興前殿。柳述元巖竝除名。述徙龍川。巖徙南海。帝令蘭陵公主與述離絕。欲改嫁之。公主以死自誓。不復朝謁。上表請與述同徙。帝大怒。公主憂憤而卒。臨終上表請葬於柳氏。帝愈怒。竟不哭。葬送甚薄。○太史令袁充奏言。皇帝卽位。與堯受命年合。諷百官表賀。禮部侍郎許善心議。以爲國哀甫爾。不宜稱賀。左衛大將軍宇文述。素惡善心。諷御史劾之。左遷給事郎。降品二等。○漢王諒有寵於高祖。爲并州總管。自山以東。至于滄海。南距黃河。五十二州。皆隸焉。特許以便宜從事。不拘律令。諒自以所居天下精兵處。見太子勇以讒廢。居常怏怏。及蜀王秀得罪。尤不自安。陰蓄異圖。言於高祖。以突厥方疆宜修武備。於是。大發工役。繕治器械。招集亡命。左右私人。殆將數萬。突厥嘗寇邊。高祖使諒禦之。爲突厥所敗。其所領將帥。坐除解者八十餘人。皆配防嶺表。諒以其宿舊。奏請留之。高祖怒曰。爾爲藩王。惟當敬依朝命。何得私論宿舊。廢國家憲法邪。嗟乎小子。爾一旦無我。或欲妄動。彼取爾。如籠內雞雛耳。何用腹心爲。王頊者。僧辯之子。儻好奇略。爲諒諮議參軍。蕭摩訶。陳氏舊將。二人俱不得志。每鬱鬱思亂。皆爲諒所親善。贊成其陰謀。曾熒惑

守東井。儀曹鄴人傅奕。曉星曆。諒問之曰。是何祥也。對曰。天上東井。黃道所經。熒惑過之。乃其常理。若入地上井。則可怪耳。諒不悅。及高祖崩。煬帝遣車騎將軍屈突通。以高祖璽書徵之。先是。高祖與諒密約。若璽書召汝。勅字傍別加一點。又與玉麟符合者。當就徵。及發書。無驗。諒知有變。詰通。通占對不屬。乃遣歸長安。諒遂發兵反。總管司馬安定皇甫誕。切諫。諒不納。誕流涕曰。竊料大王兵資。非京師之敵。加以君臣位定。逆順勢殊。士馬雖精。難以取勝。一旦陷身叛逆。往於刑書。雖欲爲布衣。不可得也。諒怒囚之。嵐州刺史喬鍾葵。將赴諒。其司馬京兆陶模。拒之曰。漢王所圖不軌。公荷國厚恩。當竭誠効命。豈得身爲厲階乎。鍾葵失色曰。司馬反邪。臨之以兵。辭氣不撓。鍾葵義而釋之。軍吏曰。若不斬模。無以壓衆心。乃囚之。於是從諒反者。凡十九州。王頊說諒曰。王所部將吏。家屬盡在關西。若用此等。則宜長驅深入。直據京都。所謂疾雷不及掩耳。若但欲割據舊齊之地。宜任東人。諒不能決。乃兼用二策。唱言。楊素反。將誅之。總管府兵曹聞喜。裴文安。說諒曰。井陘以西。在王掌握之內。山東士馬。亦爲我有。宜悉發之。分遣羸兵。屯守要害。仍命隨方略地。帥其精銳。直入蒲津。文安請爲前鋒。王以大軍繼後。風行雷擊。頓於霸上。咸陽以東。可指麾而定。京師震擾。兵不暇集。上下相疑。羣情離駭。我陳兵號令。誰敢不從。旬日之間。事可定矣。諒大悅。於是遣所署大將軍余公理。出大谷。趣河陽。大將軍綦良。出滏口。趣黎陽。大將軍劉建。出井陘。略燕趙。柱國喬鍾葵。出鴈門。署文安爲柱國。與柱國紇單貴。王聃等。直指京師。帝以右武衛將軍洛陽丘和。爲蒲州刺史。鎮蒲津。諒選精銳數百騎。戴罽羅。詐稱諒宮人。還長安。門司弗覺。徑入蒲州。城中豪傑。亦有應之者。丘和覺其變。踰城逃歸長安。蒲州長史勃海高義明。司馬北平榮毗。皆爲反者所執。裴文安等。未至蒲津。百餘里。諒忽改圖。令紇單貴。斷河橋。守蒲州。而召文安還。文安至。謂諒曰。兵機詭速。本欲出其不意。王旣不行。文安又返。使彼計成。大事去矣。諒不對。以王聃爲蒲

州刺史裴文安爲晉州刺史。薛粹爲絳州刺史。梁菩薩爲潞州刺史。韋道正爲韓州刺史。張伯英爲澤州刺史。代州總管天水李景發兵拒諒。諒遣其將劉曷襲景。景擊斬之。諒復遣喬鍾葵帥勁勇三萬攻之。景戰士不過數千。加以城池不固。爲鍾葵所攻。崩毀相繼。景且戰且築。士卒皆殊死鬪。鍾葵屢敗。司馬馮孝慈。司法呂玉。竝驍勇善戰。儀同三司侯莫陳乂。多謀畫。工拒守之術。景知三人可用。推誠任之。己無所關預。唯在閤持重。時撫循而已。楊素將輕騎五千襲王聃。紇單貴於蒲州。夜至河際。收商賈船得數百艘。船內多置草。踐之無聲。遂銜枚而濟。遲明擊之。紇單貴敗走。聃懼以城降。有詔徵素還。初素將行。計日破賊。皆如所量。於是素爲并州道行軍總管。河北道安撫大使。帥衆數萬以討諒。諒之初起兵也。妃兄豆盧毓爲府主簿。苦諫不從。私謂其弟懿曰。吾匹馬歸朝。自得免禍。此乃身計。非爲國也。不若且僞從之。徐伺其便。毓勸之子也。毓兄顯州刺史賢言於帝曰。臣弟毓素懷志節。必不從亂。但逼兇威。不能自遂。臣請從軍。與毓爲表裏。諒不足圖也。帝許之。賢密遣家人齎勅書至毓所。與之計議。諒出城將往介州。令毓與總管屬朱濤留守。毓謂濤曰。漢王構逆。敗不旋踵。吾屬豈可坐受夷滅。孤負國家。邪當與卿出兵拒之。濤驚曰。王以大事相付。何得有此語。因拂衣而去。毓追斬之。出皇甫誕於獄。與之協計。及開府儀同三司宿勤武等閉城拒諒。部分未定。有人告諒。諒襲擊之。毓見諒至。給其衆曰。此賊軍也。諒攻城南門。稽胡守南城。不識諒射之。矢下如雨。諒移攻西門。守兵識諒。即開門納之。毓誕皆死。蔡良攻慈州刺史上官政。不克。引兵攻行相州事薛胄。又不克。遂自滏口攻黎州。塞白馬津。余公理自太行下河內。帝以右衛將軍史祥爲行軍總管。軍於河陰。祥謂軍吏曰。余公理輕而無謀。恃衆而驕。不足破也。公理屯河陽。祥具舟南岸。公理聚兵當之。祥簡精銳於下流潛濟。公理聞之。引兵拒之。戰於須水。公理未成列。祥擊之。公理大敗。祥東趨黎陽。蔡良軍不戰而潰。祥寧之子也。帝將發幽州兵。

疑幽州總管竇抗有貳心。問可使抗者於素。素薦前江州刺史勃海李子雄。授上大將軍。拜廣州刺史。又以左領軍將軍長孫晟爲相州刺史。發山東兵與李子雄共經略之。晟辭以男行布在諒所部。帝曰。公國體之深。終不以兒害義。朕今相委。公其勿辭。李子雄馳至幽州。止傳舍。召募得千餘人。抗來詣子雄。子雄伏甲擒之。抗榮定之子也。子雄遂發幽州兵。步騎三萬。自井陘西擊諒。時劉建圍戍將京兆張祥於井陘。子雄破建於抱犢山下。建遁去。李景被圍月餘。詔朔州刺史代人楊義臣救之。義臣帥馬步二萬。夜出西陘。喬鍾葵悉衆拒之。義臣自以兵少。悉取軍中牛驢。得數千頭。復令兵數百人。人持一鼓。潛驅之。匿於澗谷間。晡後。義臣復與鍾葵戰。兵初合。命驅牛驢者疾進。一時鳴鼓。塵埃漲天。鍾葵軍不知。以爲伏兵發。因而奔潰。義臣縱擊。大破之。晉絳呂三州皆爲諒城守。楊素各以二千人縻之而去。諒遣其將趙子開擁衆十餘萬。柵絕徑路。屯據高壁。布陳五十里。素令諸將以兵臨之。自引奇兵潛入霍山。緣崖谷而進。素營於谷口。自坐營外。使軍司入營。簡留三百人守營。軍士憚北兵之彊。不欲出戰。多願守營。因爾致遲。素責所由。軍司具對。素即召所留三百人出營。悉斬之。更令簡留人。皆無願留者。素乃引軍馳進。出北軍之北。直指其營。鳴鼓縱火。北軍不知所爲。自相蹂踐。殺傷數萬。諒所署介州刺史梁脩羅。屯介休。聞素至。棄城走。諒聞趙子開敗。大懼。自將衆且十萬。拒素於蒿澤。會大雨。諒欲引軍還。王頰諫曰。楊素懸軍深入。士馬疲弊。王以銳卒自將擊之。其勢必克。今望敵而退。示人以怯。沮戰士之心。益西軍之氣。願王勿還。諒不從。退守清源。王頰謂其子曰。氣候殊不佳。兵必敗。汝可隨我。楊素進擊諒。大破之。擒蕭摩訶。諒退保晉陽。素進兵圍之。諒窮蹙請降。餘黨悉平。帝遣楊約齎手詔勞素。王頰將奔突厥。至山中。徑路斷絕。知必不免。謂其子曰。吾之計數。不減楊素。但坐言不見從。遂至於此。不能坐受擒獲。以成豎子名。吾死之後。汝慎勿過親故。於是自殺。瘞之石窟中。其子數日不得食。遂過。

其故人竟爲所擒并獲頰尸鼻於晉陽羣臣奏漢王諒當死帝不許除名爲民絕其屬籍竟以幽死諒所部吏民坐諒死徙者二十餘萬家初高祖與獨孤后甚相愛重誓無異生之子嘗謂羣臣曰前世天子溺於嬖幸嫡庶分爭遂有廢立或至亡國朕旁無姬侍五子同母可謂真兄弟也豈有此憂邪帝又懲周室諸王微弱故使諸子分據大鎮專制方面權侔帝室及其晚節父子兄弟迭相猜忌五子皆不以壽終

臣光曰昔辛伯諗周桓公曰內寵竝后外寵貳政嬖子配嫡大都偶國亂之本也人主誠能慎此四者亂何自生哉隋高祖徒知嫡庶之多爭孤弱之易搖曾不知勢鈞位逼雖同產至親不能無相傾奪考諸辛伯之言得其一而失其三乎

冬十月己卯葬文帝於太陵廟號高祖與文獻皇后同墳異穴○詔除婦人及奴婢部曲之課男子二十二成丁○章仇太翼言於帝曰陛下西命雍州爲破木之衝不可久居又讖云脩治洛陽還晉家帝深以爲然十一月乙未幸洛陽留晉王昭守長安楊素以功拜其子萬石仁行姪玄挺爲儀同三司賚物五萬段綺羅千匹諒妓妾二十人○丙申發丁男數十萬掘塹自龍門東接長平汲郡抵臨清關度河至浚儀襄城達於上洛以置關防○壬子陳叔寶卒贈大將軍長城縣公諡曰煬○蜀王秀之得罪也右衛大將軍元胄坐與交通除名久不得調時慈州刺史上官政坐事徙嶺南將軍丘和以蒲州失守除名胄與和有舊酒酣謂和曰上官政壯士也今徙嶺南得無大事乎因自拊腹曰若是公者不徒然矣和奏之胄竟坐死於是徵政爲驍衛將軍以和爲代州刺史

煬皇帝上之上

大業元年春正月壬辰朔赦天下改元○立妃蕭氏爲皇后○廢諸州總管府○丙辰立晉

王昭爲皇太子○高祖之末羣臣有言林邑多奇寶者時天下無事劉方新平交州乃授方驩州道行軍總管經略林邑方遣欽州刺史寧長真等以步騎萬餘出越裳方親帥大將軍長孫等以舟師出比景是月軍至海口○二月戊辰勅有司大陳金寶器物錦綵車馬引楊素及諸將討漢王諒有功者立於前使奇章公牛弘宣詔稱揚功伐賜賚各有差素等再拜舞蹈而出己卯以素爲尙書令○詔天下公除惟帝服淺色黃衫鐵裝帶○三月丁未詔楊素與納言楊達將作大匠宇文愷營建東京○每月役丁二百萬人徙洛州郭內居民及諸州富商大賈數萬戶以實之廢二嶠道開墓冊道○戊申詔曰聽探輿頌謀及庶民故能審刑政之得失今將巡歷淮海觀省風俗○勅宇文愷與內史舍人封德彝等營顯仁宮南接阜澗北跨洛濱發大江之南五嶺以北奇材異石輸之洛陽又求海內嘉木異草珍禽奇獸以實園苑辛亥命尙書右丞皇甫謐發河南淮北諸郡民前後百餘萬開通濟渠自西苑引穀洛水達于河復自板渚引河歷滎澤入汴又自大梁之東引汴水入泗達于淮又發淮南民十餘萬開邗溝自山陽至揚子入江渠廣四十步渠旁皆築御道樹以柳自長安至江都置離宮四十餘所庚申遣黃門侍郎王弘等往江南造龍舟及雜船數萬艘東京官吏督役嚴急役丁死者什四五所司以車載死丁東至城阜北至河陽相望於道又作天經宮於東京四時祭高祖○林邑王梵志遣兵守險劉方擊走之師度閩黎江林邑兵乘巨象四面而至方戰不利乃多掘小坑草覆其上以兵挑之既戰僞北林邑逐之象多陷地顛躓轉相驚駭軍遂亂方以弩射象象却走蹂其陳因以銳師繼之林邑大敗俘馘萬計方引兵追之屢戰皆捷過馬援銅柱南八日至其國都夏四月梵志棄城走入海方入城獲其廟主十八皆鑄金爲之刻石紀功而還士卒腫足死者什四五方亦得疾卒於道初尙書右丞李綱數以異議忤楊素及蘇威素薦綱於高祖以爲方行軍司馬方承素意屈辱之幾死軍還久不得

調威復遣綱詣南海。應接林邑。久而不召。綱自歸奏事。威劾奏綱擅離所職。下吏按問。會赦免官。屏居於鄂。○五月。築西苑。周二百里。其內爲海。周十餘里。爲蓬萊。方丈。瀛洲。諸山。高出水百餘尺。臺觀殿閣。羅絡山上。向背如神。北有龍鱗渠。縈紆注海內。緣渠作十六院。門皆臨渠。每院以四品夫人主之。堂殿樓觀。窮極華麗。宮樹秋冬彫落。則剪綵爲華葉。綴於枝條。色淪則易以新者。常如陽春。沼內亦剪綵爲荷芰菱芡。乘輿遊幸。則去冰而布之。十六院競以殺羞精麗。相高。求市恩寵。上好以月夜從宮女數千。騎遊西苑。作清夜遊曲。於馬上奏之。○帝待諸王恩薄。多所猜忌。滕王綸。衛王集。內自憂懼。呼術者。問吉凶。及章醮求福。或告其怨望。呪詛。有司奏請誅之。秋七月丙午。詔除名爲民。徙邊郡。綸。瓚之子。集。爽之子也。○八月壬寅。上行幸江都。發顯仁宮。王弘遣龍舟奉迎。乙巳。上御小朱航。自漕渠出洛口。御龍舟。龍舟四重。高四十五尺。長二百丈。上重有正殿。內殿。東西朝堂。中二重。有百二十房。皆飾以金玉。下重。內侍處之。皇后乘翔螭舟。制度差小。而裝飾無異。別有浮景九艘。三重。皆水殿也。又有漾彩。朱鳥。蒼螭。白虎。玄武。飛羽。青鳧。陵波。五樓。道場。玄壇。板翰。黃篋。等數千艘。後宮諸王。公主。百官。僧尼。道士。蕃客。乘之。及載內外百司供奉之物。共用挽船士八萬餘人。其挽漾彩以上者。九千餘人。謂之殿腳。皆以錦綵爲袍。又有平乘。青龍。鸞。舳。舻。八櫂。艇。舸。等數千艘。竝十二衛兵乘之。并載兵器帳幕。兵士自引。不給夫。舳。舻。相接。二百餘里。照耀川陸。騎兵翊兩岸而行。旌旗蔽野。所過州縣。五百里內。皆令獻食。多者一州。至百輦。極水陸珍奇。後宮厭飫。將發之際。多棄埋之。○契丹寇營州。詔通事謁者韋雲起。護突厥兵討之。啓民可汗發騎二萬。受其處分。雲起分爲二十營。四道俱引。營相去一里。不得交雜。聞鼓聲而行。聞角聲而止。自非公使。勿得走馬。三令五申。擊鼓而發。有紇干犯約。斬之。持首以徇。於是突厥將帥入謁。皆膝行股栗。莫敢仰視。契丹本事突厥。情無猜忌。雲起既入其境。使突厥詐云。向柳城。與高麗

交易。敢漏泄事實者。斬。契丹不爲備。去其營五十里。馳進襲之。盡獲其男女四萬口。殺其男子。以女子及畜產之半。賜突厥。餘皆收之以歸。帝大喜。集百官曰。雲起用突厥平契丹。才兼文武。朕今自舉之。擢爲治書侍御史。○初。西突厥阿波可汗。爲葉護可汗所虜。國人立軼素特勒之子。是爲泥利可汗。泥利卒。子達漫立。號處羅可汗。其母向氏。本中國人。更嫁泥利之弟。婆實特勒。開皇末。婆實與向氏入朝。遇達頭之亂。遂留長安。舍於鴻臚寺。處羅多居烏孫故地。撫御失道。國人多叛。復爲鐵勒所困。鐵勒者。匈奴之遺種。族類最多。有僕骨。同羅。契苾。薛延陀等部。其酋長。皆號俟斤。族姓雖殊。通謂之鐵勒。大抵與突厥同俗。以寇抄爲生。無大君長。分屬東西兩突厥。是歲。處羅引兵擊鐵勒諸部。厚稅其物。又猜忌薛延陀。恐其爲變。集其酋長數百人。盡殺之。於是鐵勒皆叛。立俟利發。俟斤契苾歌楞。爲莫何可汗。又立薛延陀。俟斤字也。啞。爲小可汗。與處羅戰。屢破之。莫何勇毅絕倫。甚得衆心。爲鄰國所憚。伊吾。高昌。焉耆。皆附之。

二年春正月辛酉。東京成。進將作大匠宇文愷。位開府儀同三司。○丁卯。遣十使。併省州縣。○二月丙戌。詔吏部尚書牛弘等。議定輿服儀衛制度。以開府儀同三司何稠。爲太府少卿。使之營造。送江都。稠智思精巧。博覽圖籍。參會古今。多所損益。袞冕畫日月星辰。皮弁用漆。紗爲之。又作黃麾。三萬六千人仗。及輅輦車輿。皇后鹵簿。百官儀服。務爲華盛。以稱上意。課州縣送羽毛。民求捕之。網羅被水陸。禽獸有堪髦毳之用者。殆無遺類。烏程有高樹。踰百尺。旁無附枝。上有鶴巢。民欲取之。不可上。乃伐其根。鶴恐殺其子。自拔髦毛。投於地。時人或稱以爲瑞。曰。天子造羽儀。鳥獸自獻羽毛。所役工十萬餘人。用金銀錢帛鉅億計。帝每出遊幸。羽儀填街溢路。互二十餘里。三月庚午。上發江都。夏四月庚戌。自伊闕。陳。法。駕。備千乘萬騎。入東京。辛亥。御端門。大赦。免天下今年租賦。制五品已上。文官乘車。在朝弁服。佩玉。武官馬

加珂戴幘服袴褶。文物之盛。近世莫及也。○六月壬子。以楊素爲司徒。進封豫章王。暕爲齊王。○秋七月庚申。制百官不得計考增級。必有德行功能。灼然顯著者。進擢之。帝頗惜名位。羣臣當進職者。多令兼假而已。雖有闕員。留而不補。時牛弘爲吏部尚書。不得專行其職。別勅納言蘇威。左翊衛大將軍宇文述。左驍衛大將軍張瑾。內史侍郎虞世基。御史大夫裴蘊。黃門侍郎裴矩。參掌選事。時人謂之選曹七貴。雖七人同坐。然與奪之筆。虞世基獨專之。受納賄賂。多者超越等倫。無者注色而已。蘊遂之從會孫也。○元德太子昭。自長安來朝。數月將還。欲乞少留。帝不許。拜請無數。體素肥。因致勞疾。甲戌薨。帝哭之。數聲而止。尋奏聲伎。無異平日。○楚景武公楊素。雖有大功。特爲帝所猜忌。外示殊禮。內情甚薄。太史言。隋分野有大喪。乃徙素爲楚公。意言楚與隋同分。欲以厭之。素寢疾。帝每令名醫診候。賜以上藥。然密問醫者。恆恐不死。素亦自知名位已極。不肯餌藥。亦不將慎。謂其弟約曰。我豈須更活邪。乙亥。素薨。贈太尉公。弘農等十郡太守。葬送甚盛。○八月辛卯。封皇孫倓爲燕王。侗爲越王。侑爲代王。皆昭之子也。○九月乙丑。立秦孝王子浩爲秦王。○帝以高祖末年法令峻刻。冬十月。詔改修律令。○置洛口倉於鞏東南原上。築倉城。周回二十餘里。穿三千窖。窖容八千石。以還。置監官并鎮兵千人。十二月。置回洛倉於洛陽北七里。倉城周回十里。穿三百窖。○初。齊溫公之世。有魚龍山車等戲。謂之散樂。周宣帝時。鄭譯奏徵之。高祖受禪。命牛弘定樂。非正聲清商。及九部四舞之色。悉放遣之。帝以啓民可汗將入朝。欲以富樂誇之。太常少卿裴蘊。希旨奏。括天下周齊梁陳樂家子弟。皆爲樂戶。其六品以下至庶人。有善音樂者。皆直太常。帝從之。於是四方散樂。大集。東京闕之芳華苑。積翠池側。有舍利獸。先來跳躍。激水滿衢。鼉鼉龜鼈。水人。蟲魚。徧覆于地。又有鯨魚。噴霧翳日。倏忽化成黃龍。長七八丈。又二人戴竿。上有舞者。歛然騰過。左右易處。又有神鼈。負山。幻人吐火。千變萬化。伎人皆衣錦繡繒綵。

舞者鳴環佩。綴花毼。課京兆河南。製其衣。兩京錦綵。爲之空竭。帝多製豔篇。令樂正白明達造新聲。播之音極哀怨。帝甚悅。謂明達曰。齊氏偏隅。樂工曹妙達。猶封王。我今天下大同。方且貴汝。宜自脩謹。三年春正月朔旦。大陳文物。時突厥啓民可汗入朝。見而慕之。請襲冠帶。帝不許。明日。又帥其屬。上表固請。帝大悅。謂牛弘等曰。今衣冠大備。致單于解辮。卿等功也。各賜帛甚厚。○三月辛亥。帝還長安。○癸丑。帝使羽騎尉朱寬入海。求訪異俗。至流求國而還。○初。雲定興。閭毗坐媚事太子勇。與妻子皆沒官爲奴婢。上卽位。多所營造。聞其有巧思。召之。使典其事。以毗爲朝請郎。時宇文述用事。定興以明珠絡帳。賂述。并以奇服新聲。求媚於述。述大喜。兄事之。上將有事四夷。大作兵器。述薦定興。可使監造。上從之。述謂定興曰。兄所作器仗。竝合上心。而不得官者。爲長寧兄弟。猶未死耳。定興曰。此無用物。何不勸上殺之。述因奏。房陵諸子。年竝成立。今欲興兵誅討。若使之從駕。則守掌爲難。若留於一處。又恐不可。進退無用。請早處分。帝然之。乃鳩殺長寧王儼。分徙其七弟於嶺表。仍遣間使。於路盡殺之。襄城王恪之妃柳氏。自殺以從恪。○夏四月庚辰。下詔。欲安輯河北。巡省趙魏。○牛弘等造新律成。凡十八篇。謂之大業律。甲申。始頒行之。民久厭嚴刻。喜於寬政。其後征役繁興。民不堪命。有司臨時迫脅。以求濟事。不復用律令矣。旅騎尉劉炫。預修律令。弘嘗從容問炫曰。周禮士多而府史少。今令史百倍於前。減則不濟。其故何也。炫曰。古人委任責成。歲終考其殿最。案不重校。文不繁悉。府史之任。掌要目而已。今之文簿。恆慮覆治。若鍛鍊不密。則萬里追證。百年舊案。故諺云。老吏抱案死。事繁政弊。職此之由也。弘曰。魏齊之時。令史從容而已。今則不遑寧處。何故。炫曰。往者州唯置綱紀。郡置守丞。縣置令而已。其餘具僚。則長官自辟。受詔赴任。每州不過數十。今則不然。大小之官。悉由吏部。纖介之迹。皆屬考功。省官不如省事。官事不省。而望從容。

其可得乎。弘善其言而不能用。○壬辰，改州爲郡，改度量權衡，竝依古式。改上柱國以下官爲大夫，置殿內省，與尚書門下內史祕書爲五省，增謁者司隸臺，與御史爲三臺。分太府寺置少府監，與長秋國子將作都水爲五監。又增改左右翊衛等爲十六府，廢伯子男爵，唯留王公侯三等。○丙寅，車駕北巡，已亥，頓赤岸澤。五月，丁巳，突厥啓民可汗遣其子拓特勒來朝。戊午，發河北十餘郡丁男鑿太行山，達于并州，以通馳道。丙寅，啓民遣其兄子毗黎伽特勒來朝。辛未，啓民遣使請自入塞，奉迎輿駕，上不許。○初，高祖受禪，唯立四親廟，同殿異室而已。帝卽位，命有司議七廟之制，禮部侍郎攝太常少卿許善心等奏請爲太祖高祖各立一殿，準周文武二祧與始祖而三，餘竝分室而祭。從。迭毀之法。至是有司請如前議。於東京建宗廟，帝謂祕書監柳詵曰：「今始祖及二姚已具，後世子孫處朕何所？」六月，丁亥，詔爲高祖建別廟，仍修月祭禮。既而方事巡幸，竟不果立。○帝過鴈門，鴈門太守丘和獻食甚精，至馬邑，馬邑太守楊廓獨無所獻，帝不悅，以和爲博陵太守，仍使廓至博陵，觀和爲式。由是所至獻食競爲豐侈。戊子，車駕頓榆林郡，帝欲出塞耀兵，經突厥中，指于涿郡，恐啓民驚懼，先遣武衛將軍長孫晟諭旨。啓民奉詔，因召所部諸國奚霫室韋等會長數十人，咸集。晟見牙帳中草穢，欲令啓民親除之，示諸部落，以明威重。乃指前草曰：「此根大香，啓民遽嗅之曰：「殊不香也。」晟曰：「天子行幸所在，諸侯躬自灑掃，耕除御路，以表至敬之心。今牙內蕪穢，謂是留香耳。」啓民乃悟曰：「奴之罪也。」奴之骨肉皆天子所賜，得效筋力，豈敢有辭？特以邊人不知法耳。」賴將軍教之，將軍之惠，奴之幸也。」遂拔所佩刀，自芟庭草，其貴人及諸部爭效之。於是發榆林北境至其牙，東達於薊，長三千里，廣百步，舉國就役，開爲御道。帝聞，益嘉之。丁酉，啓民及義成公主來朝，行宮己亥，吐谷渾高昌竝遣使入貢。甲辰，上御北樓，觀漁於河，以宴百僚。定襄太守周法尙朝于行宮，太府卿元壽言於帝曰：「漢武出關，旌旗千里，今御營之外，

請分爲二十四軍，日別遣一軍發，相去三十里，旗幟相望，鉦鼓相聞，首尾相屬，千里不絕，此亦出師之盛者也。法尙曰：「不然，兵互千里，動聞山川，猝有不虞，四分五裂，腹心有事，首尾未知道路阻長，難以相救，雖有故事，乃取敗之道也。」帝不懌，曰：「卿意如何？」法尙曰：「結爲方陳，四面外拒，六宮及百官家屬竝在其內，若有變起，所當當之面，卽令抗拒，內引奇兵，出外奮擊，車爲壁壘，重設鉤陳，此與據城理亦何異？若戰而捷，抽騎追奔，萬一不捷，屯營自守，臣謂此萬全之策也。」帝曰：「善。」因拜法尙左武衛將軍。啓民可汗復上表，以爲先帝可汗憐臣，賜臣安義公主，種種無乏。臣兄弟嫉妬，共欲殺臣，臣當是時，走無所適，仰視唯天，俯視唯地，奉身委命，依歸先帝。先帝憐臣且死，養而生之，以臣爲大，可汗還撫突厥之民，至尊今御天下，還如先帝。養生臣及突厥之民，種種無乏。臣荷戴聖恩，言不能盡。臣今非昔日突厥可汗，乃是至尊臣民，願帥部落，變改衣服，一如華夏，帝以爲不可。秋七月，辛亥，賜啓民璽書，諭以積北未靜，猶須征戰，但存心恭順，何必變服。帝欲誇示突厥，令宇文愷爲大帳，其下可坐數千人。甲寅，帝於城東，御大帳，備儀衛，宴啓民及其部落，作散樂，諸胡駭悅，爭獻牛羊駝馬數千萬頭。帝賜啓民帛二十萬段，其下各有差。又賜啓民路車乘馬，鼓吹，幡旗，贊拜不名，位在諸侯王上。又詔發丁男百餘萬，築長城，西拒榆林，東至紫河，尙書左僕射蘇威諫，上不聽。築之二旬而畢。帝之徵散樂也，太常卿高穎諫，不聽。穎退，謂太常丞李懿曰：「周天元以好樂而亡，殷鑒不遠，安可復爾？」穎又以帝遇啓民過厚，謂太府卿何稠曰：「此虜頗知中國虛實，山川險易，恐爲後患，又謂觀王雄曰：「近來朝廷，殊無綱紀，禮部尙書宇文弼私謂穎曰：「天元之侈，以今方之，不亦甚乎？」又言長城之役，幸非急務，光祿大夫賀若弼亦私議，宴可汗，太侈，竝爲人所奏。帝以爲誹謗朝政，丙子，高穎宇文弼賀若弼皆坐誅。穎諸子徙邊，弼妻子沒官爲奴婢，事連蘇威，亦坐免官。穎有文武大略，明達世務，自蒙委任，竭誠盡節，進引貞良，以天下爲己任，蘇威

楊素、賀若弼、韓擒虎，皆願所推薦，自餘立功立事者，不可勝數。當朝執政，將二十年，朝野推服，物無異議。海內富庶，頽之力也。及死，天下莫不傷之。先是，蕭琮以皇后故，甚見親重，爲內史令，改封梁公。宗族總麻以上，皆隨才擢用。諸蕭昆弟，布列朝廷，琮性澹雅，不以職務爲意。身雖羈旅，見北間豪貴，無所降下，與賀若弼善。弼既誅，又有童謠曰：蕭蕭亦復起，帝由是忌之。遂廢於家，未幾而卒。○八月壬午，車駕發榆林，歷雲中，泝金河，時天下承平，百物豐實，甲士五十餘萬，馬十萬匹，旌旗輜重，千里不絕。令宇文愷等造觀風行殿，上容侍衛者數百人，離合爲之，下施輪軸，倏忽推移。又作行城，周二千步，以板爲榦，衣之以布，飾以丹青，樓櫓悉備。胡人驚以爲神，每望御營，十里之外，屈膝稽顙，無敢乘馬。啓民奉廬帳，以俟車駕。乙酉，帝幸其帳，啓民奉觴上壽，跪伏恭甚。王侯以下，袒割於帳前，莫敢仰視。帝大悅，賦詩曰：呼韓頓顙至，屠耆接踵來。何如漢天子，空上單于臺。皇后亦幸義成公主帳，帝賜啓民及公主金甕各一，并衣服被褥錦綵，特勅以下，受賜各有差。帝還，啓民從入塞，己丑，遣歸國。癸巳，入樓煩關，壬寅，至太原，詔營晉陽宮。帝謂御史大夫張衡曰：朕欲過公宅，可爲朕作主人。衡乃先馳至河內，具牛酒，帝上太行，開直道九十里。九月己未，至濟源，幸衡宅，帝悅，其山泉留宴三日，賜資甚厚。衡復獻食，帝令頒賜公卿，下至衛士，無不霑洽。己巳，至東都。○壬申，以齊王暕爲河南尹。癸酉，以民部尚書楊文思爲納言。○冬十月，勅河南諸郡送一藝戶陪東都，三千餘家，置十二坊於洛水南，以處之。西域諸胡多至張掖交市，帝使吏部侍郎裴矩掌之。矩知帝好遠略，商胡至者，矩誘訪諸國山川風俗，王及庶人儀形服飾，撰西域圖記三卷，合四十四國，入朝奏之。仍別造地圖，窮其要害。從西傾以去，縱橫所互，將二萬里，發自敦煌，至于西海，凡爲三道。北道從伊吾，中道從高昌，南道從鄯善，總湊敦煌。且云：以國家威德，將士驍雄，汎濛汎而越崑崙，易如反掌，但突厥吐谷渾，分領羌胡之國，爲其壅遏，故朝貢不通。今竝因商

人，密送誠款，引領翹首，願爲臣妾，若服而撫之，務存安輯。皇華遣使，弗動兵車，諸蕃既從，渾厥可滅。混壹戎夏，其在茲乎。帝大悅，賜物五百段，日引矩至御坐，親問西域事。矩盛言胡中多諸珍寶，吐谷渾易可并吞，帝於是慨然慕秦皇漢武之功，甘心將通西域。四夷經略，咸以委之。以矩爲黃門侍郎，復使至張掖，引致諸胡，陷之以利，勸令入朝，自是西域胡往來相繼。所經郡縣，疲於送迎，糜費以萬萬計。卒令中國疲弊，以至於亡。皆矩之唱導也。○鐵勒寇邊，帝遣將軍馮孝慈出敦煌，擊之，不利。鐵勒尋遣使謝罪請降，帝使裴矩慰撫之。

資治通鑑卷第一百八十

資治通鑑卷第一百八十一

隋紀五

煬皇帝上之下

大業四年春正月乙巳詔發河北諸軍百餘萬穿永濟渠引沁水南達于河北通涿郡丁男不供始役婦人○壬申以太府卿元壽為內史令○裴矩聞西突厥處羅可汗思其母請遣使招懷之二月己卯帝遣司朝謁者崔君肅齎詔書慰諭之處羅見君肅甚踞受詔不肯起君肅謂之曰突厥本一國中分為二每歲交兵積數十歲而莫能相滅者明知其勢敵耳然啓民舉其部落百萬之衆卑躬折節入臣天子者其故何也正以切恨可汗不能獨制欲借兵於大國共滅可汗耳羣臣咸欲從啓民之請天子既許之師出有日矣願可汗母向夫人懼西國之滅且夕守闕哭泣哀祈旬旬謝罪請發使召可汗令入內屬天子憐之故復遣使至此今可汗乃踞慢如此則向夫人為誑天子必伏尸都市傳首虜庭發大隋之兵資東國之衆左提右挈以擊可汗亡無日矣奈何愛兩拜之禮絕慈母之命惜一語稱臣使社稷為墟乎處羅矍然而起流涕再拜跪受詔書因遣使者隨君肅貢汗血馬○三月壬戌倭王多利思比孤入貢遣帝書曰日出處天子致書日沒處天子無恙帝覽之不悅謂鴻臚卿曰蠻夷書無禮者勿復以聞○乙丑車駕幸五原因出塞巡長城行宮設六合板城載以槍車每頓舍則外其轅以為外圍內布鐵菱次施弩牀皆插鋼錐外向上施旋機弩以繩連機人來觸繩則弩機旋轉向所觸而發其外又以矰周圍施鈴柱槌磬以知所警帝募能通絕域者

屯田主事常駿等請使赤土帝大悅丙寅命駿齎物五千段以賜其王赤土者南海中遠國也○帝無日不治宮室兩京及江都苑囿亭殿雖多久而益厭每遊幸左右顧矚無可意者不知所適乃備責天下山川之圖躬自歷覽以求勝地可置宮苑者夏四月詔於汾州之北汾水之源營汾陽宮○初元德太子薨河南尹齊王暕次當為嗣元德吏兵二萬餘人悉隸於暕帝為之妙選僚屬以光祿少卿柳謩之為齊王長史且戒之曰齊王德業修備富貴自鍾卿門若有不善罪亦相及謩之從子也暕寵遇日隆百官趨謁闐咽道路暕以是驕恣昵近小人所為多不法遣左右喬令則庫狄仲錡陳智偉求聲色令則等因此放縱訪入家有美女輒矯暕命呼之載入暕第淫而遣之仲錡智偉詣隴西搆爰諸胡責其名馬得數匹以進暕暕令還主仲錡等詐言王賜取歸其家暕不知也樂平公主嘗奏帝言柳氏女美帝未有所答久之主復以柳氏進暕暕納之其後帝問主柳氏女安存主曰在齊王所帝不悅暕從帝幸汾陽宮大獵詔暕以千騎入圍暕大獲麋鹿以獻而帝未有得也乃怒從官皆言為暕左右所遏獸不得前帝於是發怒求暕罪失時制縣令無故不得出境有伊闕令皇甫謫得幸於暕違禁攜之至汾陽宮御史韋德裕希旨劾奏暕帝令甲士千餘人大索暕第因窮治其事暕妃韋氏早卒暕與妃姊元氏婦通產一女暕召相工令徧視後庭相工指妃姊曰此產子者當為皇后暕以元德太子有三子恐不得立陰挾左道為厭勝至是皆發帝大怒斬令則等數人賜妃姊死暕府僚皆斥之邊遠柳謩之坐不能匡正除名時趙王杲尚幼帝謂侍臣曰朕唯有暕一子不然者當肆諸市朝以明國憲暕自是恩寵日衰雖為京尹不復關預時政帝恆令虎賁郎將一人監其府事暕有微失虎賁輒奏之帝亦常慮暕生變所給左右皆以老弱備員而已太史令庾質季才之子也其子為齊王屬帝謂質曰汝不能一心事我乃使兒事齊王何向背如此對曰臣事陛下子事齊王實是一心不敢有二帝猶

怒出爲合水令。○乙卯詔以突厥啓民可汗遵奉朝化思改戎俗宜於萬壽戍置城造屋其帷帳牀褥以上務從優厚。○秋七月辛巳發丁男二十餘萬築長城自榆谷而東。○裴矩說鐵勒使擊吐谷渾大破之吐谷渾可汗伏允東走入西平境內遣使請降求救帝遣安德王雄出澆河許公宇文述出西平迎之述至臨羌城吐谷渾畏述兵盛不敢降帥衆西遁述引兵追之拔曼頭赤水二城斬三千餘級獲其王公以下二百人虜男女四千口而還伏允南奔雪山其故地皆空東西四千里南北二千里皆爲隋有置州縣鎮戍天下輕罪徙居之。○八月辛酉上親祠恆岳赦天下河北道郡守畢集裴矩所致西域十餘國皆來助祭。○九月辛未徵天下鷹師悉集東京至者萬餘人。○冬十月乙卯頒新式。○常駿等至赤土境赤土王利富多塞遣使以三十船迎之進金鎖以纜駿船凡汎海百餘日入境月餘乃至其都其王居處器用窮極珍麗待使者禮亦厚遣其子那邪迦隨駿入貢。○帝以右翊衛將軍河東薛世雄爲玉門道行軍大將與突厥啓民可汗連兵擊伊吾師出玉門啓民不至世雄孤軍度磧伊吾初謂隋軍不能至皆不設備聞世雄軍已度磧大懼請降世雄乃於漢故伊吾城東築城留銀青光祿大夫王威以甲卒千餘人戍之而還。

五年春正月丙子改東京爲東都。○突厥啓民可汗來朝禮賜益厚。○癸未詔天下均田。○戊子自上東都西還。○己丑制民間鐵叉搭鈎攢刃之類皆禁之。○二月戊申車駕至西京。○三月己巳西巡河右乙亥幸扶風舊宅夏四月癸亥出臨津關度黃河至西平陳兵講武將擊吐谷渾五月乙亥上大獵於拔延山長圍亙二十里庚辰入長寧谷度星嶺丙戌至浩亶川以橋未成斬都水使者黃互及督役者九人數日橋成乃行吐谷渾可汗伏允帥衆保覆袁川帝分命內史元壽南屯金山兵部尙書段文振北屯雪山太僕卿楊義臣東屯琵琶峽將軍張壽西屯泥嶺四面圍之伏允以數十騎遁出遣其名王詐稱伏允保車我真山壬

辰詔右屯衛大將軍張定和往捕之定和輕其衆少不被甲挺身登山吐谷渾伏兵射殺之其亞將柳武建擊吐谷渾破之甲午吐谷渾仙頭王窮蹙帥男女十餘萬口來降六月丁酉遣左光祿大夫梁默等追討伏允兵敗爲伏允所殺衛尉卿劉權出伊吾道擊吐谷渾至青海虜獲千餘口勝乘追奔至伏俟城辛丑帝謂給事郎蔡徵曰自古天子有巡狩之禮而江東諸帝多傳脂粉坐深宮不與百姓相見此何理也對曰此其所以不能長世丙午至張掖帝之將西巡也命裴矩說高昌王麴伯雅及伊吾吐屯設等昭以厚利召使入朝壬子帝至燕支山伯雅吐屯設等及西域二十七國謁於道左皆令佩金玉被錦罽焚香奏樂歌舞諠譟帝復令武威張掖士女盛飾縱觀衣服車馬不鮮者郡縣督課之騎乘嗔咽周亙數十里以示中國之盛吐屯設獻西域數千里之地上大悅癸丑置西海河源鄯善且末等郡謫天下罪人爲戍卒以守之命劉權鎮河源郡積石鎮大開屯田扞禦吐谷渾以通西域之路是時天下凡有郡一百九十縣一千二百五十五戶八百九十萬有奇東西九千三百里南北萬四千八百一十五里隋氏之盛極於此矣帝謂裴矩有綏懷之略進位銀青光祿大夫自西京諸縣及西北諸郡皆轉輸塞外每歲鉅億萬計經途險遠及遇寇鈔人畜死亡不達者郡縣皆徵破其家由是百姓失業西方先困矣初吐谷渾伏允使其子順來朝帝留順不遣伏允敗走無以自資帥數千騎客於党項帝立順爲可汗送至玉門令統其餘衆以其大寶王尼洛周爲輔至西平其部下殺洛周順不果入而還丙辰上御觀風殿大備文物引高昌王麴伯雅及伊吾吐屯設升殿宴飲其餘蠻夷使者陪階庭者二十餘國奏九部樂及魚龍戲以娛之賜賚有差戊午赦天下吐谷渾有青海俗傳置牝馬於其上得龍種秋七月置馬牧於青海縱牝馬二千匹於川谷以求龍種無効而止車駕東還經大斗拔谷山路隘險魚貫而出風雪晦冥文武飢餒沾濕夜久不逮前營士卒凍死者太半馬驢什八九後宮妃主

或狼狽相失。與軍士雜宿山間。九月癸未。車駕入西京。冬十一月丙子。復幸東都。○民部侍郎裴蘊。以民間版籍脫漏戶口。及詐注老少尚多。奏令貌閱。若一人不實。則官司解職。又許民糾得一丁者。令被糾之家代輸賦役。是歲。諸郡計帳。進丁二十萬三千。新附口六十四萬一千五百。帝臨朝覽狀。謂百官曰。前代無賢才。致此罔冒。今戶口皆實。全由裴蘊。由是漸見親委。未幾擢授御史大夫。與裴矩。虞世基。參掌機密。蘊善候伺。人主微意。所欲罪者。則曲法鍛成其罪。所欲宥者。則附從輕典。因而釋之。是後大小之獄。皆以附蘊。刑部大理莫敢與爭。必稟承進止。然後決斷。蘊有機辯。言若懸河。或重或輕。皆由其口。剖析明敏。時人不能致詰。○突厥啓民可汗卒。上爲之廢朝三日。立其子咄吉。是爲始畢。可汗表請尙公主。詔從其俗。○初。內史侍郎薛道衡。以才學有盛名。久當樞要。高祖末。出爲襄州總管。帝卽位。自番州刺史召之。欲用爲祕書監。道衡既至。上高祖文皇帝頌。帝覽之不悅。顧謂蘇威曰。道衡致美先朝。此魚藻之義也。拜司隸大夫。將置之罪。司隸刺史房彥謙勸道衡杜絕賓客。卑辭下氣。道衡不能用。會議新令。久不決。道衡謂朝士曰。向使高穎不死。令決當久行。有人奏之。帝怒曰。汝憶高穎邪。付執法者推之。裴蘊奏。道衡負才恃舊。有無君之心。推惡於國。妄造禍端。論其罪名。似如隱昧。原其情意。深爲悖逆。帝曰。然我少時與之行役。輕我童稚。與高穎賀若弼等。外擅威權。及我卽位。懷不自安。賴天下無事。未得反耳。公論其逆。妙體本心。道衡自以所坐非大過。促憲司早斷。冀奏日帝必赦之。敕家人具饌。以備賓客來候者。及奏。帝令自盡。道衡殊不意。未能引決。憲司重奏。縊而殺之。妻子徙且末。天下冤之。○帝大閱軍實。稱器甲之美。宇文述因進言。此皆雲定興之功。帝卽擢定興爲太府丞。

帝以諸蕃酋長畢集洛陽。丁丑。於端門街。盛陳百戲。戲場周圍五千步。執絲竹者萬八千人。聲聞數十里。自昏至旦。燈火光燭天地。終月而罷。所費巨萬。自是歲以爲常。諸蕃請入豐都市交易。帝許之。先命整飾店肆。簷宇如一。盛設帷帳。珍貨充積。人物華盛。賣菜者亦藉以龍須席。胡客或過酒店。悉令邀延就坐。醉飽而散。不取其直。給之曰。中國豐饒。酒食例不取直。胡客皆驚歎。其黠者頗覺之。見以繒帛纏樹。曰。中國亦有貧者。衣不蓋形。何如以此物與之。纏樹何爲。市人慙不能答。帝稱裴矩之能。謂羣臣曰。裴矩大識朕意。凡所陳奏。皆朕之成算。未發之頃。矩輒以聞。自非奉國盡心。孰能若是。是時矩與右翊衛大將軍宇文述。內史侍郎虞世基。御史大夫裴蘊。光祿大夫郭衍。皆以諂諛有寵。述善於供奉。容止便辟。侍衛者皆取則焉。郭衍嘗勸帝五日一視朝。曰。無効高祖。空自勤苦。帝益以爲忠。曰。唯有郭衍。心與朕同。帝臨朝凝重。發言降詔。辭義可觀。而內存聲色。其在兩都。及巡遊。常以僧尼道士女官。自隨。謂之四道場。梁公蕭銍。琮之弟子。千牛左右宇文島。慶之孫也。皆有寵於帝。帝每日於苑中林亭間。盛陳酒饌。敕燕王倓。與銍。島。及高祖嬪御。爲一席。僧尼道士女官。爲一席。帝與諸寵姬。爲一席。略相連接。罷朝卽從之。宴飲更相勸侑。酒酣殺亂。靡所不至。以是爲常。楊氏。婦女之美者。往往進御。島出入宮掖。不限門禁。至於妃嬪公主。皆有醜聲。帝亦不之罪也。○帝復遣朱寬。招撫流求。流求不從。帝遣虎賁郎將廬江陳稜。朝請大夫同安張鎮周。發東陽兵萬餘人。自義安汎海。擊之。行月餘。至其國。以鎮周爲先鋒。流求王渴刺兜。虜其民萬餘口。而還。遂至其都。渴刺兜自將出戰。又敗。退入柵。稜等乘勝攻拔之。斬渴刺兜。虜其民萬餘口。而還。二月乙巳。稜等獻流求俘。頒賜百官。進稜位右光祿大夫。鎮周金紫。光祿大夫。○乙卯。詔以近世茅土妄假。名實相乖。自今唯有功勳。乃得賜封。仍令子孫承襲。於是舊賜五等爵。非有功者。皆除之。○庚申。以所徵周齊梁陳散樂。悉配太常。皆置博士弟子。以相傳授。樂工至三

萬餘人。○三月癸亥，帝幸江都宮。○初，帝欲大營汾陽宮，令御史大夫張衡具圖奏之。衡乘間進諫曰：「比年勞役繁多，百姓疲弊，伏願留神，稍加抑損，帝意甚不平。後目衡謂侍臣曰：『張衡自謂由其計畫，令我有天下也。』乃錄齊王陳攜皇甫詡從駕，及前幸涿郡祠恆岳時，父老謁見者，衣冠多不整，譴衡以憲司不能舉正，出爲榆林太守。久之，衡督役築樓煩城，因帝巡幸，得謁帝。帝惡衡不損瘦，以爲不念咎，謂衡曰：『公甚肥澤，宜且還郡。』復遣之榆林。未幾，敕衡督役江都宮，禮部尚書楊玄感使至江都，衡謂玄感曰：『薛道衡眞爲枉死，玄感奏之。』江都郡丞王世充又奏衡頻減頓具，帝於是發怒，鎖詣江都市將斬之。久乃得釋，除名爲民。放還田里，以王世充領江都宮監，世充本西域胡人，姓支氏，父沒幼從其母嫁王氏，因冒其姓。世充性譎詐，有口辯，頗涉書傳，好兵法，習律令。帝數幸江都，世充能伺候顏色，爲阿諛，雕飾池臺，奉獻珍物，由是有寵。○夏六月甲寅，制江都太守秩同京尹。○冬十二月己未，文安憲侯牛弘卒。弘寬厚恭儉，學術精博，隋室舊臣，始終信任，悔吝不及者，唯弘一人而已。弟弼好酒而酗，嘗因醉射殺弘駕車牛，弘來還宅，其妻迎謂之曰：『叔射殺牛，弘無所怪問，直答云：『作脯，坐定。』其妻又曰：『叔忽射殺牛，大是異事。』弘曰：『已知之矣。』顏色自若，讀書不輟。○敕穿江南河，自京口至餘杭，八百餘里，廣十餘丈，使可通龍舟，并置驛宮草頓，欲東巡會稽。○上以百官從駕，皆服袴褶，於軍旅間不便，是歲始詔從駕涉遠者，文武官皆戎衣。五品以上，通著紫袍。六品以下，兼用緋綠，胥吏以青，庶人以白，屠商以皂，士卒以黃。○帝之幸啓民帳也，高麗使者在啓民所，啓民不敢隱，與之見帝。黃門侍郎裴矩說帝曰：『高麗本箕子所封之地，漢晉皆爲郡縣，今乃不臣，別爲異域，先帝欲征之久矣，但楊諒不肖，師出無功，當陛下之時，安可不取使冠帶之境，遂爲蠻貊之鄉乎？今其使者親見啓民舉國從化，可因其恐懼，務使入朝，帝從之。敕牛弘宣旨曰：『朕以啓民誠心奉國，故親至其帳，明年當往涿郡，爾還日，語高麗王，勿自

疑懼，存育之禮，當如啓民，苟或不朝，將帥啓民往巡彼土，高麗王元懼，藩禮頗闕，帝將討之。課天下富人買武馬，匹至十萬錢，簡閱器仗，務令精新，或有濫惡，則使者立斬。七年春正月壬寅，眞定襄侯郭衍卒。○二月己未，上升釣臺，臨楊子津，大宴百僚。乙亥，帝自江都行幸涿郡，御龍舟度河，入永濟渠，仍勅選部門下內史御史四司之官於船前選補，其受選者三千餘人，或徒步隨船，三千餘里，不得處分，凍餒疲頓，因而致死者什一二。○壬午，下詔討高麗，敕幽州總管元弘嗣往東萊海口，造船三百艘，官吏督役，晝夜立水中，略不敢息，自腰以下皆生蛆，死者什三四。夏四月庚午，車駕至涿郡之臨朔宮，文武從官九品以上，竝令給宅安置，先是詔總徵天下兵，無問遠近，俱會於涿，又發江淮以南水手一萬人，弩手三萬人，嶺南排鐵手三萬人，於是四遠奔赴如流。五月，勅河南淮南江南造戎車五萬乘，送高陽，供載衣甲幔幕，令兵士自挽之。發河南北民夫以供軍須。秋七月，發江淮以南民夫及船運黎陽及洛口諸倉米，至涿郡，舳舻相次千餘里，載兵甲及攻取之具，往還在道常數十萬人，填咽於道，晝夜不絕，死者相枕，臭穢盈路，天下騷動。○山東河南大水，漂沒三十餘郡。冬十月乙卯，底柱崩，偃河，逆流數十里。初，帝西巡，遣侍御史韋節召西突厥處羅可汗，令與車駕會大斗拔谷，國人不從，羅處謝使者辭以佗故，帝大怒，無如之何，會其酋長射置，遣使來求婚，裴矩因奏曰：『處羅不朝，恃彊大耳，臣請以計弱之，分裂其國，即易制也。』射置者，都六之子，達頭之孫，世爲可汗，君臨西面，今聞其失職，附屬處羅，故遣使來以結援耳。願厚禮其使，拜爲大可汗，則突厥勢分，兩從我矣。帝曰：『公言是也。』因遣矩朝夕至館，微諷諭之。帝於仁風殿召其使者，言處羅不順之狀，稱射置向善，吾將立爲大可汗，令發兵誅處羅，然後爲婚。帝取桃竹白羽箭一枚，以賜射置，因謂之曰：『此事宜速，使疾如箭也。』使者返，路經處羅，處羅愛箭，將留之，使者譎而得免，射置聞而大喜，與兵襲處羅，處羅大敗，棄妻子，將數千騎東走。

緣道被劫。寓於高昌東。保時羅漫山。高昌王麴伯雅上狀。帝遣裴矩與向氏親要左右。馳至玉門關。晉昌城曉諭。處羅使入朝。十二月己未。處羅來朝於臨朔宮。帝大悅。接以殊禮。帝與處羅宴。處羅稽首謝。入見之晚。帝以溫言慰勞之。備設天下珍膳。盛陳女樂。羅綺絲竹。眩曜耳目。然處羅終有怏怏之色。○帝自去歲。謀討高麗。詔山東置府。令養馬。以供軍役。又發民夫運米。積於瀘河。懷遠二鎮。車牛往者皆不返。士卒死亡過半。耕稼失時。田疇多荒。加之饑饉。穀價踊貴。東北邊尤甚。斗米直數百錢。所運米或粗惡。令民糴而償之。又發鹿車夫六十餘萬。二人共推米三石。道途險遠。不足充餼糧。至鎮無可輸。皆懼罪亡命。重以官吏貪殘。因緣侵漁。百姓困窮。財力俱竭。安居則不勝凍餒。死期交急。剽掠則猶得延生。於是始相聚為羣盜。鄒平民王薄。擁衆據長白山。剽掠齊濟之郊。自稱知世郎。言事可知矣。又作無向遼東浪死歌。以相感勸。避征役者多往歸之。平原東有豆子航。負海帶河。地形深阻。自高齊以來。羣盜多匿其中。有劉霸道者。家於其旁。累世仕宦。貲產富厚。霸道喜遊俠。食客常數百人。及羣盜起。遠近多往依之。有衆十餘萬。號阿舅賊。漳南人竇建德。少尚氣俠。膽力過人。為鄉黨所歸附。會募人征高麗。建德以勇敢。選為二百人長。同縣孫安祖。亦以驍勇。選為征士。安祖辭以家為水所漂。妻子餒死。縣令怒笞之。安祖刺殺令。亡抵建德。建德匿之。官司逐捕蹤跡。至建德家。建德謂安祖曰。文皇帝時。天下殷盛。發百萬之衆。以伐高麗。尚為所敗。今水潦為災。百姓困窮。加之往歲西征。行者不歸。瘡痍未復。主上不恤。乃更發兵。親擊高麗。天下必大亂。丈夫不死。當立大功。豈可但為亡虜邪。乃集無賴少年。得數百人。使安祖將之。入高雞泊中。為羣盜。安祖自號將軍。時鄒人張金稱。聚衆河曲。蓀人高士達。聚衆於清河境內。為盜。郡縣疑建德與賊通。悉收其家屬殺之。建德帥麾下二百人。亡歸士達。士達自稱東海公。以建德為司兵。頃之。孫安祖為張金稱所殺。其衆盡歸建德。兵至萬餘人。建德能傾身接物。與士

卒均勞逸。由是人爭附之。為之致死。自是所在羣盜蜂起。不可勝數。徒衆多者至萬餘人。攻陷城邑。甲子。勅都尉鷹揚與郡縣相知追捕。隨獲斬決。然莫能禁止。

八年春正月。帝分西突厥處羅可汗之衆為三。使其弟闕達度設將羸弱萬餘口。居于會寧。又使特勒大奈別將餘衆。居于樓煩。命處羅將五百騎。常從車駕巡幸。賜號曷婆那可汗。賞賜甚厚。○初。嵩高道士潘誕。自言三百歲。為帝合煉金丹。帝為之作嵩陽觀。華屋數百間。以童男童女各一百二十人。充給使。位視三品。常役數千人。所費巨萬。云金丹應用石膽石髓。發石工鑿嵩高大石。深百尺者數十處。凡六年。丹不成。帝詰之。誕對以無石膽石髓。若得童男女膽髓各三斛六斗。可以代之。帝怒。鎖詣涿郡。斬之。且死。語人曰。此乃天子無福。值我兵解時。至我應生梵摩天云。○四方兵皆集涿郡。帝徵合水令庾質。問曰。高麗之衆。不能當我一郡。今朕以此衆伐之。卿以為克不。對曰。伐之可克。然臣竊有愚見。不願陛下親行。帝作色曰。朕今總兵至此。豈可未見賊而先自退邪。對曰。戰而未克。懼損威靈。若車駕留此。命猛將勁卒。指授方略。倍道兼行。出其不意。克之必矣。事機在速。緩則無功。帝不悅。曰。汝既憚行。自可留此。右尚方署監事耿詢。上事切諫。帝大怒。命左右斬之。何稠苦救得免。壬午。詔左十二軍出鏖方。長岑。溟海。蓋馬。建安。南蘇。遼東。玄菟。扶餘。朝鮮。沃沮。樂浪等道。右十二軍出黏蟬。含資。渾彌。臨屯。候城。提奚。蹋頓。肅慎。碣石。東曠。帶方。襄平等道。駱驛引途。總集平壤。凡一百一十三萬三千八百人。號二百萬。其餽運者倍之。宜社於南桑乾水上。類上帝於臨朔宮南。祭馬祖於薊城北。帝親授節度。每軍大將亞將各一人。騎兵四十隊。隊百人。十隊為團。步卒八十隊。分為四團。團各有偏將一人。其鎧冑。纓拂。旗旛。每團異色。受降使者一人。承詔慰撫。不受大將節制。其輜重散兵等。亦為四團。使步卒挾之而行。進止立營。皆有次敘儀法。癸未。第一軍發。日遣一軍。相去四十里。連營漸進。終四十日。發乃盡。首尾相繼。鼓角相聞。旌旗互

九百六十里。御營內合十二衛。三臺。五省。九寺。分隸內外前後左右。六軍次後發。又互八十里。近古出師之盛。未之有也。○甲辰。內史令元壽薨。○二月。壬戌。觀德王雄薨。○北平襄侯段文振爲兵部尚書。上表以爲帝寵待突厥太厚。處之塞內。資以兵食。戎狄之性。無親而貪。異日必爲國患。宜以時諭遣。令出塞外。然後明設烽候。緣邊鎮防。務令嚴重。此萬歲之長策也。兵曹郎斛斯政椿之孫也。以器幹明悟。爲帝所寵任。使專掌兵事。文振知政險薄。不可委以機要。屢言於帝。帝不從。及征高麗。以文振爲左候衛大將軍。出南蘇道。文振於道中疾篤。上表曰。竊見遼東小醜。未服嚴刑。遠降六師。親勞萬乘。但夷狄多詐。深須防擬。口陳降款。母宜遽受。水潦方降。不可淹遲。唯願嚴勒諸軍。星馳速發。水陸俱前。出其不意。則平壤孤城。勢可拔也。若傾其本根。餘城自克。如不時定。脫遇秋霖。深爲艱阻。兵糧既竭。疆敵在前。鞞鞫出後。遲疑不決。非上策也。三月。辛卯。文振卒。帝甚惜之。○癸巳。上始御師。進至遼水。衆軍總會。臨水爲大陳。高麗兵阻水拒守。隋兵不得濟。左屯衛大將軍麥鐵杖謂人曰。丈夫性命。自有所在。豈能然艾炙類。瓜蒂歎鼻。治黃不差。而臥死兒女手中乎。乃自請爲前鋒。謂其三子曰。吾荷國恩。今爲死日。我得良殺。汝當富貴。帝命工部尚書宇文愷造浮橋三道於遼水西岸。既成。引橋趨東岸。橋短不及岸丈餘。高麗兵大至。隋兵驍勇者爭赴水接戰。高麗兵乘高擊之。隋兵不得登岸。死者甚衆。麥鐵杖躍登岸。與虎賁郎將錢士雄。孟叉等皆戰死。乃斂兵。引橋復就西岸。詔贈鐵杖宿公。使其子孟才襲爵。次子仲才。季才。並拜官。正義大夫。更命少府監何稠接橋。二日而成。諸軍相次繼進。大戰于東岸。高麗兵大敗。死者萬計。諸軍乘勝進圍遼東城。即漢之襄平城也。車駕度遼。引曷薩那可汗。及高昌王伯雅。觀戰處。以懾憚之。因下詔赦天下。命刑部尚書衛文昇。尚書右丞劉士龍。撫遼左之民。給復十年。建置郡縣。以相統攝。○夏。五月。壬午。納言楊達薨。○諸將之東下也。帝親戒之曰。今者。弔民伐罪。非爲功名。諸

將或不識朕意。欲輕兵掩襲。孤軍獨鬪。立一身之名。以邀勳賞。非大軍行法。公等進軍。當分爲三道。有所攻擊。必三道相知。毋得輕軍獨進。以致失亡。又凡軍事進止。皆須奏聞待報。毋得專擅。遼東數出戰。不利。乃嬰城固守。帝命諸軍攻之。又勅諸將。高麗若降。即宜撫納。不得縱兵。遼東城將陷。城中人輒言請降。諸將奉旨。不敢赴機。先令馳奏。比報至。城中守禦亦備。隨出拒戰。如此再三。帝終不寤。既而城久不下。六月。己未。帝幸遼東城南。觀其城池形勢。因召諸將詰責之曰。公等。自以官高。又恃家世。欲以暗懦待我邪。在都之日。公等皆不願我來。恐見病敗耳。我今來此。正欲觀公等所爲。斬公輩耳。公今畏死。莫肯盡力。謂我不能殺公邪。諸將咸戰懼失色。帝因留城西數里。御六合城。高麗諸城各堅守不下。右翊衛大將軍來護兒。帥江淮水軍。舳艫數百里。浮海先進。入自浪水。去平壤六十里。與高麗相遇。進擊大破之。護兒欲乘勝趣其城。副總管周法尙止之。請俟諸軍至。俱進。護兒不聽。簡精甲四萬。直造城下。高麗伏兵於羅郭內空寺中。出兵與護兒戰。而僞敗。護兒逐之入城。縱兵俘掠。無復部伍。伏兵發。護兒大敗。僅而獲免。士卒還者不過數千人。高麗追至船所。周法尙整陳待之。高麗乃退。護兒引兵還屯海浦。不敢復留。應接諸軍。左翊衛大將軍宇文述。出扶餘道。右翊衛大將軍于仲文。出樂浪道。左驍衛大將軍荆元恆。出遼東道。右翊衛將軍薛世雄。出沃沮道。左屯衛將軍辛世雄。出玄菟道。右禦衛將軍張瑾。出襄平道。右武侯將軍趙孝才。出碣石道。涿郡太守檢校左武衛將軍崔弘昇。出遼城道。檢校右禦衛虎賁郎將衛文昇。出增地道。皆會於鴨綠水西。述等兵自瀘河懷遠二鎮。人馬皆給百日糧。又給排甲槍稍。并衣資。戎具。火幕。人別三石已上。重莫能勝。致下令軍中士卒。有遺弃米粟者。斬軍士皆於幕下掘坑埋之。纔行及中路。糧已將盡。高麗遣大臣乙支文德。詣其營詐降。實欲觀虛實。于仲文先奉密旨。若遇高元及文德來者。必擒之。仲文將執之。尙書右丞劉士龍。爲慰撫使。固止之。仲文遂聽文

德還。既而悔之。遣人給文德曰。更欲有言。可復來。文德不顧。濟鴨綠水而去。仲文與述等。既失文德。內不自安。述以糧盡欲還。仲文議以精銳追文德。可以有功。述固止。仲文怒曰。將軍仗十萬之衆。不能破小賊。何顏以見帝。且仲文此行。固知無功。何則。古之良將。能成功者。軍中之事。決在一人。今人各有心。何以勝敵。時帝以仲文有計畫。令諸軍諮稟節度。故有此言。由是述等不得已而從之。與諸將度水追文德。文德見述軍士有飢色。故欲疲之。每戰輒走。述一日之中。七戰皆捷。既恃驟勝。又逼羣議。於是遂進。東濟薩水。去平壤城三十里。因山爲營。文德復遣使詐降。請於述曰。若旋師者。當奉高元朝行在所。述見士卒疲弊。不可復戰。又平壤城險固。度難猝拔。遂因其詐而還。述等爲方陳而行。高麗四面鈔擊。述等且戰且行。秋七月壬寅。至薩水。軍半濟。高麗自後擊其後軍。右屯衛將軍辛世雄戰死。於是諸軍俱潰。不可禁止。將士奔還。一日一夜。至鴨綠水。行四百五十里。將軍天水王仁恭爲殿。擊高麗却之。來護兒聞述等敗。亦引還。唯衛文昇一軍獨全。初九軍度遼。凡三十萬五千。及還。至遼東城。唯二千七百人。資儲器械巨萬計。失亡蕩盡。帝大怒。鎖繫述等。癸卯。引還。初百濟王璋遣使請討高麗。帝使之覘高麗動靜。璋內與高麗潛通。隋軍將出。璋使其臣國智牟來請師期。帝大悅。厚加賞賜。遣尙書起部郎席律詣百濟。告以期會。及隋軍度遼。百濟亦嚴兵境上。聲言助隋。實持兩端。是行也。唯於遼水西。拔高麗武厲邏。置遼東郡。及通定鎮而已。八月。勅運黎陽洛口。太原等倉穀。尙望海頓。使民部尙書樊子蓋留守涿郡。九月庚寅。車駕至東都。○冬十月甲寅。工部尙書宇文愷卒。○十一月己卯。以宗女爲華容公主。嫁高昌。○宇文述素有寵於帝。且其子士及。尙帝女南陽公主。故帝不忍誅。甲申。與于仲文等皆除名爲民。斬劉士龍。以謝天下。薩水之敗。高麗追圍薛世雄於白石山。世雄奮擊破之。由是獨得免官。以衛文昇爲金紫光祿大夫。諸將皆委罪於于仲文。帝既釋諸將。獨繫仲文。仲文憂恚。發病困篤。乃

出之。卒于家。○是歲大旱疫。山東尤甚。○張衡既放廢。帝每令親人覘衡所爲。帝還自遼東。衡妾告衡怨望。謗訕朝政。詔賜盡于家。衡臨死大言。我爲人作何等事。而望久活。監刑者塞耳。促令殺之。

資治通鑑卷第一百八十一

資治通鑑卷第一百八十二

隋紀六

煬皇帝中

大業九年春正月丁丑詔徵天下兵集涿郡始募民爲驍果修遼東古城以貯軍糧○靈武賊帥白瑜娑劫掠牧馬北連突厥隴右多被其患謂之奴賊○戊戌赦天下○己亥命刑部尚書衛文昇等輔代王侑留守西京○二月壬午詔宇文述以兵糧不繼遂陷王師乃軍吏失於支料非述之罪宜復其官爵尋又加開府儀同三司○帝謂侍臣曰高麗小虜侮慢上國今拔海移山猶望克果況此虜乎乃復議伐高麗左光祿大夫郭榮諫曰戎狄失禮臣下之事千鈞之弩不爲鼯鼠發機奈何親辱萬乘以敵小寇乎帝不聽○二月丙子濟陰孟海公起爲盜保據周橋衆至數萬見人稱引書史輒殺之○丁丑發丁男十萬城大興○戊寅帝幸遼東命民部尚書樊子蓋等輔越王侗留守東都○時所在盜起齊郡王薄孟讓北海郭方預清河張金稱平原郝孝德河間格謙勃海孫宣雅各聚衆攻剽多者十餘萬少者數萬人山東苦之天下承平日久人不習兵郡縣吏每與賊戰望風沮敗唯齊郡丞閔鄉張須陁得士衆心勇決善戰將郡兵擊王薄於泰山下薄恃其驟勝不設備須陁掩擊大破之薄收餘兵北度河須陁追擊於臨邑又破之薄北連孫宣雅郝孝德等十餘萬攻章丘須陁帥步騎二萬擊之賊衆大敗賊帥裴長才等衆二萬掩至城下大掠須陁未暇集兵帥五騎與戰賊競赴之圍百餘重身中數創勇氣彌厲會城中兵至賊稍却須陁督衆擊之長才等敗

走庚子郭方預等合軍攻陷北海大掠而去須陁謂官屬曰賊恃其疆謂我不能救吾今速行破之必矣乃簡精兵倍道進擊大破之斬數萬級前後獲賊輜重不可勝計歷城羅士信年十四從須陁擊賊於濰水上賊始布陳士信馳至陳前刺殺數人斬一人首擲空中以稍盛之揭以略陳賊徒愕眙莫敢近須陁因引兵奮擊賊衆大潰士信逐北每殺一人剗其鼻懷之還以驗殺賊之數須陁歎賞引置左右每戰須陁先登士信爲副帝遣使慰諭并畫須陁士信戰陳之狀而觀之○夏四月庚午車駕度遼壬申遣宇文述與上大將軍楊義臣趣平壤左光祿大夫王仁恭出扶餘道仁恭進軍至新城高麗兵數萬拒戰仁恭帥勁騎一千擊破之高麗嬰城固守帝命諸將攻遼東聽以便宜從事飛樓幢雲梯地道四面俱進晝夜不息而高麗應變拒之二十餘日不拔主客死者甚衆衝梯竿長十五丈驍果吳興沈光升其端臨城與高麗戰短兵接殺十數人高麗競擊之而墜未及地適遇竿有垂緜光接而復上帝望見壯之卽拜朝散大夫恆置左右○禮部尚書楊玄感驍勇便騎射好讀書喜賓客海內知名之士多與之遊與蒲山公李密善密弼之曾孫也少有才略志氣雄遠輕財好士爲左親侍帝見之謂宇文述曰向者左仗下黑色小兒瞻視異常勿令宿衛述乃諷密使稱病自免密遂屏人事專務讀書嘗乘黃牛讀漢書楊素遇而異之因召至家與語大悅謂其子玄感等曰李密識度如此汝等不及也由是玄感與爲深交時或侮之密曰人言當指實寧可面諛若決機兩陳之間暗鳴咄嗟使敵人震懾密不如公驅策天下賢俊各申其用公不如密豈可以階級稍崇而輕天下士大夫邪玄感笑而服之素恃功驕倨朝宴之際或失臣禮帝心銜而不言素亦覺之及素薨帝謂近臣曰使素不死終當族滅玄感頗知之且自以累世貴顯在朝文武多父之故吏見朝政日紊而帝多猜忌內不自安乃與諸弟潛謀作亂帝方事征伐玄感自言世荷國恩願爲將領帝喜曰將門必有將相門必有相固不虛也

由是寵遇日隆。頗預朝政。帝伐高麗。命玄感於黎陽督運。遂與虎賁郎將王仲伯、汲郡贊治趙懷義等謀。故逗遛遭運。不時進發。欲令度遼諸軍乏食。帝遣使者促之。玄感揚言。水路多盜。不可前後而發。玄感弟虎賁郎將玄縱、鷹揚郎將萬石、竝從。幸遼東。玄感潛遣人召之。二人皆亡還。萬石至高陽。爲監事許華所執。斬於涿郡。時右驍衛大將軍來護兒以舟師自東萊將入海。趣平壤。玄感遣家奴僞爲使者。從東方來。詐稱護兒反。六月乙巳。玄感入黎陽。閉城。大索男夫。取帆布爲卒甲。署官屬。皆準開皇之舊。移書傍郡。以討護兒爲名。各令發兵。會於倉所。郡縣官有幹用者。玄感皆以運糧追集之。以趙懷義爲衛州刺史。東光尉元務本爲黎州刺史。河內郡主簿唐禕爲懷州刺史。治書侍御史游元督運在黎陽。玄感謂曰。獨夫肆虐。陷身絕域。此天亡之時也。我今親帥義兵。以誅無道。卿意如何。元正色曰。尊公荷國寵靈。近古無比。公之弟兄。青紫交映。當謂竭誠盡節。上答鴻恩。豈意墳土未乾。親圖反噬。僕有死而已。不敢聞命。玄感怒而囚之。屢脅以兵。不能屈。乃殺之。元明根之孫也。玄感選運夫少壯者。得五千餘人。丹楊宣城篙梢三千餘人。刑三牲誓衆。且諭之曰。主上無道。不以百姓爲念。天下騷擾。死遼東者以萬計。今與君等起兵。以救兆民之弊。何如。衆皆踴躍。稱萬歲。乃勒兵部分。唐禕自玄感所逃歸河內。先是。玄感陰遣家僮至長安。召李密。及弟玄挺。赴黎陽。及舉兵。密適至。玄感大喜。以爲謀主。謂密曰。子常以濟物爲己任。今其時矣。計將安出。密曰。天子出征。遠在遼外。去幽州猶隔千里。南有巨海。北有強胡。中間一道。理極艱危。公擁兵出其不意。長驅入薊。據臨渝之險。扼其咽喉。歸路既絕。高麗聞之。必躡其後。不過旬月。資糧皆盡。其衆不降則潰。可不戰而擒。此上計也。玄感曰。更言其次。密曰。關中四塞。天府之國。雖有衛文昇。不足爲意。今帥衆鼓行而西。經城勿攻。直取長安。收其豪傑。撫其士民。據險而守之。天子雖還。失其根本。可徐圖也。玄感曰。更言其次。密曰。簡精銳。晝夜倍道。襲取東都。以號令四方。

但恐唐禕告之。先已固守。若引兵攻之。百日不克。天下之兵四面而至。非僕所知也。玄感曰。不然。今百官家口。竝在東都。若先取之。足以動其心。且經城不拔。何以示威。公之下計。乃上策也。遂引兵向洛陽。遣楊玄挺將驍勇千人。爲前鋒。先取河內。唐禕據城拒守。玄挺無所獲。禕又使人告東都。越王侗與樊子蓋等。勒兵爲備。修武民相帥守臨清關。玄感不得度。乃於汲郡南度河。從之者如市。使弟積善將兵三千。自偃師南緣洛水西入。玄挺自白司馬坂逾邙山南入。玄感將三千餘人。隨其後。相去十里許。自稱大軍。其兵皆執單刀柳楯。無弓矢甲冑。東都遣河南令達奚善意將精兵五千人。拒積善。將作監河南贊治裴弘策將八千人。拒玄挺。善意度洛南。營於漢王寺。明日。積善兵至。不戰自潰。鎧仗皆爲積善所取。弘策出至白司馬坂。一戰敗走。棄鎧仗者太半。玄挺亦不追。弘策退三四里。收散兵。復結陳以待之。玄挺徐至。坐息良久。忽起擊之。弘策又敗。如是五戰。丙辰。玄挺直抵太陽門。弘策將十餘騎馳入宮城。自餘無一人返者。皆歸於玄感。玄感屯上春門。每誓衆曰。我身爲上柱國。家累鉅萬金。至於富貴。無所求也。今不顧滅族者。但爲天下解倒懸之急耳。衆皆悅。父老爭獻牛酒。子弟詣軍門。請自効者。日以千數。丙舍人韋福嗣。洸之兄子也。從軍出拒玄感。爲玄感所獲。玄感厚禮之。使與其黨胡師耽共掌文翰。玄感令福嗣爲書。遣樊子蓋。數帝罪惡云。今欲廢昏立明。願勿拘小禮。自貽伊戚。樊子蓋新自外藩入。爲京官。東都舊官多慢之。至於部分軍事。未甚承稟。裴弘策與子蓋同班。前出討賊。失利。子蓋更使出戰。不肯行。子蓋命引出。斬之以徇。國子祭酒河東楊汪。小有不恭。子蓋又將斬之。汪頓首流血。乃得免。於是將吏震肅。無敢仰視。令行禁止。玄感盡銳攻城。子蓋隨方拒守。玄感不能克。然達官子弟。應募從軍者。聞弘策死。皆不敢入城。韓擒虎子世弼。觀王雄子恭道。虞世基子柔。來護兒子淵。裴蘊子爽。大理卿鄭善果子儼。周羅睺子仲等四十餘人。皆降於玄感。玄感悉以親重要任委之。善果譯之。

兄子也。玄感收兵得五萬餘人，分五千守慈磧道，五千守伊闕道，遣韓世弼將三千人圍滎陽。顧覺將五千人取虎牢，虎牢降，以覺爲鄭州刺史，鎮虎牢。代王侑使刑部尚書衛文昇帥兵四萬救東都。文昇至華陰，掘楊素冢，焚其骸骨，示士卒以必死。遂鼓行出崤澗，直趨東都城北。玄感逆拒之，文昇且戰且行，屯於金谷。遼東城久不拔，帝遣造布囊百餘萬口，滿貯土，欲積爲魚梁大道，闊三十步，高與城齊，使戰士登而攻之。又作八輪樓車，高出於城，夾魚梁道，欲俯射城內。指期將攻，城內危蹙，會楊玄感反，書至，帝大懼，引納言蘇威入帳中，謂曰：「此兒聰明，得無爲患？」威曰：「夫識是非，審成敗，乃謂之聰明。玄感蠢疎，必無所慮，但恐因此寢成亂階耳。」帝又聞達官子弟皆在玄感所，益憂之。兵部侍郎斛斯政素與玄感善，玄感之反，政與之通謀。玄縱兄弟亡歸，政潛遣之。帝將窮治玄縱等黨，與政內不自安。戊辰，亡奔高麗。庚午，夜二更，帝密召諸將，使引軍還軍資器械，攻具積如丘山，營壘帳幕案堵不動，皆棄之而去。衆心懼，無復部分。諸道分散，高麗即時覺之，然不敢出，但於城內鼓譟。至來日午時，方漸出外。四遠覘偵，猶疑隋軍詐之。經二日，乃出數千兵追躡，畏隋兵之衆，不敢逼。常相去八九十里，將至遼水，知御營畢度，乃敢逼。後軍時後軍猶數萬人，高麗隨而抄擊，最後羸弱數千人，爲所殺略。初，帝再征高麗，復問太史令庾質曰：「今段何如？」對曰：「臣實愚迷，猶執前見，陛下若親動萬乘，勞費實多。」帝怒曰：「我自行，猶不克，直遣人去，安得有功？」及還，謂質曰：「卿前不欲我行，當爲此耳。」玄感其有成乎？質曰：「玄感地勢雖隆，素非人望，因百姓之勞，冀幸成功，今天下一家，未易可動。」帝遣虎賁郎將陳稜攻元務本於黎陽，又遣左翊衛大將軍宇文述、右候衛將軍屈突通乘傳發兵以討玄感。來護兒至東萊，聞玄感圍東都，召諸將議旋軍救之。諸將咸以無救，不宜擅還，固執不從。護兒厲聲曰：「洛陽被圍，心腹之疾，高麗逆命，猶疥癬耳，公家之事，知無不爲，專擅在吾，不關諸人。」有沮議者，軍法從事，即日迴軍，令子弘整馳驛奏

聞。帝時還至涿郡，已敕護兒救東都。見弘整甚悅，賜護兒璽書曰：「公旋師之時，是朕救公之日。君臣意合，遠同符契。先是右武侯大將軍李子雄坐事除名，令從軍自効，從來護兒在東萊，帝疑之，詔鎖子雄，送行在所。子雄殺使者，逃奔玄感，衛文昇以步騎二萬度漣水，與玄感戰，玄感屢破之。玄感每戰，身先士卒，所向摧陷，又善撫悅其下，皆樂爲致死。由是每戰多捷，衆益盛，至十萬人。文昇衆寡不敵，死傷大半，且盡。乃更進屯邙山之陽，與玄感決戰。一日，十餘合，會楊玄挺中流矢死，玄感軍乃稍却。秋七月，癸未，餘杭民劉元進起兵，以應玄感。元進手長尺餘，臂垂過膝，自以相表非常，陰有異志。會帝再發三吳兵征高麗，三吳兵皆相謂曰：「往歲天下全盛，吾輩父兄征高麗者，猶大半不返，今已罷弊，復爲此行，吾屬無遺類矣。由是多亡命。郡縣捕之急，聞元進舉兵，亡命者雲集。旬月間，衆至數萬。始楊玄感至東都，自謂天下響應，得韋福嗣委以心膂，不復專任李密。福嗣每畫策，皆持兩端，密揣知其意，謂玄感曰：「福嗣元非同盟，實懷觀望。」明公初起大事，而姦人在側，聽其是非，必爲所誤。請斬之。」玄感曰：「何至於此？」密退謂所親曰：「楚公好反，而不欲勝，吾屬今爲虜矣。」李子雄勸玄感速稱尊號，玄感以問密，密曰：「昔陳勝自欲稱王，張耳諫而被外，魏武將求九錫，苟或止而見誅，今者密欲正言，還恐追蹤二子，阿諛順意，又非密之本圖。何者？兵起以來，雖復頻捷，至於郡縣，未有從者。東都守禦尙彊，天下救兵益至，公當挺身力戰，早定關中，迺亟欲自尊，何示人不廣也？」玄感笑而止。屈突通引兵屯河陽，宇文述繼之。玄感問計於李子雄，子雄曰：「通曉習兵事，若一得度河，則勝負難決，不如分兵拒之，通不能濟，則樊衛失援，玄感然之。將拒通，樊子蓋知其謀，數擊其營，玄感不得往。通濟河，軍於破陵，玄感分爲兩軍，西抗文昇，東拒通，子蓋復出兵大戰，玄感軍數敗，與其黨謀之。李子雄曰：「東都援軍益至，我軍數敗，不可久留，不如直入關中，開永豐倉以振貧乏，三輔可指麾而定。據有府庫，東面而爭天下，亦霸王之業也。」李密曰：

弘化留守元弘嗣。握疆兵在隴右。可聲言其反。遣使迎公。因此入關。可以給衆。會華陰諸楊請爲鄉導。壬辰。玄感解東都圍。引兵西趣潼關。宣言。我已破東都。取關西矣。宇文述等諸軍躡之。至弘農宮。父老遮說。玄感曰。宮城空虛。又多積粟。攻之易下。玄感以爲然。弘農太守蔡王智積。謂官屬曰。玄感聞大軍將至。欲西圖關中。若成其計。則難克也。當以計縻之。使不得進。不出一旬。可以成擒。及玄感軍至城下。智積登陴。詈之。玄感怒。留攻之。李密諫曰。公今詐衆西入。軍事貴速。況乃追兵將至。安可稽留。若前不得據關。退無所守。大衆一散。何以自全。玄感不從。遂攻之。燒其城門。智積於內益火。玄感兵不得入。三日不拔。乃引而西。至閿鄉。宇文述衛文昇來護兒。屈突通等軍追及於皇天原。玄感上槃豆。布陳五十里。且戰且行。玄感一日三敗。八月壬寅。玄感陳於董杜原。諸軍擊之。玄感大敗。獨與十餘騎奔上洛。追騎至。玄感叱之。皆反走。至葭蘆戍。獨與弟積善徒步走。自度不免。謂積善曰。我不能受人戮辱。汝可殺我。積善抽刀斫殺之。因自刺不死。爲追兵所執。與玄感首俱送行在所。磔玄感尸於東都市。三日復斃而焚之。玄感弟玄獎。爲義陽太守。將赴玄感。爲郡丞周旋玉所殺。仁行爲朝請大夫。伏誅於長安。玄感之圍東都也。梁郡民韓相國舉兵應之。玄感以爲河南道元帥。旬月間衆十餘萬。攻剽郡縣。至襄城。聞玄感敗。衆稍散。爲吏所獲。傳首東都。帝以元弘嗣斛斯政之親也。留守弘化郡。遣衛尉少卿李淵馳往執之。因代爲留守。關右十三郡兵皆受徵發。淵御衆寬簡。人多附之。帝以淵相表奇異。又名應圖讖忌之。未幾徵詣行在所。淵遇疾未謁。其甥王氏在後宮。帝問曰。汝舅來何遲。王氏以疾對。帝曰。可得死否。淵開之懼。因縱酒納賂。以自晦。○癸卯。吳郡朱燮。晉陵管崇。聚衆寇掠江左。燮本還俗道人。涉獵經史。頗知兵法。形容眇小。爲崑山縣博士。與數十學生起兵。民苦役者。赴之如歸。崇長大。美姿容。志氣倜儻。隱居常孰。自言有王者相。故羣盜相與奉之。時帝在涿郡。命虎牙郎將趙六兒將兵萬人屯楊

子。分爲五營。以備南賊。崇遣其將陸顛度江。夜襲六兒。破其兩營。收其器械軍資而去。衆益盛。至十萬。○辛酉。司農卿雲陽趙元淑。坐楊玄感黨。伏誅。帝使大理卿善果。御史大夫裴蘊。刑部侍郎骨儀。與留守樊子蓋。推玄感黨與儀。本天竺胡人也。帝謂蘊曰。玄感一呼而從者十萬。益知天下人不欲多。多即相聚爲盜耳。不盡加誅。無以懲後。子蓋性既殘酷。蘊復受此旨。由是峻法治之。所殺三萬餘人。皆籍沒其家。枉死者大半。流徙者六千餘人。玄感之圍東都也。開倉賑給百姓。凡受米者。皆阮之於都城之南。玄感所善文士。會稽虞綽。琅邪王胄。俱坐徙邊。綽胄亡命。捕得誅之。帝善屬文。不欲人出其右。薛道衡死。帝曰。更能作空梁落燕泥否。王胄死。帝誦其佳句曰。庭草無人隨意綠。復能作此語邪。帝自負才學。每驕天下之士。嘗謂侍臣曰。天下皆謂朕承籍緒餘。而有四海。設令朕與士大夫高選。亦當爲天子矣。帝從容謂祕書郎虞世南曰。我性不喜人諫。若位望通顯。而諫以求名者。彌所不耐。至於卑賤之士。雖少寬假。然卒不置之地上。汝其知之。世南。世基之弟也。○帝使裴矩安集隴右。因之會寧。存問曷薩那可汗部落。遣闕達度設寇掠吐谷渾。以自富。還而奏狀。帝大賞之。○九月己卯。東海民彭孝才起爲盜。有衆數萬。○甲午。車駕至上谷。以供費不給。免太守虞荷等官。閏月己巳。幸博陵。○冬十月丁丑。賊帥呂明星圍東郡。虎賁郎將費青奴擊破之。○劉元進帥其衆將度江。會楊玄感敗。朱燮管崇共迎元進。推以爲主。據吳郡。稱天子。燮崇俱爲尙書僕射。署置百官。毗陵東陽會稽建安豪傑多執長吏以應之。帝遣左屯衛大將軍代人吐萬緒光祿大夫下邳魚俱羅將兵討之。○十一月己酉。右候衛將軍馮孝慈討張金稱於清河。孝慈敗死。○楊玄感之西也。韋福嗣亡詣東都歸首。是時如其比者皆不問。樊子蓋收玄感文簿。得其書草。封以呈帝。帝命執送行在。李密亡命。爲人所獲。亦送東都。樊子蓋鎖送福嗣。密及楊積善。王仲伯等十餘人。詣高陽。密與王仲伯等竊謀亡去。悉使出其所齎金。以示使者曰。

吾等死日。此金竝留付公。幸用相瘞。其餘即皆報德。使者利其金。許諾。防禁漸弛。密請通市酒食。每宴飲。誼譁竟夕。使者不以爲意。行至魏郡石梁驛。欲防守者皆醉。穿墻而逸。密呼韋福嗣同去。福嗣曰。我無罪。天子不過一面責我耳。至高陽。帝以書草示福嗣。收付大理。宇文述奏。凶逆之徒。臣下所當同疾。若不爲重法。無以肅將來。帝曰。聽公所爲。十二月甲申。述就野外。縛諸應刑者於格上。以車輪括其頸。使文武九品以上。皆持兵斫射。亂發矢如蝟毛。支體糜碎。猶在車輪中。積善福嗣。仍加車裂。皆焚而揚之。積善自言。手殺玄感。冀得免死。帝曰。然則梟類耳。因更其姓曰梟氏。○唐縣人宋子賢。善幻術。能變佛形。自稱彌勒出世。遠近信惑。遂謀因無遮大會。舉兵襲乘輿。事泄伏誅。并誅黨與千餘家。扶風桑門向海明。亦自稱彌勒出世。人有歸心者。輒獲吉夢。由是三輔人翕然奉之。因舉兵反。衆至數萬。丁亥。海明自稱皇帝。改元白鳥。詔太僕卿楊義臣擊破之。○帝召衛文昇。樊子蓋。詣行在慰勞之。賞賜極厚。遣還所任。○劉元進攻丹陽。吐萬緒濟江。擊破之。元進解圍去。緒進屯曲阿。元進結柵拒緒。相持百餘日。緒擊之。賊衆大潰。死者以萬數。元進挺身夜遁。保其壘。朱燮。管崇等屯毗陵。連營百餘里。緒乘勝進擊。復破之。賊退保黃山。緒圍之。元進燬僅以身免。於陳斬崇及其將卒五千餘人。收其子女三萬餘口。進解會稽圍。魚俱羅與緒偕行。戰無不捷。然百姓從亂者如歸市。賊敗而復聚。其勢益盛。元進退據建安。帝令緒進討。緒以士卒疲弊。請息甲待來春。帝不悅。俱羅亦以賊非歲月可平。諸子在洛京。潛遣家僕迎之。帝怒。有司希旨奏。緒怯懦。俱羅敗衄。俱羅坐斬。徵緒詣行在。緒憂憤道卒。帝更遣江都丞王世充發淮南兵數萬人討元進。世充度江。頻戰皆捷。元進燬敗死於吳。其餘衆或降或散。世充召先降者於通玄寺瑞像前焚香爲誓。約降者不殺。散者始欲入海爲盜。聞之。旬月之間。歸首略盡。世充悉阮之於黃亭澗。死者三萬餘人。由是餘黨復相聚爲盜。官軍不能討。以至隋亡。帝以世充有將帥才。益加

寵任。○是歲。詔爲盜者籍沒其家。時羣盜所在皆滿。郡縣官因之。各專威福。生殺任情矣。○章丘杜伏威與臨濟輔公祏爲刎頸交。俱亡命爲羣盜。伏威年十六。每出則居前。入則殿後。由是其徒推以爲帥。下邳苗海潮亦聚衆爲盜。伏威使公祏謂之曰。今我與君同苦隋政。各舉大義。力分勢弱。常恐被擒。若合爲一。則足以敵隋矣。君能爲主。吾當敬從。自揆不堪。宜來聽命。不則一戰。以決雌雄。海潮懼。即帥其衆降之。伏威轉掠淮南。自稱將軍。江都留守遣校尉宋顥討之。伏威與戰。陽爲不勝。引顥衆入葭葦中。因從上風縱火。顥衆皆燒死。海陵賊帥趙破陳以伏威兵少輕之。召與并力。伏威使公祏嚴兵居外。自與左右十人齋牛酒。入謁於座。殺破陳并其衆。十年春二月辛未。詔百僚議伐高麗。數日無敢言者。戊子。詔復徵天下兵。百道俱進。○丁酉。扶風賊帥唐弼立李弘芝爲天子。有衆十萬。自稱唐王。○三月壬子。帝行幸涿郡。士卒在道。亡者相繼。癸亥。至臨渝宮。禡祭黃帝。斬叛軍者以鬯鼓。亡者亦不止。○夏四月。榆林太守成紀董純與彭城賊帥張大虎戰於昌慮。大破之。斬首萬餘級。○甲午。車駕至北平。○五月庚申。延安賊帥劉迦論自稱皇王。建元大世。有衆十萬。與稽胡相表裏爲寇。詔以左驍衛大將軍屈突通爲關內討捕大使。發兵擊之。戰於上郡。斬迦論。并將卒萬餘級。虜男女數萬口而還。○秋七月癸丑。車駕次懷遠鎮。時天下已亂。所徵兵多失期不至。高麗亦因弊來護兒至。畢奢城。高麗舉兵逆戰。護兒擊破之。將趣平壤。高麗王元懼甲子。遣使乞降。因送斛斯政。帝大悅。遣使持節召護兒還。護兒集衆曰。大軍三出。未能平賊。此還不可復來。勞而無功。吾竊恥之。今高麗實困。以此衆擊之。不日可克。吾欲進兵徑圍平壤。取高元。獻捷而歸。不亦善乎。答表請行。不肯奉詔。長史崔君肅固爭。護兒不可曰。賊勢破矣。獨以相任。自足辦之。吾在闔外。事當專決。寧得高元還而獲譴。捨此成功。所不能矣。君肅告衆曰。若從元帥。違拒詔書。必

當聞奏，皆應獲罪。諸將懼，俱請還。乃始奉詔。八月己巳，帝自懷遠鎮班師。邯鄲賊帥楊公卿帥其黨八千人抄駕後第八隊，得飛黃上廐馬四十二匹而去。冬十月丁卯，上至東都。己丑，還西京。以高麗使者及斛斯政告太廟，仍徵高麗王元入朝。元竟不至。敕將帥嚴裝，更圖後舉。竟不果行。初，開皇之末，國家殷盛，朝野皆以高麗爲意。劉炫獨以爲不可，作撫夷論以刺之。至是，其言始驗。十一月丙申，殺斛斯政於金光門外。如楊積善之法，仍烹其肉，使百官噉之。佞者或噉之，至飽。收其餘骨，焚而揚之。○乙巳，有事于南郊。上不齋于次，詰朝備法駕，至卽行禮。是日大風，上獨獻上帝。三公分獻五帝。禮畢，御馬疾驅而歸。○乙卯，離石胡劉苗王反。自稱天子。衆至數萬。將軍潘長文討之，不克。○汲郡賊帥王德仁擁衆數萬，保林慮山，爲盜。○帝將如東都，太史令庾質諫曰：「比歲伐遼，民實勞弊。陛下宜鎮撫關內，使百姓盡力農桑。」三五年間，四海稍豐實。然後巡省於事，爲宜。帝不悅，質辭疾不從。帝怒，下質獄，竟死獄中。十二月壬申，帝如東都，赦天下。戊子，入東都。○東海賊帥彭孝才轉掠沂水，彭城留守董純討擒之。純戰雖屢捷，而盜賊日滋。或譖純怯懦，帝怒，鎖純詣東都，誅之。○孟讓自長白山寇掠諸郡，至盱眙，衆十餘萬。據都梁宮，阻淮爲固。江都丞王世充將兵拒之，爲五柵以塞險要。羸形示弱，讓笑曰：「世充文法小吏，安能將兵。吾今生縛取，鼓行入江都耳。」時民皆結堡自固，野無所掠。賊衆漸餒，乃少留兵圍五柵，分人於南方抄掠。世充伺其懈，縱兵出擊，大破之。讓以數十騎遁去。斬首萬餘級。○齊郡賊帥左孝友衆十萬屯蹲狗山，郡丞張須陁列營逼之。孝友窘迫出降。須陁威振東夏，以功遷齊郡太守。領河南道十二郡黜陟，捕大使，涿郡賊帥盧明月衆十餘萬，軍祝阿。須陁將萬人邀之，相持十餘日。糧盡將退，謂將士曰：「賊見吾退，必悉衆來追。若以千人襲據其營，可有大利。」此誠危事，誰能往者？衆莫對。唯羅士信及歷城秦叔寶請行。於是須陁委柵而遁，使二人分將千兵伏葭葦中。明月悉衆追之，士信、叔寶馳至其柵，柵門閉，二人超升其樓，各殺數人，營中大亂。二人斬關以納外兵，因縱火焚其三十餘柵，煙焰漲天。明月奔還，須陁回軍奮擊，大破之。明月以數百騎遁去。所俘斬無算。叔寶名瓊，以字行。

十一年春正月，增祕書省官百二十員，竝以學士補之。帝好讀書著述，自爲揚州總管，置王府學士至百人，常令修撰，以至爲帝前後近二十載。修撰未嘗暫停，自經術、文章、兵、農、地理、醫、卜、釋道，乃至捕博、鷹狗，皆爲新書，無不精洽。共成三十一部，萬七千餘卷。初，西京嘉則殿有書三十七萬卷，帝命祕書監柳顧言等詮次，除其複重，得正御本三萬七千餘卷，納於東都修文殿。又寫五十副本，簡爲三品，分置西京、東都官省官府。其正書皆裝翦華淨，寶軸錦標，於觀文殿前爲書室十四間，窗戶牀褥廚幔咸極珍麗。每三間開方戶，垂錦幔，上有二飛仙，戶外地中施機發，帝幸書室，有宮人執香爐前行踐機，則飛仙下，收幔而上。戶扉及廚扉皆自啓，帝出則垂閉復故。○帝以戶口逃亡，盜賊繁多。二月庚午，詔民悉城居。田隨近給郡縣驛亭，村塢皆築城。○上谷賊帥王須拔自稱漫天王，國號燕，賊帥魏刁兒自稱歷山飛，衆各十餘萬。北連突厥，南寇燕趙。○初，高祖夢洪水沒都城，意惡之。故遷都大興，申明公李穆薨，孫筠襲爵，叔父渾忿其吝嗇，使兄子善衡賊殺之，而證其從父弟翟曇，使之償死。渾謂其妻兄左衛率宇文述曰：「若得紹封，當歲奉國賦之半。」述爲之言於太子，奏高祖以渾爲穆嗣。二歲之後，不復以國賦與述。述大恨之。帝卽位，渾累官至右驍衛大將軍，改封郟公。帝以其門族彊盛忌之，會有方士安伽陀言李氏當爲天子，勸帝盡誅海內凡李姓者。渾從子將作監敏，小名洪兒，帝疑其名應讖，嘗面告之，冀其引決。敏大懼，數與渾及善衡屏人私語，述譖之於帝，仍遣虎賁郎將河東裴仁基表告渾反。帝收渾等家，遣尙書左丞元文都、御史大夫裴蘊雜治之。按問數日，不得反狀，以實奏聞。帝更遣述窮治之。述誘教敏妻宇文氏爲

表誣告渾。謀因度遼。與其家子弟爲將領者。共襲取御營。立敏爲天子。述持入奏之。帝泣曰。吾宗社幾傾。賴公獲全耳。三月。丁酉。殺渾。敏善衡。及宗族三十二人。自三從以上。皆徙邊徼。後數月。敏妻亦鳩死。○有二孔雀。自西苑飛集寶城朝堂前。親衛校尉高德儒等十餘人見之。奏以爲鸞。時孔雀已飛去。無可得驗。於是百僚稱賀。詔以德儒誠心冥會。肇見嘉祥。擢拜朝散大夫。賜物百段。餘人皆賜束帛。仍於其地造儀鸞殿。○己酉。帝行幸太原。夏四月。幸汾陽宮。避暑。宮城迫隘。百官士卒。布散山谷間。結草爲營而居之。○以衛尉少卿李淵爲山西河東撫慰大使。承制黜陟。選補郡縣文武官。仍發河東兵。討捕羣盜。淵行至龍門。擊賊帥母端兒破之。○秋八月乙丑。帝巡北塞。初。裴矩以突厥始畢可汗部衆漸盛。獻策分其勢。欲以宗女嫁其弟叱吉設。拜爲南面可汗。叱吉不敢受。始畢聞而漸怨。突厥之臣史蜀胡悉。多謀略。爲始畢所寵任。矩詐與爲互市。誘至馬邑。下殺之。遣使詔始畢曰。史蜀胡悉叛。可汗來降。我已相爲斬之。始畢知其狀。由是不朝。戊辰。始畢帥騎數十萬。謀襲乘輿。義成公主先遣使者告變。壬申。車駕馳入鴈門。齊王暕以後軍保崞縣。癸酉。突厥圍鴈門。上下惶怖。撤民屋爲守禦之具。城中兵民十五萬口。食僅可支二旬。鴈門四十一城。突厥克其三十九。唯鴈門崞不下。突厥急攻鴈門。矢及御前。上大懼。抱趙王杲而泣。目盡腫。左衛大將軍宇文述勸帝簡精銳數千騎。潰圍而出。納言蘇威曰。城守則我有餘力。輕騎乃彼之所長。陛下萬乘之主。豈宜輕動。民部尚書樊子蓋曰。陛下乘危徵幸。一朝狼狽。悔之何及。不若據堅城。以挫其銳。坐徵四方兵。使入援。陛下親撫循士卒。諭以不復征遼。厚爲勳格。必人人自奮。何憂不濟。內史侍郎蕭瑀以爲突厥之俗。可賀敦預知軍謀。且義成公主以帝女嫁外夷。必恃大國之援。若使一介告之。借使無益。庸有何損。又將士之意。恐陛下既免突厥之患。還事高麗。若發明詔。諭以赦高麗。專討突厥。則衆心皆安。人自爲戰矣。瑀。皇后之弟也。虞世基亦勸帝重爲賞格。

下詔。停遼東之役。帝從之。帝親巡將士。謂之曰。努力擊賊。苟能保全。凡在行陳。勿憂富貴。必不使有司弄刀筆。破汝勳勞。乃下令。守城有功者。無官直除六品。賜物百段。有官以次增益。使者慰勞。相望於道。於是衆皆踊躍。晝夜拒戰。死傷甚衆。甲申。詔天下募兵。守令競來赴難。李淵之子世民年十六。應募。隸屯衛將軍雲定興。說定興多齎旗鼓。爲疑兵。曰。始畢敢舉兵圍天子。必謂我倉猝不能赴援。故也。宜晝則引旌旗。數十里不絕。夜則鉦鼓相應。虜必謂救兵大至。望風遁去。不然。彼衆我寡。若悉軍來戰。必不能支。定興從之。帝遣間使求救於義成公主。公主遣使告始畢云。北邊有急。東都及諸郡援兵。亦至忻口。九月甲辰。始畢解圍去。帝使人出偵。山谷皆空。無胡馬。乃遣二千騎追躡至馬邑。得突厥老弱二千餘人而還。丁未。車駕還至太原。蘇威言於帝曰。今盜賊不息。士馬疲弊。願陛下亟還西京。深根固本。爲社稷計。帝初然之。宇文述曰。從官妻子多在東都。宜便道向洛陽。自潼關而入。帝從之。冬十月壬戌。帝至東都。顧眎街衢。謂侍臣曰。猶大有人在。意謂曩日平楊玄感。殺人尙少。故也。蘇威追論勳格太重。宜加斟酌。樊子蓋固請以爲不宜失信。帝曰。公欲收物情邪。子蓋懼。不敢對。帝性吝官賞。初平楊玄感。應授勳者多。乃更置戎秩。建節尉爲正六品。次奮武。宣惠。綏德。懷仁。秉義。奉誠。立信等尉。遞降一階。將士守鴈門者萬七千人。得勳者纔千五百人。皆準平玄感勳。一戰得第一勳者。進一階。其先無戎秩者。止得立信尉。三戰得第一勳者。至秉義尉。其在行陳而無勳者。四戰進一階。亦無賜。會仍議伐高麗。由是將士無不憤怨。初。蕭瑀以外戚有才。行營事。帝於東宮。累遷至內史侍郎。委以機務。瑀性剛鯁。數言事忤旨。帝漸疎之。及鴈門圍解。帝謂羣臣曰。突厥狂悖。勢何能爲。少時未散。蕭瑀遽相恐動。情不可恕。出爲河池郡守。即日遣之。候衛將軍楊子崇。從帝在汾陽宮。知突厥必爲寇。屢請早還京師。帝怒曰。子崇怯懦。驚動衆心。不可居爪牙之官。出爲離石郡守。子崇高祖之族弟也。○楊玄感之亂。龍舟水殿。

皆爲所焚。詔江都更造。凡數千艘。制度仍大於舊者。○壬申。盧明月帥衆十萬寇陳汝。○東海李子通有勇力。先依長白山賊帥左才相。羣盜皆殘忍。而子通獨寬仁。由是人多歸之。未半歲。有衆萬人。才相忌之。子通引去。度淮。與杜伏威合。伏威選軍中壯士。養爲假子。凡三十餘人。濟陰王雄誕。臨濟闕稜。爲之冠。旣而李子通謀殺伏威。遣兵襲之。伏威被重創。墜馬。雄誕負之。逃葭葦中。收散兵復振。將軍來整。擊伏威破之。其將西門君儀之妻王氏。勇而多力。負伏威以逃。雄誕帥壯士十餘人衛之。與隋兵力戰。由是得免。來整又擊李子通破之。子通帥其餘衆奔海陵。復收兵得二萬人。自稱將軍。○城父朱粲始爲縣佐史。從軍遂亡命。聚衆爲盜。謂之可達寒賊。自稱迦樓羅王。衆至十餘萬。引兵轉掠荆沔。及山南郡縣。所過噍類無遺。○十二月庚辰。詔民部尚書樊子蓋發關中兵數萬。擊絳賊敬盤陀等。子蓋不分臧否。自汾水之北。村塢盡焚之。賊有降者皆阬之。百姓怨憤。益相聚爲盜。詔以李淵代之。有降者。淵引置左右。由是賊衆多降。前後數萬人。餘黨散入他郡。

資治通鑑卷第一百八十二

資治通鑑卷第一百八十三

隋紀七

煬皇帝下

大業十二年春正月。朝集使不至者二十餘郡。始議分遣使者。十二道發兵討捕盜賊。○詔毗陵通守路道德集十郡兵數萬人。於郡東南起宮苑。周圍十二里。內爲十六離宮。大抵倣東都西苑之制。而奇麗過之。又欲築宮於會稽。會亂不果。成。○三月。上巳。帝與羣臣飲於西苑水上。命學士杜寶撰水飾圖經。采古水事七十二。使朝散大夫黃袞以木爲之。間以妓航酒船。人物自動如生。鐘磬箏瑟。能成音曲。○己丑。張金稱陷平恩。一朝殺男女萬餘口。又陷武安。鉅鹿。清河諸縣。金稱比諸賊尤殘暴。所過民無孑遺。○夏四月丁巳。大業殿西院火。帝以爲盜起。驚走入西苑。匿草間。火定乃還。帝自八年以後。每夜眠恆驚悸。云有賊。令數婦人搖撫乃得眠。○癸亥。歷山飛別將甄翟兒衆十萬寇太原。將軍潘長文敗死。○五月丙戌朔。日有食之。既。○壬午。帝於景華宮徵求螢火。得數斛。夜出遊山放之。光遍巖谷。○帝問侍臣盜賊。左翊衛大將軍宇文述曰。漸少。帝曰。比從來少幾何。對曰。不能什一。納言蘇威引身隱柱。帝呼前問之。對曰。臣非所司。不委多少。但患漸近。帝曰。何謂也。威曰。他日賊據長白山。今近在汜水。且往日租賦丁役。今皆何在。豈非其人皆化爲盜乎。比見奏賊。皆不以實。遂使失於支計。不時翦除。又昔在鴈門。許罷征遼。今復徵發。賊何由息。帝不悅而罷。尋屬五月五日。百僚多饋珍玩。威獨獻尚書。或譖之曰。尚書有五子之歌。威意甚不遜。帝益怒。頃之。帝問威。

以伐高麗事。威欲帝知天下多盜，對曰：「今茲之役，願不發兵，但赦羣盜，自可得數十萬。」遣之東征，彼喜於免罪，爭務立功。高麗可滅，帝不憚，威出御史大夫裴蘊奏曰：「此大不遜，天下何處有許多賊？」帝曰：「老革多姦，以賊脅我，欲批其口，且復隱忍，蘊知帝意，遣河南白衣張行本奏威，昔在高陽典選，濫授人官，畏怯突厥，請還京師，帝令案驗，獄成，下詔，數威罪狀，除名爲民。後月餘，復有奏威與突厥陰圖不軌者，事下裴蘊推之，蘊處威死，威無以自明，但摧謝而已。」帝憫而釋之，曰：「未忍即殺，并其子孫三世，皆除名。」○秋七月壬戌，濟景公樊子蓋卒。江都新作龍舟，成，送東都。宇文述勸幸江都，右候衛大將軍酒泉趙才諫曰：「今百姓疲勞，府藏空竭，盜賊蜂起，禁令不行，願陛下還京師，安兆庶。」帝大怒，以才屬吏，旬日意解，乃出之。朝臣皆不欲行，帝意甚堅，無敢諫者。建節尉任宗上書極諫，即日於朝堂杖殺之。甲子，帝幸江都，命越王侗與光祿大夫段達、太府卿元文都、檢校民部尚書韋津、右武衛將軍皇甫無逸、右司郎盧楚等總留後事。津，孝寬之子也。帝以詩留別宮人曰：「我夢江都好，征遼亦偶然。奉信郎崔民象，以盜賊充斥，於建國門上表諫。帝大怒，先解其頤，然後斬之。」○戊辰，馮翊孫華舉兵爲盜，虞世基以盜賊充斥，請發兵屯洛口倉。帝曰：「卿是書生，定猶懼怯。」戊辰，車駕至鞏，勅有司移箕山公路二府於倉內，仍令築城以備不虞。至汜水，奉信郎王愛仁復上表請還西京，帝斬之而行。至梁郡，郡人邀車駕，上書曰：「陛下若遂幸江都，天下非陛下之有，又斬之。是時，李子通據海陵，左才相掠淮北，杜伏威屯六合，衆各數萬。帝遣光祿大夫陳稜將宿衛精兵八千討之，往往克捷。」○八月乙巳，賊帥趙萬海衆數十萬，自恆山寇高陽。○冬十月己丑，許恭公宇文述卒。初，述子化及、智及皆無賴，化及事帝於東宮，帝寵昵之，及即位，以爲太僕少卿。帝幸榆林，化及、智及冒禁與突厥交市，帝怒，將斬之，已解衣辮髮，既而釋之，賜述爲奴。智及弟士及以尙主之故，常輕智及，惟化及與之親昵。述卒，帝復以化及爲右屯衛將軍，智及

爲將作少監。○李密之亡也，往依郝孝德，孝德不禮之，又入王薄，薄亦不之奇也。密困乏，至削樹皮而食之，匿於淮陽村舍，變姓名，聚徒教授，郡縣疑而捕之，密亡去，抵其妹夫雍丘令丘君明，君明不敢舍，轉寄密於遊俠王秀才家。秀才以女妻之，君明從姪懷義告其事，帝令懷義自齎勅書與梁郡通守楊汪相知收捕。汪遣兵圍秀才宅，適值密出外，由是獲免。君明秀才皆死，韋城翟讓爲東都法曹，坐事當斬，獄吏黃君漢奇其驍勇，夜中潛謂讓曰：「翟法官天時人事，抑亦可知，豈能守死獄中乎？」讓驚喜曰：「讓固牢之豕，死生唯黃曹主所命，君漢即破械出之，讓再拜曰：『讓蒙再生之恩，則幸矣。』」奈何反效兒女子，涕泣相謝乎？君但努力自免，勿憂夫可救生民之命，故不顧其死，以奉脫，奈何反效兒女子，涕泣相謝乎？君但努力自免，勿憂吾也。讓遂亡命於瓦崗，爲羣盜，同郡單雄信、驍健、善用馬槊，聚少年往從之，離狐徐世勣、家於衛南，年十七，有勇略，說讓曰：「東郡於公與勣，皆爲鄉里，人多相識，不宜侵掠，滎陽、梁郡、汴水所經，剽行舟，掠商旅，足以自資，讓然之，引衆入二郡界，掠公私船，資用豐給，附者益衆，聚徒至萬餘人。時又有外黃王當仁、濟陽王伯當、韋城周文舉、雍丘李公逸等，皆擁衆爲盜，李密自雍丘亡命往來諸帥間，說以取天下之策，始皆不信，久之稍以爲然，相謂曰：『斯人公卿子弟，志氣若是，今人人皆云楊氏將滅，李氏將興，吾聞王者不死，斯人再三獲濟，豈非其人乎？由是漸敬密，密察諸帥，唯翟讓最彊，乃因王伯當以見讓，爲讓畫策，往說諸小盜，皆下之，讓悅，稍親近密，與之計事。密因說讓曰：『劉項皆起布衣，爲帝王，今主昏於上，民怨於下，銳兵盡於遼東，和親絕於突厥，方乃巡遊楊越，委棄東都，此亦劉項奮起之會也。以足下雄才大略，士馬精銳，席卷二京，誅滅暴虐，隋氏不足亡也。讓謝曰：『吾儕羣盜，且夕偷生草間，君之言者，非吾所及也。』會有李玄英者，自東都逃來，經歷諸賊，求訪李密，云：『斯人當代隋家，人問其故，玄英言：『比來民間謠歌，有桃李章曰：『桃李子，皇后繞楊州，宛轉花園裏，勿浪語，誰道許，桃

李子謂逃亡者李氏之子也。皇與后皆君也。宛轉花園裏。謂天子在楊州無還日。將轉於溝壑也。莫浪語。誰道許者。密也。既與密遇。遂委身事之。前宋城尉齊郡房玄藻。自負其才。恨不爲時用。預於楊玄感之謀。變姓名亡命。遇密於梁宋之間。遂與之俱遊漢沔。徧入諸賊。說其豪傑。還日。從者數百人。仍爲遊客。處於讓營。讓見密爲豪傑所歸。欲從其計。猶豫未決。有賈雄者。曉陰陽占候。爲讓軍師。言無不用。密深結於雄。使之託術數以說讓。雄許諾。懷之未發。會讓召雄。告以密所言。問其可否。對曰。吉不可言。又曰。公自立。恐未必成。若立斯人。事無不濟。讓曰。如卿言。蒲山公當自立。何來從我。對曰。事有相因。所以來者。將軍姓翟。翟者澤也。蒲非澤不生。故須將軍也。讓然之。與密情好日篤。密因說讓曰。今四海糜沸。不得耕耘。公士衆雖多。食無倉廩。唯資野掠。常苦不給。若曠日持久。加以大敵臨之。必渙然離散。未若先取滎陽。休兵館穀。待士馬肥充。然後與人爭利。讓從之。於是破金隄關。攻滎陽諸縣。多下之。滎陽太守郇王慶弘之子也。不能討。帝徙張須陁爲滎陽太守。以討之。庚戌。須陁引兵擊讓。讓疑數爲須陁所敗。聞其來。大懼。將避之。密曰。須陁勇而無謀。兵又驟勝。既驕且狠。可一戰擒也。公但列陳以待。密保爲公破之。讓不得已。勒兵將戰。密分兵千餘人。伏於大海寺北林間。須陁素輕讓。方陳而前。讓與戰不利。須陁乘之。逐北十餘里。密發伏掩之。須陁兵敗。密與讓及徐世勣。王伯當。合軍圍之。須陁潰圍出。左右不能盡出。須陁躍馬復入救之。來往數四。遂戰死。所部兵晝夜號哭。數日不止。河南郡縣爲之喪氣。鷹揚郎將河東賈務本。爲須陁之副。亦被傷。帥餘衆五千餘人。奔梁郡。務本尋卒。詔以光祿大夫裴仁基爲河南道討捕大使。代領其衆。徙鎮虎牢。讓乃令密建牙。別統所部。號蒲山公營。密部分嚴整。凡號令士卒。雖盛夏。皆如背負霜雪。躬服儉素。所得金寶。悉頒賜麾下。由是人爲之用。麾下士卒。多爲讓士卒。所陵辱。以威約有素。不敢報也。讓謂密曰。今資糧粗足。意欲還向瓦崗。公若不往。唯公所適。讓從

此別矣。讓帥輜重東引。密亦西行。至康城。說下數城。大獲資儲。讓尋悔。復引兵從密。○鄆陽賊帥操師乞。自稱元興王。建元始興。攻陷豫章郡。以其鄉人林士弘爲大將軍。詔治書侍御史劉子翊將兵討之。師乞中流矢死。士弘代統其衆。與子翊戰於彭蠡湖。子翊敗死。士弘兵大振。至十餘萬人。十二月壬辰。士弘自稱皇帝。國號楚。建元太平。遂取九江。臨川。南康。宜春等郡。豪傑爭殺隋守令。以郡縣應之。其地北自九江。南及番禺。皆爲所有。○詔以右驍衛將軍唐公李淵爲太原留守。以虎賁郎將王威。虎牙郎將高君雅。爲之副。將兵討甄翟兒。與翟兒遇於雀鼠谷。淵衆纔數千。賊圍淵數匝。李世民將精兵救之。拔淵於萬衆之中。會步兵至。合擊大破之。○帝疎薄骨肉。蔡王智積。每不自安。及病不呼醫。臨終。謂所親曰。吾今日始知得保首領。沒於地矣。○張金稱。郝孝德。孫宣雅。高士達。楊公卿等。寇掠河北。屠陷郡縣。隋將帥敗亡者相繼。唯虎賁中郎將蒲城王辯。清河郡丞華陰楊善會。數有功。善會前後與賊七百餘戰。未嘗負敗。帝遣太僕卿楊義臣討張金稱。金稱營於平恩東北。義臣引兵直抵臨清之西。據永濟渠爲營。去金稱營四十里。深溝高壘。不與戰。金稱日引兵。至義臣營西。義臣勒兵環甲。約與之戰。既而不出。日暮。金稱還營。明旦復來。如是月餘。義臣竟不出。金稱以爲怯。屢逼其營。詈辱之。義臣乃謂金稱曰。汝明旦來。我當必戰。金稱易之。不復設備。義臣簡精騎二千。夜自館陶濟河。伺金稱離營。卽入擊其累重。金稱聞之。引兵還。義臣從後擊之。金稱大敗。與左右逃於清河之東。月餘。楊善會討擒之。吏立木於市。懸其頭。張其手足。令仇家割食之。未死間。歌謳不輟。詔以善會爲清河通守。○涿郡通守郭絢。將兵萬餘人。討高士達。士達自以才略不及。竇建德乃進。建德爲軍司馬。悉以兵授之。建德請士達守輜重。自簡精兵七千人。拒絢。詐爲與士達有隙。遣人請降於絢。願爲前驅。擊士達。以自効。絢信之。引兵隨建德。至長河。不復設備。建德襲之。殺虜數千人。斬絢首。獻士達。張金稱餘衆。皆歸建德。楊義臣

乘勝至平原欲入高雞泊討之。建德謂士達曰：「歷觀隋將善用兵者，無如義臣。今滅張金稱而來，其鋒不可當。請引兵避之，使其欲戰不得，坐費歲月。將士疲倦，然後乘間擊之，乃可破也。不然，恐非公之敵。」士達不從，留建德守營，自帥精兵逆擊義臣。戰小勝，因縱酒高宴。建德聞之曰：「東海公未能破敵，遽自矜大，禍至不久矣。」後五日，義臣大破士達於陳，斬之。乘勝逐北，趣其營，營中守兵皆潰。建德與百餘騎亡去。至饒陽，乘其無備，攻陷之，收兵得三千餘人。義臣既殺士達，以為建德不足憂，引去。建德還平原，收士達散兵，收葬死者，為士達發喪，喪軍復大振。自稱將軍，先是羣盜得隋官及士族子弟皆殺之，獨建德善遇之。由是隋官稍以城降之，聲勢日盛。勝兵至十餘萬人。○內史侍郎虞世基以帝惡聞賊盜，諸將及郡縣有告敗求救者，世基皆抑損表狀，不以實聞。但云：「鼠竊狗盜，郡縣捕逐，行當殄盡。」願陛下勿以介懷。帝良以為然，或杖其使者以為妄言。由是盜賊徧海內，陷沒郡縣，帝皆弗之知也。楊義臣破降河北賊數十萬，列狀上聞。帝歎曰：「我初不聞賊頓如此，義臣降賊，何多也。」世基對曰：「小竊雖多，未足為慮。義臣克之，擁兵不少，久在闔外，此最非宜。」帝曰：「卿言是也。」遽追義臣，放散其兵。賊由是復盛。治書侍御史韋雲起劾奏世基及御史大夫裴蘊職典樞要，維持內外，四方告變不為奏聞，賊數實多，裁減言少。陛下既聞賊少，發兵不多，眾寡懸殊，往皆不克。故使官軍失利，賊黨日滋。請付有司結正其罪。大理卿鄭善果奏雲起詆訾名臣，所言不實，非毀朝政，妄作威權。由是左遷雲起為大理司直。帝至江都，江淮郡官謁見者，專問禮餉豐薄。豐則超遷丞守，薄則率從停解。江都郡丞王世充獻銅鏡、屏風，遷通守。歷陽郡丞趙元楷獻異味，遷江都郡丞。由是郡縣競務刻剝，以充貢獻。民外為盜賊所掠，內為郡縣所賦，生計無遺，加之飢饉無食，民始采樹皮葉，或擣藁為末，或煮土而食之。諸物皆盡，乃自相食，而官食猶充。物吏皆畏法，莫敢振救。王世充密為帝簡閱江淮民間美女，獻之。由是益有寵。○河間賊帥

格謙擁眾十餘萬，據豆子航，自稱燕王。帝命王世充將兵討斬之。謙將勃海高開道收其餘眾，寇掠燕地，軍勢復振。○初，帝謀伐高麗，器械資儲皆積於涿郡。涿郡人物殷阜，屯兵數萬。又臨朔宮多珍寶，諸賊競來侵掠。留守官虎賁郎將趙什住等不能拒，唯虎賁郎將雲陽羅藝獨出戰，前後破賊甚眾，威名日重。什住等陰忌之，藝將作亂，先宣言以激其眾曰：「吾輩討賊，數有功，城中倉庫山積，制在留守之官，而莫肯散施，以濟貧乏。將何以勸將士？眾皆憤怨，軍還郡丞出城候藝，藝因執之。陳兵而入，什住等懼，皆來聽命。乃發庫物以賜戰士，開倉廩以賑貧乏。境內咸服，殺不同己者，勃海太守唐禕等數人。威振燕地，柳城懷遠並歸之。藝黜柳城太守楊林甫，改郡為營州，以襄平太守鄧暉為總管。藝自稱幽州總管。○突厥數寇北邊，詔晉陽留守李淵帥太原道兵與馬邑太守王仁恭擊之。時突厥方彊，兩軍眾不滿五千，仁恭患之，淵選善騎射者二千人，使之飲食舍止，一如突厥，或與突厥遇，則伺便擊之。前後屢捷，突厥頗憚之。」

恭皇帝上

義寧元年春正月，右禦衛將軍陳稜討杜伏威。伏威帥眾拒之，稜閉壁不戰。伏威遣以婦人之服謂之陳姥，稜怒出戰，伏威奮擊大破之。稜僅以身免。伏威乘勝破高郵，引兵據歷陽，自稱總管，以輔公祏為長史，分遣諸將，絢屬縣，所至輒下。江淮間小盜爭附之。伏威常選敢死之士五千人，謂之上募，寵遇甚厚。有攻戰，輒令上募先擊之。戰罷，閱視有傷在背者，即殺之。以其退而被擊故也。所獲資財，皆以賞軍士。有戰死者，以妻妾殉葬。故人自為戰，所向無敵。丙辰，竇建德為壇於樂壽，自稱長樂王，置百官。改元丁丑。○辛巳，魯郡賊徐圓朗攻陷東平，分兵略地。自琅邪以西北至東平，盡有之。勝兵二萬餘人。○盧明月轉掠河南，至于淮北。眾

號四十萬。自稱無上王。帝命江都通守王世充討之。世充與戰於南陽。大破之。斬明月。餘衆皆散。○二月壬午朔。方鷹揚郎將梁師都殺郡丞唐世宗。據郡。自稱大丞相。北連突厥。○馬邑太守王仁恭多受貨賂。不能振施。郡人劉武周驍勇。喜任俠。爲鷹揚府校尉。仁恭以其土豪甚親厚之。令帥親兵屯閭下。武周與仁恭侍兒私通。恐事泄。謀作亂。先宣言曰。今百姓饑饉。僵尸滿道。王府君閉倉不賑。卹豈爲民父母之意乎。衆皆憤怒。武周稱疾臥家。豪傑來候問。武周椎牛縱酒。因大言曰。壯士豈能坐待溝壑。今倉粟爛積。誰能與我共取之。豪傑皆許諾。己丑。仁恭坐聽事。武周上謁。其黨張萬歲等隨入升階。斬仁恭。持其首出徇。郡中無敢動者。於是開倉以賑饑民。馳檄境內屬城。皆下之。收兵得萬餘人。武周自稱太守。遣使附于突厥。○李密說翟讓曰。今東都空虛。兵不素練。越王冲幼。留守諸官。政令不壹。士民離心。段達。元文都。閻而無謀。以僕料之。彼非將軍之敵。若將軍能用僕計。天下可指麾而定。乃遣其黨裴叔方。覘東都虛實。留守官司覺之。始爲守禦之備。且馳表告江都。密謂讓曰。事勢如此。不可不發。兵法曰。先則制於己。後則制於人。今百姓饑饉。洛口倉多積粟。去都百里有餘。將軍若親帥大衆。輕行掩襲。彼遠未能救。又先無豫備。取之如拾遺耳。比其聞知。吾已獲之。發粟以賑窮乏。遠近孰不歸附。百萬之衆。一朝可集。枕威養銳。以逸待勞。縱彼能來。吾有備矣。然後檄召四方。引賢豪而資計策。選驍悍而授兵柄。除亡隋之社稷。布將軍之政令。豈不盛哉。讓曰。此英雄之略。非僕所堪。惟君之命。盡力從事。請君先發。僕爲後殿。庚寅。密讓將精兵七千人出陽城。北踰方山。自羅口襲興洛倉。破之。開倉恣民所取。老弱襁負。道路相屬。朝散大夫時德劼。以尉氏應密。前宿城令祖君彥。自昌平往歸之。君彥。珽之子也。博學強記。文辭瞻敏。著名海內。吏部侍郎薛道衡嘗薦之於高祖。高祖曰。是歌殺斛律明月人兒邪。朕不須此輩。煬帝卽位。尤疾其名。依常調。選東平書佐。檢校宿城令。君彥自負其才。常鬱鬱思亂。密素

聞其名。得之大喜。引爲上客。軍中書檄。一以委之。越王侗遣虎賁郎將劉長恭。光祿少卿房胤。帥步騎二萬五千討密。時東都人皆以密爲饑賊。盜米。烏合易破。爭來應募。國子三館學士及貴勝親戚。皆來從軍。器械修整。衣服鮮華。旌旗鉦鼓甚盛。長恭等當其前。使河南討捕大使裴仁基等將所部兵。自汜水西入。以掩其後。約十一日會于倉城。密讓具知其計。東都兵先至。士卒未朝食。長恭等驅之度洛水。陳於石子河東。長恭等見密兵少。輕之。讓先接戰。不隊。令四隊伏橫嶺下。以待仁基。以六隊陳於石子河東。南北十餘里。密讓選驍雄。分爲十利。密帥麾下橫衝之。隋兵饑疲。遂大敗。長恭等解衣潛竄得免。奔還東都。士卒死者什五六。越王侗釋長恭等罪。慰撫之。密讓盡收其輜重器甲。威聲大振。讓於是推密爲主。上密號爲魏公。庚子。設壇場。卽位。稱元年。大赦。其文書行下。稱行軍元帥府。其魏公府置三司。六衛。元帥府置長史以下官屬。拜翟讓爲上柱國。司徒。東郡公。亦置長史以下官。減元帥府之半。以單雄信爲左武侯大將軍。徐世勣爲右武侯大將軍。各領所部。房彥藻爲元帥左長史。東郡郟元真爲右長史。楊德方爲左司馬。鄭德韜爲右司馬。祖君彥爲記室。其餘封拜各有差。於是趙魏以南。江淮以北。羣盜莫不響應。孟讓。郝孝德。王德仁。及濟陰房獻伯。上谷王君廓。長平李士才。淮陽魏六兒。李德謙。譙郡張遷。魏郡李文相。譙郡黑社。白社。濟北張青特。上洛周比。洮胡驢賊等。皆歸密。密悉拜官爵。使各領其衆。置百營簿以領之。道路降者不絕如流。衆至數十萬。乃命其護軍田茂。廣築洛口城。方四十里。而居之。密遣房彥藻將兵東略地。取安陸。汝南。淮安。濟陽。河南郡縣。多陷於密。○鴈門郡丞河東陳孝意與虎賁郎將王智辯共討劉武周。圍其桑乾鎮。壬寅。武周與突厥合兵。擊智辯。殺之。孝意奔還鴈門。三月丁卯。武周襲破樓煩郡。進取汾陽宮。獲隋宮人。以賂突厥。始畢可汗始畢以馬報之。兵勢益振。又攻陷定襄。突厥立武周爲定楊可汗。遣以狼頭纛。武周卽皇帝位。立妻沮氏爲皇后。改元天興。以衛

士楊伏念爲尙書左僕射。妹婿同縣苑君璋爲內史。令武周引兵圍鴈門。陳孝意悉力拒守。乘間出擊武周。屢破之。既而外無救援。遣間使詣江都。皆不報。孝意誓以必死。旦暮向詔敕。庫俯伏流涕。悲動左右。圍城百餘日。食盡。校尉張倫殺孝意以降。○梁師都略定雕陰。弘化。延安等郡。遂卽皇帝位。國號梁。改元永隆。始畢遣以狼頭纛號爲大度毗伽可汗。師都乃引突厥居河南之地。攻破鹽川郡。○左翊衛蒲城郭子和。坐事徙榆林。會郡中大饑。子和潛結敢死士十八人。攻郡門。執郡丞王才。數以不恤百姓。斬之。開倉賑施。自稱永樂王。改元丑平。尊其父爲太公。以其弟子政爲尙書令。子端。子升。爲左右僕射。有二千餘騎。南連梁師都。北附突厥。各遣子爲質。以自固。始畢以劉武周爲定楊天子。梁師都爲解事天子。子和爲平楊天子。子和固辭不敢當。乃更以爲屋利設。○汾陰薛舉僑居金城。驍勇絕倫。家貲鉅萬。交結豪傑。雄於西邊。爲金城府校尉。時隴右盜起。金城令郝瑗募兵得數千人。使舉將而討之。夏四月。癸未。方授甲。置酒饗士。舉與其子仁果。及同黨十三人。於坐劫瑗發兵。囚郡縣官。開倉賑施。自稱西秦霸王。改元秦興。以仁果爲齊公。少子仁越爲晉公。招集羣盜。掠官牧馬。賊帥宗羅睺帥衆歸之。以爲義興公。將軍皇甫暉將兵一萬。屯枹罕。舉選精銳二千人襲之。岷山羌酋鍾利俗擁衆二萬歸之。舉兵大振。更以仁果爲齊王。領東道行軍元帥。仁越爲晉王。兼河州刺史。羅睺爲興王。以副仁果。分兵略地。取西平。澆河二郡。未幾。盡有隴西之地。衆至十三萬。○李密以孟讓爲總管。齊郡公己丑夜。讓帥步騎二千入東都外郭。燒掠豐都市。比曉而去。於是東京居民悉遷入宮城。臺省府寺皆滿。鞏縣長柴孝和。監察御史鄭頊。以城降密。密以孝和爲護軍。頊爲右長史。裴仁基每破賊得軍資。悉以賞士卒。監軍御史蕭懷靜不許。士卒怨之。懷靜又屢求仁基長短。劾奏之。倉城之戰。仁基失期不至。聞劉長恭等敗。懼不敢進。屯百花谷。固壘自守。又恐獲罪於朝。李密知其狼狽。使人說之。啗以厚利。賈務本之子閻

甫。在軍中。勸仁基降密。仁基曰。如蕭御史何。閻甫曰。蕭君如棲上雞。若不知機變。在明公一刀耳。仁基從之。遣閻甫詣密請降。密大喜。以閻甫爲元帥。府司兵參軍兼直記室事。使之復命。遣仁基書慰納之。仁基還屯虎牢。蕭懷靜密表其事。仁基知之。遂殺懷靜。帥其衆以虎牢降密。密以仁基爲上柱國。河東公。仁基子行儼。驍勇善戰。密亦以爲上柱國。絳郡公。密得秦叔寶。及東阿程咬金。皆用爲驃騎。選軍中尤驍勇者八千人。分隸四驃騎。以自衛。號曰內軍。常曰。此八千人足當百萬。敵金後更名知節。羅士信。趙仁基。皆帥衆歸密。密署爲總管。使各統所部。癸巳。密遣裴仁基。孟讓。帥二萬餘人襲回洛倉。破之。遂燒天津橋。縱兵大掠。東都出兵擊之。仁基等敗走。密自帥衆屯回洛倉。東都兵尙二十餘萬人。乘城擊柝。晝夜不解甲。密攻偃師。金墉。皆不克。乙未。還洛口。東都城內乏糧。而布帛山積。至以絹爲汲綆。然布以繫。越王侗使人運回洛倉米入城。遣兵五千屯豐都市。五千屯上春門。五千屯北邙山。爲九營。首尾相應。以備密。丁酉。房獻伯陷汝陰。淮陽太守趙陁舉郡降密。己亥。密帥衆三萬復據回洛倉。大修營塹。以逼東都。段達等出兵七萬拒之。辛丑。戰於倉北。隋兵敗走。丁未。密使其幕府移檄郡縣。數煬帝十罪。且曰。罄南山之竹。書罪無窮。決東海之波。流惡難盡。祖君彥之辭也。越王侗遣太常丞元善達。間行賊中。詣江都。奏稱。李密有衆百萬。圍逼東都。據洛口倉。城內無食。若陛下速還。烏合必散。不然者。東都決沒。因獻欬嗚咽。帝爲之改容。虞世基進曰。越王年少。此輩誑之。若如所言。善達何緣來至。帝乃勃然怒曰。善達小人。敢廷辱我。因使經賊中。向東陽。催運。善達遂爲羣盜所殺。是後。人人杜口。莫敢以賊聞。世基容貌沈審。言多合意。特爲帝所親愛。朝臣無與爲比。親黨憑之。鬻官賣獄。賄賂公行。其門如市。由是朝野共疾。怨之。內史舍人封德彝。託附世基。以世基不閑吏務。密爲指畫。宣行詔命。諂順帝意。羣臣表疏忤旨者。皆屏而不奏。鞫獄用法。多峻文深詆。論功行賞。則抑削就薄。故世基之寵日隆。而隋

政益壞。皆德彝所爲也。○初唐公李淵娶於神武肅公竇毅。生四男。建成。世民。玄霸。元吉。一女適太子千牛備身臨汾柴紹。世民聰明勇決。識量過人。見隋室方亂。陰有安天下之志。傾身下士。散財結客。咸得其歡心。世民娶右驍衛將軍長孫晟之女。右驍衛長孫順德。晟之族弟也。與右勳侍池陽劉弘基。皆避遼東之役。亡命在晉陽。依淵。與世民善。左親衛竇琮。熾之孫也。亦亡命在太原。素與世民有隙。每以自疑。世民加意待之。出入臥內。琮意乃安。晉陽宮監猗氏裴寂。晉陽令武功劉文靜。相與同宿。見城上烽火。寂嘆曰。貧賤如此。復逢亂離。將何以自存。文靜笑曰。時事可知。吾二人相得。何憂貧賤。文靜見李、世民而異之。深自結納。謂寂曰。此非常人。豁達類漢高。神武同魏祖。年雖少。命世才也。寂初未然之。文靜坐與李密連昏。繫太原獄。世民就省之。文靜曰。天下大亂。非高光之才不能定也。世民曰。安知其無。但人不識耳。我來相省。非兒女子之情。欲與君議大事也。計將安出。文靜曰。今主上南巡江淮。李密圍逼東都。羣盜殆以萬數。當此之際。有真主。驅駕而用之。取天下如反掌耳。太原百姓皆避盜入城。文靜爲令數年。知其豪傑。一旦收拾。可得十萬人。尊公所將之兵。復且數萬。一言出口。誰敢不從。以此乘虛入關。號令天下。不過半年。帝業成矣。世民笑曰。君言正合吾意。乃陰部署賓客。淵不之知也。世民恐淵不從。猶豫久之。不敢言。淵與裴寂有舊。每相與宴語。或連日夜。文靜欲因寂關說。乃引寂與世民交。世民出私錢數百萬。使龍山令高斌廉與寂博。稍以輸之。寂大喜。由是日從世民遊。情款益狎。世民乃以其謀告之。寂許諾。會突厥寇馬邑。淵遣高君雅將兵與馬邑太守王仁恭并力拒之。仁恭君雅戰不利。淵恐并獲罪。甚憂之。世民乘間屏人說淵曰。今主上無道。百姓困窮。晉陽城外皆爲戰場。大人若守小節。下有寇盜。上有嚴刑。危亡無日。不若順民心。興義兵。轉禍爲福。此天授之時也。淵大驚曰。汝安得爲此言。吾今執汝。以告縣官。因取紙筆欲爲表。世民徐曰。世民觀天時人事如此。故敢發言。必欲執

告。不敢辭死。淵曰。吾豈忍告汝。汝慎勿出口。明日世民復說淵曰。今盜賊日繁。遍於天下。大人受詔討賊。賊可盡乎。要之終不免罪。且世人皆傳李氏當應圖讖。故李金才無罪一朝族滅。大人設能盡賊。則功高不賞。身益危矣。唯昨日之言可以救禍。此萬全之策也。願大人勿疑。淵乃嘆曰。吾一夕思汝言。亦大有理。今日破家亡軀。亦由汝。化家爲國。亦由汝矣。先是裴寂私以晉陽宮人侍淵。淵從寂飲酒酣。寂從容言曰。二郎陰養士馬。欲舉大事。正爲寂以宮人侍公。恐事覺并誅。爲此急計耳。衆情已協。公意如何。淵曰。吾兒誠有此謀。事已如此。當復奈何。正須從之耳。帝以淵與王仁恭不能禦寇。遣使者執詣江都。淵大懼。世民與寂等復說淵曰。今主昏國亂。盡忠無益。偏裨失律。而罪及明公。事已迫矣。宜早定計。且晉陽士馬精彊。宮監蓄積巨萬。以茲舉事。何患無成。代王幼冲。關中豪傑竝起。未知所附。公若鼓行而西。撫而有之。如探囊中之物耳。奈何受單使之囚。坐取夷滅乎。淵然之。密部勒將發。帝遣使遣使者馳驛赦淵及仁恭。使復舊任。淵謀亦緩。淵之爲河東討捕使也。請大理司直夏侯端爲副。端詳之孫也。善占候及相人。謂淵曰。今玉牀搖動。帝坐不安。參墟得歲。必有真人起於其分。非公而誰乎。主上猜忍。尤忌諸李。金才既死。公不思變通。必爲之次矣。淵心然之。及留守晉陽。鷹揚府司馬太原許世緒說淵曰。公姓在圖籙。名應歌謠。握五郡之兵。當四戰之地。舉事則帝業可成。端居則亡不旋踵。唯公圖之。行軍司鎧文水武士護前太子左勳衛唐憲。憲弟儉。皆勸淵舉兵。儉說淵曰。明公北招戎狄。南收豪傑。以取天下。此湯武之舉也。淵曰。湯武非所敢擬。在私則圖存。在公則拯亂。卿姑自重。吾將思之。憲。邕之孫也。時建成。元吉。尚在河東。故淵遷延未發。劉文靜謂裴寂曰。先發制人。後發制於人。何不早勸唐公舉兵。而推遷不已。且公爲宮監。而以宮人侍客。公死可爾。何誤唐公也。寂甚懼。屢趣淵起兵。淵乃使文靜詐爲敕書。發太原。西河。鴈門。馬邑。民年二十已上。五十已下。悉爲兵。期歲暮集。涿郡。擊高麗。由是

人情恟恟。思亂者益衆。及劉武周據汾陽宮。世民言於淵曰。大人爲留守。而盜賊竊據離宮。不早建大計。禍今至矣。淵乃集將佐。謂之曰。武周據汾陽宮。吾輩不能制。罪當族滅。若之何。王威等皆懼。再拜請計。淵曰。朝廷用兵。動止皆稟節度。今賊在數百里內。江都在三千里外。加以道路險要。復有他賊據之。以嬰城膠柱之兵。當巨猾豕突之勢。必不全矣。進退維谷。何爲而可。威等皆曰。公地兼親賢。同國休戚。若俟奏報。豈及事機。要在平賊。專之可也。淵陽若不得已而從之者曰。然則先當集兵。乃命世民與劉文靜。長孫順德。劉弘基等。各募兵。遠近赴集。旬日間。近萬人。仍密遣使。召建成元吉於河東。柴紹於長安。王威。高君雅。見兵大集。疑淵有異志。謂武士護曰。順德。弘基。皆背征三侍。所犯當死。安得將兵。欲收按之。士護曰。二人皆唐公客。若爾。必大致紛紜。威等乃止。留守司兵田德平。欲勸威等。按募人之狀。士護曰。討捕之兵。悉隸唐公。威君雅但寄坐耳。彼何能爲。德平亦止。晉陽鄉長劉世龍。密告淵云。威君雅欲因晉祠祈雨。爲不利。五月癸亥。夜。淵使世民。伏兵於晉陽宮城之外。甲子旦。淵與威君雅。共坐視事。使劉文靜。引開陽府司馬。胙城。劉政會。入立庭中。稱有密狀。淵目威等。取狀視之。政會不與曰。所告乃副留守事。唯唐公得視之。淵陽驚曰。豈有是邪。視其狀。乃云。威君雅潛引突厥入寇。君雅攘袂大詬曰。此乃反者欲殺我耳。時世民已布兵塞衢路。文靜因與劉弘基。長孫順德等。共執威君雅繫獄。丙寅。突厥數萬衆。寇晉陽。輕騎入外郭北門。出其東門。淵命裴寂等。勒兵爲備。而悉開諸城門。突厥不能測。莫敢進。衆以爲威君雅實召之也。淵於是斬威君雅。以徇。淵部將王康達。將千餘人出戰。皆死。城中惶懼。淵夜遣軍潛出城。旦則張旗鳴鼓。自他道來。如援軍者。突厥終疑之。留城外二日。大掠而去。○煬帝命監門將軍涇陽龐玉。虎賁郎將霍世舉。將關內兵。援東都。柴孝和說李密曰。秦地山川之固。秦漢所憑。以成王業者也。今不若使翟司徒守洛口。裴柱國守回洛。明公自簡精銳。西襲長安。既克京邑。業

固兵彊。然後東向以平河洛。傳檄而天下定矣。方今隋失其鹿。豪傑競逐。不早爲之。必有先我者。悔無及矣。密曰。此誠上策。吾亦思之久矣。但昏主尙存。從兵猶衆。我所部皆山東人。見洛陽未下。誰肯從我西入。諸將出於羣盜。留之。各競雌雄。如此。則大業隳矣。孝和曰。然則大軍既未可西上。僕請問行觀望。密許之。孝和與數十騎。至陝縣。山賊歸之者萬餘人。時密兵鋒甚銳。每入苑。與隋兵連戰。會密爲流矢所中。尙臥營中。丁丑。越王侗使段達與龐玉等。夜出兵。陳於回洛倉西北。密與裴仁基出戰。達等大破之。殺傷太半。密乃奔回洛。奔洛口。龐玉霍世舉。軍於偃師。柴孝和之衆。聞密退。各散去。孝和輕騎歸密。楊德方。鄭德韜。皆死。密以鄭頊爲左司馬。柴陽。鄭乾象爲右司馬。○李建成。李元吉。奔其弟智雲於河東而去。更執智雲。送長安。殺之。建成。元吉。遇柴紹於道。與之偕行。

資治通鑑卷第一百八十三

資治通鑑卷第一百八十四

隋紀八

恭皇帝下

義寧元年六月己卯李建成等至晉陽。○劉文靜勸李淵與突厥相結資其士馬以益兵勢。淵從之。自爲手啓卑辭厚禮遣始畢可汗云欲大舉義兵遠迎主上復與突厥和親如開皇之時若能與我俱南願勿侵暴百姓若但和親坐受寶貨亦唯可汗所擇始畢得啓謂其大臣曰隋主爲人我所知也若迎以來必害唐公而擊我無疑矣苟唐公自爲天子我當不避盛暑以兵馬助之卽命以此意爲復書使者七日而返將佐皆喜請從突厥之言淵不可表寂劉文靜皆曰今義兵雖集而戎馬殊乏胡兵非所須而馬不可失若復稽回恐其有悔淵曰諸君宜更思其次寂等乃請尊天子爲太上皇立代王爲帝以安隋室移檄郡縣改易旗幟雜用絳白以示突厥淵曰此可謂掩耳盜鍾然逼於時事不得不爾乃許之遣使以此議告突厥西河郡不從淵命甲申淵使建成世民將兵擊西河命太原令太原溫大有與之偕行曰吾兒年少以卿參謀軍事事之成敗當以此行卜之時軍士新集咸未閱習建成世民與之同甘苦遇敵則以身先之近道菜果非買不食軍士有竊之者輒求其主償之亦不詰竊者軍士及民皆感悅至西河城下民有欲入城者皆聽其入郡丞高德儒閉城拒守己丑攻拔之執德儒至軍門世民數之曰汝指野鳥爲鸞以欺人主取高官吾與義兵正爲誅佞人耳遂斬之自餘不戮一人秋毫無犯各尉撫使復業遠近聞之大悅建成等引兵還晉陽

往返凡九日淵喜曰以此行兵雖橫行天下可也遂定入關之計淵開倉以賑貧民應募者日益多淵命爲三軍分左右通謂之義士裴寂等上淵號爲大將軍癸巳建大將軍府以寂爲長史劉文靜爲司馬唐儉及前長安尉溫大雅爲記室大雅仍與弟大有共掌機密武士驥爲鎧曹劉政會及武城崔善爲太原張道源爲戶曹晉陽長上邽姜暮爲司功參軍太谷長段開山爲府掾長孫順德劉弘基竇琮及鷹揚郎將高平王長諧天水姜寶誼陽屯爲左右統軍自餘文武隨才授任又以世子建成爲隴西公左領軍大都督右三統軍隸焉世民爲敦煌公右領軍大都督右三統軍隸焉各置官屬以柴紹爲右領軍府長史諮議譙人劉瞻領西河通守道源名河開山名嶠皆以字行開山不害之孫也○李密復帥衆向東都丙申大戰于平樂園密左騎右步中列彊弩鳴千鼓以衝之東都兵大敗密復取回洛倉○突厥遣其柱國康鞘利等送馬千匹詣李淵爲互市許發兵送淵入關多少隨所欲丁酉淵引見康鞘利等受可汗書禮容盡恭贈遺康鞘利等甚厚擇其馬之善者止市其半義士請以私錢市其餘淵曰虜饒馬而貪利其來將不已恐汝不能市也吾所以少取者示貧且不以爲急故也當爲汝費之不足爲汝費乙巳靈壽賊帥鄒士陵帥衆數千降於淵淵以爲鎮東將軍燕郡公仍置鎮東府補僚屬以招撫山東郡縣己巳康鞘利北還淵命劉文靜使於突厥以請兵私謂文靜曰胡騎入中國生民之大蠹也吾所以欲得之者恐劉武周引之共爲邊患又胡馬行牧不費芻粟聊欲藉之以爲聲勢耳數百人之外無所用之○秋七月煬帝遣江都通守王世充將江淮勁卒將軍王隆帥邛黃蠻河北大使太常少卿韋霽河南大使虎牙郎將王辯等各帥所領同赴東都相和相討李密霽世康之子也○壬子李淵以子元吉爲太原太守留守晉陽宮後事悉以委之癸丑淵帥甲士三萬發晉陽立軍門警衆并移檄郡縣諭以尊立代王之意西突厥阿史那大奈亦帥其衆以從甲寅遣通議大夫張綸將兵

徇稽胡丙辰。淵至西河。慰勞吏民。賑贍窮乏。民年七十以上。皆除散官。其餘豪俊。隨才授任。口詢功能。手注官秩。一日除千餘人。受官皆不取。告身各分。淵所書官名而去。淵入雀鼠谷。壬戌。軍賈胡堡。去霍邑五十餘里。代王侑遣虎牙郎將宋老生。帥精兵二萬屯霍邑。左武侯大將軍屈突通屯河東。以拒淵。會積雨。淵不得進。遣府佐沈叔安等將羸兵還太原。更運一月糧。乙丑。張綸克離石。殺太守楊子崇。劉文靜至突厥。見始畢可汗請兵。且與之約曰。若入長安。民衆土地入唐。公金玉帛歸突厥。始畢大喜。丙寅。遣其大臣級失特勒。先至淵軍。告以兵已上道。淵以書招李密。密自恃兵彊。欲爲盟主。使祖君彥復書曰。與兄派流雖異。根系本同。自唯虛薄。爲四海英雄。共推盟主。所望左提右挈。戮力同心。執子嬰於咸陽。殪商辛於牧野。豈不盛哉。且欲使淵以步騎數千。自至河內。面結盟約。淵得書笑曰。密妄自矜大。非折簡可致。吾方有事關中。若遽絕之。乃是更生一敵。不如卑辭推獎。以驕其志。使爲我塞成阜之道。綴東都之兵。我得專意西征。俟關中平定。據險養威。徐觀鵠蚌之勢。以收漁人之功。未爲晚也。乃使溫大雅復書曰。吾雖庸劣。幸承餘緒。出爲八使。入典六屯。顛而不扶。通賢所責。所以大會義兵。和親北狄。共匡天下。志在尊隋。天生丞民。必有司牧。當今爲牧。非子而誰。老夫年逾知命。願不及此。欣戴大弟。攀鱗附翼。唯弟早膺圖籙。以寧兆民。宗盟之長。屬籍見容。復封於唐。斯榮足矣。殪商辛於牧野。所不忍言。執子嬰於咸陽。未敢聞命。汾晉左右。尙須安輯。盟津之會。未暇卜期。密得書甚喜。以示將佐曰。唐公見推。天下不足定矣。自是信使往來不絕。雨久不止。淵軍中糧乏。劉文靜未返。或傳突厥與劉武周乘虛襲晉陽。淵召將佐謀。北還。裴寂等皆曰。宋老生屈突通連兵據險。未易猝下。李密雖云連和。姦謀難測。突厥貪而無信。唯利是視。武周事胡者也。太原一方都會。且義兵家屬在焉。不如還救根本。更圖後舉。李世民曰。今禾菽被野。何憂乏糧。老生輕躁。一戰可擒。李密願戀倉粟。未遑遠略。武周與突厥。

外雖相附。內實相猜。武周雖遠利太原。豈可近忘馬邑。本興大義。奮不顧身。以救蒼生。當先入咸陽。號令天下。今遇小敵。遽已班師。恐從義之徒。一朝解體。還守太原一城之地。爲賊耳。何以自全。李建成亦以爲然。淵不聽。促令引發。世民將復入諫。會日暮。淵已寢。世民不得入。號哭於外。聲聞帳中。淵召問之。世民曰。今兵以義動。進戰則克。退還則散。衆散於前。敵乘於後。死亡無日。何得不悲。淵乃悟曰。軍已發。奈何。世民曰。右軍嚴而未發。左軍雖去。計亦未遠。請自追之。淵笑曰。吾之成敗。皆在爾。知復何言。唯爾所爲。世民乃與建成。夜追左軍。復還。丙子。太原運糧亦至。○武威鷹揚府司馬李軌。家富好任俠。薛舉作亂於金城。軌與同郡曹珍。關謹。梁碩。李贇。安修仁等謀曰。薛舉必來侵暴。郡官庸怯。勢不能禦。吾輩豈可束手。并妻孥爲人所虜邪。不若相與并力拒之。保據河右。以待天下之變。衆皆以爲然。欲推一人爲主。各相讓。莫肯當。曹珍曰。久聞圖讖。李氏當王。今軌在謀中。乃天命也。遂相與拜軌。奉以爲主。丙辰。軌令修仁集諸胡。軌結民間豪傑。共起兵。執虎賁郎將謝統師。郡丞韋士政。軌自稱河西大涼王。置官屬。竝擬開皇故事。關謹等欲盡殺隋官。分其家貲。軌曰。諸人既逼以爲主。當稟其號令。今興義兵。以救生民。乃殺人取貨。此羣盜耳。將何以濟。於是統師爲太僕卿。士政爲太府卿。西突厥闕達度設。據會寧川。自稱闕可汗。請降於軌。○薛舉自稱秦帝。立其妻鞠氏爲皇后。子仁果爲皇太子。遣仁果將兵圍天水。克之。舉自金城徙都之。仁果多力。善騎射。軍中號萬人敵。然性貪而好殺。嘗獲庾信子立。怒其不降。磔於火上。稍割以噉軍士。及克天水。悉召富人。倒懸之。以醋灌鼻。責其金寶。舉每戒之曰。汝之才略。足以辦事。然苛虐無恩。終當覆我國家。舉遣晉王仁越將兵趨劔口。至河池郡。太守蕭瑀拒却之。又遣其將常仲興。濟河擊李軌。與軌將李贇戰於昌松。仲興舉軍敗沒。軌欲縱遣之。贇曰。力戰獲俘。復縱以資敵。將焉用之。不如盡阬之。軌曰。天若祚我。當擒其主。此屬終爲我有。若其無成。留之何益。乃縱

之未幾。攻張掖。敦煌。西平。枹罕。皆克之。盡有河西五郡之地。○煬帝詔左禦衛大將軍涿郡留守薛世雄將燕地精兵三萬討李密。命王世充等諸將皆受世雄節度。所過盜賊隨便誅翦。世雄行至河間。軍於七里井。竇建德士衆惶懼。悉拔諸城。南遁。聲言還入豆子航。世雄以爲畏己。不復設備。建德謀還襲之。其處去世雄營百四十里。建德帥敢死士二百八十人先行。令餘衆續發。建德與其士衆約曰。夜至則擊其營。已明則降之。未至一里所。天欲明。建德惶惑。議降。會天大霧。人咫尺不相辨。建德喜曰。天贊我也。遂突入其營。擊之。世雄士卒大亂。皆騰柵走。世雄不能禁。與左右數十騎遁歸涿郡。慙患發病卒。建德遂圍河間。○八月己卯。雨霽。庚辰。李淵命軍中曝鎧仗行裝。辛巳。東山由山足細道趣霍邑。淵恐宋老生不出。李建德。李密曰。老生勇而無謀。以輕騎挑之。理無不出。脫其固守。則誣以貳於我。彼恐爲左右所奏。安敢不出。淵曰。汝測之善。老生不能逆戰。買胡吾知其無能爲也。淵與數百騎先至霍邑。城東數里。以待步兵。使建成世民將數十騎至城下。舉鞭指麾。若將圍城之狀。且詬之。老生怒。引兵三萬自東門南門分道而出。淵使殷開山趣召後軍。後軍至。淵欲使軍士先食而戰。世民曰。時不可失。淵乃與建成陳於城東。世民陳於城南。淵建成戰小却。世民與軍頭臨淄段志玄自南原引兵馳下。衝老生陳。出其背。世民手殺數十人。兩刀皆缺。流血滿袖。灑之復戰。淵兵復振。因傳呼曰。已獲老生矣。老生兵大敗。淵兵先趣其門。門閉。老生下馬投壘。劉弘基就斬之。僵尸數里。日已暮。淵即命登城。時無攻具。將士肉薄而登。遂克之。淵賞霍邑之功。軍吏疑奴應募者不得與良人同。淵曰。矢石之間。不辨貴賤。論勳之際。何有等差。宜並從本勳授。壬午。淵引見霍邑吏民。勞賞如西河。選其丁壯。使從軍。關中軍士欲歸者。並授五品散官。遣歸。或諫以官太濫。淵曰。隋氏吝惜勳賞。此所以失人心也。柰何效之。且收衆以官。不勝於用兵乎。丙戌。淵入臨汾郡。慰撫如霍邑。庚寅。宿鼓山絳郡通守陳叔達拒守。辛卯。進

攻克之。叔達。陳高宗之子。有才學。淵禮而用之。癸巳。淵至龍門。劉文靜。康鞘利。以突厥兵五百人。馬二千匹。來至。淵喜其來緩。謂文靜曰。吾西行及河。突厥始至。兵少馬多。皆君將命之功也。汾陽薛大鼎。說淵請勿攻河東。自龍門直濟河。據永豐倉。傳檄遠近。關中可坐取也。淵將從之。諸將請先攻河東。乃以大鼎爲大將軍。府察非豫。河東縣戶曹任瓌。說淵曰。關中豪傑皆企踵以待義兵。瓌在馮翊積年。知其豪傑。請往諭之。必從風而靡。義師自梁山濟河。指韓城。逼邵陽。蕭造文吏。必當望塵請服。孫華之徒。皆當遠迎。然後鼓行而進。直據永豐。雖未得長安。關中固已定矣。淵悅。以瓌爲銀青光祿大夫。時關中羣盜。孫華最彊。丙申。淵至汾陰。以書招之。己亥。淵軍進壺口。河濱之民。獻舟者。日以百數。仍置水軍。壬寅。孫華自邵陽輕騎渡河。見淵。淵握手與坐。慰獎之。以華爲左光祿大夫。武鄉縣公。領馮翊太守。其徒有功者。委華以次授官。賞賜甚厚。使之先濟。繼遣左右統軍王長諧。劉弘基。及左領軍長史陳演壽。金紫光祿大夫史大奈。將步騎六千。自梁山濟營於河西。以待大軍。以任瓌爲招慰大使。瓌說韓城下之。淵謂長諧曰。屈突通精兵不少。相去五十餘里。不敢來戰。足明其衆不爲之用。然通畏罪。不敢不出。若自濟河。擊卿等。則我進攻河東。必不能守。若全軍守城。則卿等絕其河梁。前扼其喉。後拊其背。彼不走。必爲擒矣。○曉果從煬帝在江都者。多逃去。帝患之。以問裴矩。對曰。人情非有匹偶。難以久處。請聽軍士於此納室。帝從之。九月。悉召江都境內寡婦處女。集宮下。恣將士所取。或先與姦者。聽自首。即以配之。○武陽郡丞元寶藏。以郡降李密。甲寅。密以寶藏爲上柱國。武陽公。寶藏使其客鉅鹿魏徵。爲啓謝密。且請改武陽爲魏州。又請帥所部。西取魏郡。南會諸將。取黎陽倉。密喜。即以寶藏爲魏州總管。召魏徵爲元帥。府文學參軍。掌記室。徵少孤貧。好讀書。有大志。落拓不事生業。始爲道士。寶藏召典書記。密愛其文辭。故召之。初。貴鄉長弘農魏德深。爲政清靜。不嚴而治。遼東之役。徵稅百端。使者旁午。責成

郡縣民不堪命。唯貴鄉閭里不擾。有無相通。不竭其力。所求皆給。元寶藏受詔捕賊。數調器械。動以軍法從事。其鄰城營造皆聚於聽事。官吏遞相督責。晝夜喧囂。猶不能濟。德深聽隨。便修營。官府寂然。恆若無事。唯戒吏以不須過勝餘縣。使百姓勞苦。然民各自竭心。常爲諸縣之最。民愛之如父母。寶藏深害其能。遣將千兵赴東都。所領兵聞寶藏降密。思其親戚。輒出都門。東向慟哭而返。或勸之降密。皆泣曰。我與魏明府同來。何忍棄去。河南山東大水。餓殍滿野。煬帝詔開黎陽倉賑之。吏不時給。死者日數萬人。徐世勣言於李密曰。天下大亂。本爲饑饉。今更得黎陽倉。大事濟矣。密遣世勣帥麾下五千人。自原武濟河。會元寶藏。郝孝德。李文相。及洹水賊帥張升。清河賊帥趙君德。共襲破黎陽倉。據之。開倉。恣民就食。浹旬間。得勝兵二十餘萬。武安。永安。義陽。弋陽。齊郡。相繼降密。寶建德。朱粲之徒。亦遣使附密。密以粲爲楊州總管。鄧公。泰山道士徐洪客。獻書於密。以爲大衆久聚。恐米盡人散。師老厭戰。難以成。功。勸密乘進取之機。因士馬之銳。沿流東指。直向江都。執取獨夫。號令天下。密壯其言。以書招之。洪客竟不出。莫知所之。○乙卯。張綸。徐龍泉。文成等郡皆下之。獲文成。太守鄭元璠。元璠。譯之子也。○屈突通遣虎牙郎將桑顯和。將驍果數千人。夜襲王長諧等營。長諧等戰不利。孫華。史大奈。以遊騎自後擊顯和。大破之。顯和脫走入城。仍自絕河梁。丙辰。馮翊太守蕭造。降於李淵。造。脩之子也。戊午。淵帥諸軍圍河東。屈突通嬰城自守。將佐復推淵領太尉。增置官屬。淵從之。時河東未下。三輔豪傑。至者日以千數。淵欲引兵西趣長安。猶豫未決。裴寂曰。屈突通擁大衆。憑堅城。吾捨之而去。若進攻長安不克。退爲河東所踵。腹背受敵。此危道也。不若先克河東。然後西上。長安恃通爲援。通敗。長安必破矣。李世民曰。不然。兵貴神速。吾席累勝之威。撫歸順之衆。鼓行而西。長安之人望風震駭。智不及謀。勇不及斷。取之若振槁葉耳。若淹留自弊於堅城之下。彼得成謀。脩備以待。我坐費日月。衆心離沮。則大事去矣。

且關中蜂起之將。未有所屬。不可不早招懷也。屈突通自守虜耳。不足爲慮。淵兩從之。留諸將圍河東。自引軍而西。朝邑法曹武功。斬孝謨。以蒲津中潭二城降。華陰令李孝常。以永豐倉降。仍應接河西諸軍。孝常。圓通之子也。京兆諸縣。亦多遣使請降。○王世充。韋霽。王辯。及河內通守孟善。誼。河陽郡尉獨孤武都。各帥所領。會東都。唯王隆後期不至。己未。越王侗使虎賁郎將劉長恭等。帥留守兵。龐玉等帥偃師兵。與世充等。合十餘萬衆。擊李密於洛口。與密夾洛水相守。煬帝詔諸軍。皆受世充節度。帝遣攝江都郡丞馮慈明。向東都。爲密所獲。密素聞其名。延坐勞問。禮意甚厚。因謂曰。隋祚已盡。公能與孤立大功乎。慈明曰。公家歷事先朝。榮祿兼備。不能善守門閤。乃與玄感舉兵。偶脫罔羅。得有今日。唯圖反噬。未諭高旨。莽卓敦玄。非不彊盛。一朝夷滅。罪及祖宗。僕死而後已。不敢聞命。密怒囚之。慈明說防人席務本。使亡走。奉表江都。及致書東都。論賊形勢。至雍丘。爲密將李公逸所獲。密又義而釋之。出至營門。翟讓殺之。慈明。子琮之子也。密之克洛口也。箕山府郎將張季珣。固守不下。密以其寡弱。遣人呼之。季珣罵密極口。密怒。遣兵攻之。不能克。時密衆數十萬。在其城下。季珣四面阻絕。所領不過數百人。而執志彌固。誓以必死。久之。糧盡水竭。士卒羸病。季珣猶欲降之。誘諭終叛。自三月。至于是月。城遂陷。季珣見密。不肯拜曰。天子爪牙。何容拜賊。密猶欲降之。誘諭終不屈。乃殺之。季珣。祥之子也。○庚申。李淵帥諸軍。濟河。甲子。至朝邑。舍於長春宮。關中士民歸之者如市。丙寅。淵遣世子建成。司馬劉文靜。帥王長諧等諸軍數萬人。屯永豐倉。守潼關。以備東方兵。慰撫使竇軌等。受其節度。敦煌公世民。帥劉弘基等諸軍數萬人。徇渭北。慰撫使殷開山等。受其節度。軌。琮之兄也。冠氏長子志寧。安養尉顏師古。及世民婦兄長孫無忌。謁見淵於長春宮。師古名籀。以字行。志寧。宣敏之兄子。師古。之推之孫也。皆以文學知名。無忌。仍有才略。淵皆禮而用之。以志寧爲記室。師古爲朝散大夫。無忌爲渭北行軍典籤。屈突

通開淵西入。署鷹揚郎將湯陰堯君素，領河東通守，使守蒲坂。自引兵數萬，趣長安，爲劉文靜所遏。將軍劉綱、成潼關，屯都尉南城，通欲往依之。王長諧先引兵襲斬綱，據城以拒通。通退保北城，淵遣其將呂紹宗等攻河東，不能克。柴紹之自長安赴太原也，謂其妻李氏曰：「尊公舉兵，今偕行則不可，留此則及禍，奈何？」李氏曰：「君弟速行，我一婦人，易以潛匿，當自爲計。」紹遂行。李氏歸鄠縣別墅，散家貲，聚徒衆，淵從弟神通在長安，亡入鄠縣山中，與長安大俠史萬寶等起兵以應淵。西域商胡何潘仁入司竹園爲盜，有衆數萬，劫前尚書右丞李綱爲長史。李氏使其奴馬三寶說潘仁與之就神通，合勢攻鄠縣，下之。神通衆逾一萬，自稱關中道行軍總管，以前樂城長令狐德葵爲記室，德葵之子也。李氏又使馬三寶說羣盜李仲文、向善志、丘師利等皆帥衆從之。仲文、密之從父，師利和之子也。西京留守屢遣兵討潘仁等，皆爲所敗。李氏徇盩厔，武功，始平，皆下之。衆至七萬，左親衛段綸、文振之子也。娶淵女，亦聚徒於藍田，得萬餘人。及淵濟河，神通、李氏各遣使迎淵。淵以神通爲光祿大夫，子道彥爲朝請大夫，綸爲金紫光祿大夫，使柴紹將數百騎竝南山迎李氏。何潘仁、李仲文、向善志及關中羣盜皆請降於淵。淵一一以書慰勞，授官，使各居其所，受敦煌公世民節度，刑部尚書領京兆內史衛文昇年老，聞淵兵向長安，憂懼成疾，不復預事。獨左翊衛將軍陰世師、京兆郡丞骨儀、奉代王侑、乘城拒守，已已，淵如蒲津。庚午，自臨晉濟渭，至永豐，勞軍，開倉賑飢民。辛未，還長春宮。壬申，進屯馮翊，世民所至，吏民及羣盜歸之如流。世民收其豪俊以備僚屬，營于涇陽，勝兵九萬。李氏將精兵萬餘，會世民於渭北，與柴紹各置幕府，號娘子軍。先是，平涼奴賊數萬圍扶風太守竇璡，數月不下，賊中食盡，丘師利遣其弟行恭帥五百人負米麥，持牛酒詣奴賊營，奴帥長揖行恭，手斬之，謂其衆曰：「汝輩皆良人，何故事奴爲主？使天下謂之奴賊，衆皆俯伏曰：『願改事公。』行恭即帥其衆與師利共謁世民於渭北，世民以爲光祿

大夫，璡之從子也。隰城尉房玄齡謁世民於軍門，世民一見如舊識，署記室參軍，引爲謀主。玄齡亦自以爲遇知己，罄竭心力，知無不爲。淵命劉弘基殷開山分兵西略扶風，有衆六萬，南度渭水，屯長安故城，城中出戰，弘基逆擊破之。世民引兵趣司竹，李仲文、何潘仁、向善志皆帥衆從之，頓于阿城，勝兵十三萬。軍令嚴整，秋毫不犯。乙亥，世民自盩厔遣使白淵，請期日赴長安。淵曰：「屈突東行不能復西，不足虞矣。乃命建成選倉上精兵，自新豐趣長樂宮，世民帥新附諸軍北屯長安故城，至竝聽教。延安上郡、雕陰皆請降於淵。丙子，淵引軍西行，所過離宮園苑皆罷之，出宮女，還其親屬。冬十月辛巳，淵至長安，營於春明門之西北，諸軍皆集，合二十餘萬。淵命各依壘壁，毋得入村落，侵暴屢遣使至城下，諭衛文昇等以欲尊隋之意，不報。辛卯，命諸軍進圍城。甲午，淵遷館於安興坊。○巴陵校尉鄱陽董景珍、雷世猛、旅帥鄭文秀、許玄徹、萬瓚、徐德基、郭華、沔陽張繡等謀據郡叛隋，推景珍爲主。景珍曰：「吾素寒賤，不爲衆所服。」羅川令蕭銑、梁室之後，寬仁大度，請奉之以從衆望，乃遣使報銑，銑喜從之。聲言討賊，召募得數千人，銑、巖之孫也。會潁川賊帥沈柳生寇羅川，銑與戰不利，因謂其衆曰：「今天下皆叛，隋政不行，巴陵豪傑起兵，欲奉吾爲主，若從其請，以號令江南，可以中興梁祚。」以此召柳生，亦當從吾矣。衆皆悅聽命。乃自稱梁公，改隋服色旗幟，皆如梁舊。柳生即帥衆歸之，以柳生爲車騎大將軍，起兵五日，遠近歸附者至數萬人。遂帥衆向巴陵。景珍遣徐德基帥郡中豪傑數百人出迎，未及見銑，柳生與其黨謀曰：「我先奉梁公，勳居第一。今巴陵諸將皆位高兵多，我若入城，返出其下，不如殺德基，質其首領，獨挾梁公進取郡城，則無出我右者矣。」遂殺德基，入白銑，銑大驚曰：「今欲撥亂反正，忽自相殺，吾不能爲若主矣。」因步出軍門，柳生大懼，伏地請罪，銑責而赦之。陳兵入城，景珍言於銑曰：「徐德基建義功臣，而柳生無故擅殺之，此而不誅，何以爲政？且柳生爲盜日久，今雖從義，凶悖不移，共處一城，勢必爲

變。失今不取。後悔無及。銑又從之。景珍收柳生斬之。其徒皆潰去。丙申。銑築壇燔燎。自稱梁王。改元鳴鳳。○壬寅。王世充夜度洛水。營於黑石。明日。分兵守營。自將精兵陳於洛北。李密聞之。引兵度洛逆戰。密兵大敗。柴孝和溺死。密帥麾下精騎度洛南。餘衆東走。月城。世充追圍之。密自洛南策馬直趣黑石。營中懼。連舉六烽。世充釋月城之圍。狼狽自救。密還與戰。大破之。斬首三千餘級。○甲辰。李淵命諸軍攻城。約毋得犯七廟。及代王宗室。違者夷三族。孫華中流矢卒。十一月丙辰。軍頭雷永吉先登。遂克長安。代王在東宮。左右奔散。唯侍讀姚思廉侍側。軍士將登殿。思廉厲聲訶之曰。唐公舉義兵。匡帝室。卿等毋得無禮。衆皆愕然。布立庭下。淵迎王於東宮。遷居大興殿後。聽思廉扶王。至順陽閣下。泣拜而去。思廉察之子也。淵還舍於長樂宮。與民約法十二條。悉除隋苛禁。淵之起兵也。留守官發其墳墓。毀其五廟。至是。衛文昇已卒。戊午。執陰世師。骨儀等。數以貪婪苛酷。且拒義師。俱斬之。死者十餘人。餘無所問。馬邑郡丞三原李靖。素與淵有隙。淵入城。將斬之。靖大呼曰。公興義兵。欲平暴亂。乃以私怨殺壯士乎。世民爲之固請。乃捨之。世民因召置幕府。靖少負志氣。有文武才略。其舅韓擒虎。每撫之曰。可與言將帥之略者。獨此子耳。○王世充自洛北之敗。堅壁不出。越王侗遣使勞之。世充慙懼。請戰於密。丙辰。世充與密夾石子河而陳。密布陳南北十餘里。翟讓先與世充戰。不利而退。世充逐之。王伯當。裴仁基。從旁橫斷其後。密勒中軍擊之。世充大敗。西走。翟讓司馬王儒信。勸讓自爲大冢宰。總統衆務。以奪密權。讓不從。讓兄柱國滎陽公弘。粗愚人也。謂讓曰。天子汝當自爲。奈何與人。汝不爲者。我當爲之。讓但大笑。不以爲意。密聞而惡之。總管崔世樞。自鄴陵初附於密。讓囚之私府。責其貨。世樞營求未辦。遽欲加刑。讓召元帥府記室邢義期。博逡巡未就。杖之八十。讓謂左長史房彥藻曰。君前破汝南。大得寶貨。獨與魏公。全不與我。魏公我之所立。事未可知。彥藻懼。以狀告密。因與左司馬鄭頊共說密曰。讓

貪懷不仁。有無君之心。宜早圖之。密曰。今安危未定。遽相誅殺。何以示遠。頊曰。毒虵螫手。壯士解腕。所全者大故也。彼先得志。悔無所及。密乃從之。置酒召讓。戊午。讓與兄弘及兒子司徒府長史摩侯。同詣密。密與讓。弘。裴仁基。郝孝德。共坐。單雄信等皆立侍。房彥藻。鄭頊。往來檢校。密曰。今日與達官飲。不須多人。左右止留給使而已。密左右皆引去。讓左右猶在。彥藻白密曰。今方爲樂。天時甚寒。司徒左右請給酒食。密曰。聽司徒進止。讓曰。甚佳。乃引讓左右盡出。獨密下壯士蔡建德。持刀立侍。食未進。密出良弓。與讓習射。讓方引滿。建德自後斫之。踏於牀前。聲若牛吼。并弘。摩侯。儒信。皆殺之。徐世勣走出。門者斫之傷頸。王伯當遙訶止之。單雄信叩頭請命。密釋之。左右驚擾。莫知所爲。密大言曰。與君等同起義兵。本除暴亂。司徒專行貪虐。陵虐羣僚。無復上下。今所誅止其一家。諸君無預也。命扶徐世勣置幕下。親爲傅瘡。讓麾下欲散。密使單雄信前往宣慰。密尋獨騎入其營。歷加撫諭。令世勣。雄信。伯當。分領其衆。中外遂定。讓殘忍。摩侯猜忌。儒信貪縱。故死之日。所部無哀之者。然密之將佐。始有自疑之心矣。始王世充知讓與密必不久睦。冀其相圖。得從而乘之。及聞讓死。大失望。歎曰。李密。天資明決。爲龍爲蛇。固不可測也。○壬戌。李淵備法駕。迎代王。卽皇帝位於天興殿。時年十三。大赦。改元。遙尊煬帝爲太上皇。甲子。淵自長樂宮入長安。以淵爲假黃鉞。使持節。大都督。內外諸軍事。尚書令。大丞相。進封唐王。以武德殿爲丞相府。改教稱令。日於虔化門視事。乙丑。榆林。靈武。平涼。安定。諸郡。皆遣使請命。丙寅。詔軍國機務。事無大小。文武設官。位無貴賤。憲章賞罰。咸歸相府。唯郊祀天地。四時禘祫。奏聞置丞。相府官屬。以裴寂爲長史。劉文靜爲司馬。何潘仁使李綱入見。淵留之。以爲丞相府司錄。專掌選事。又以前者功郎中竇威爲司錄參軍。使定禮儀。威。熾之子也。淵傾府庫。以賜勳人。國用不足。右光祿大夫劉世龍獻策。以爲。今義師數萬。竝在京師。樵蘇貴而布帛賤。請伐六街及苑中樹爲樵。以易布帛。可得數

十萬匹。淵從之。己巳。以李建成爲唐世子。李世民爲京兆尹。秦公李元吉爲齊公。○河南諸郡。盡附李密。唯滎陽太守郇王慶。梁郡太守楊汪。尚爲隋守。密以書招慶。爲陳利害。且曰。王之家世。本住山東。本姓郭氏。乃非楊族。芝焚蕙歎。事不同此。初慶祖父元孫。早孤。隨母郭氏。養於舅族。及武元帝從周文起兵關中。元孫在鄴。恐爲高氏所誅。冒姓郭氏。故密云然。慶得書。惶恐。卽以郡降密。復姓郭氏。○十二月。癸未。追諡唐王淵大父襄公爲景王。考仁公爲元王。夫人竇氏爲穆妃。○薛舉遣其子仁果。寇扶風。唐弼據汧源。拒之。舉遣使招弼。弼乃殺李弘芝。請降於舉。仁果乘其無備。襲破之。悉并其衆。弼以數百騎。走詣扶風。請降。扶風太守竇璉。殺之。舉勢益張。衆號三十萬。謀取長安。聞丞相淵已定長安。遂圍扶風。淵使李世民將兵擊之。又使姜暮。竇軌。俱出散關。安撫隴右。左光祿大夫李孝恭。招慰山南。府戶曹張道源。招慰山東。孝恭。淵之從父兄子也。癸巳。世民擊薛仁果於扶風。大破之。追奔至壠坻。而還。薛舉大懼。問其羣臣曰。自古天子。有降事乎。黃門侍郎錢唐褚亮曰。趙佗歸漢。劉禪仕晉。近世蕭琮。至今猶貴。轉禍爲福。自古有之。衛尉卿郝瑗。趨進曰。陛下失問。褚亮之言。又何悖也。昔漢高祖。屢經奔敗。蜀先主。亟亡妻子。卒成大業。陛下奈何。一戰不利。遽爲亡國之計乎。舉亦悔之曰。聊以此試君等耳。乃厚賞瑗。引爲謀主。○乙未。平涼留守張隆。丁酉。河池太守蕭瑀。及扶風。漢陽郡。相繼來降。以竇璉爲工部尚書。燕國公蕭瑀爲禮部尚書。宋國公。○姜暮。竇軌。進至長道。爲薛舉所敗。引還。淵使通議大夫醴泉劉世讓。安集唐弼餘黨。與舉相遇。戰敗。爲舉所虜。○李孝恭擊破朱榮。諸將請盡殺其俘。孝恭曰。不可。自是以往。誰復肯降矣。於是自金川出。巴蜀。檄書所至。降附者三十餘州。○屈突通與劉文靜。相持月餘。通復使桑顯和。夜襲其營。文靜與左光祿大夫段志玄。悉力苦戰。顯和敗走。盡俘其衆。通勢益蹙。或說通降。通泣曰。吾歷事兩主。恩顧甚厚。食人之祿。而違其難。吾不爲也。每自摩其頸曰。要當爲國家

受一刀。勞勉將士。未嘗不流涕。人亦以此懷之。丞相淵遣其家僮召之。通立斬之。及聞長安不守。家屬皆爲淵所虜。乃留顯和。鎮潼關。引兵東出。將趣洛陽。通適去。顯和卽以城降文靜。文靜遣竇琮等。將輕騎。與顯和追之。及於稠桑。通結陳自固。竇琮遣通子壽。往諭之。通罵曰。此賊何來。昔與汝爲父子。今與汝爲仇讎。命左右射之。顯和謂其衆曰。今京城已陷。汝輩皆關中人。去欲何之。衆皆釋仗而降。通知不免。下馬東南向。再拜號哭曰。臣力屈至此。非敢負國。天地神祇實知之。軍人執通。送長安。淵以爲兵部尚書。賜爵蔣公。兼秦公元帥。府長史。淵遣通。至河東城下。招諭堯君素。君素見通。歔歔不自勝。通亦泣下。霑襟。因謂君素曰。吾軍已敗。義旗所指。莫不響應。事勢如此。卿宜早降。君素曰。公爲國大臣。主上委公以關中。代王付公以社稷。奈何負國生降。乃更爲人作說客邪。公所乘馬。卽代王所賜也。公何面目乘之哉。通曰。吁。君素。我力屈而來。君素曰。方今力猶未屈。何用多言。通慙而退。○東都米斗千錢。人餓死者什二三。○庚子。王世充軍士。有亡降李密者。密問。世充軍中何所爲。軍士曰。比見益募兵。再饗將士。不知其故。密謂裴仁基曰。吾幾落奴度中。光祿知之乎。吾久不出兵。世充芻糧將竭。求戰不得。故募兵。饗將士。欲乘月晦。以襲倉城耳。宜速備之。乃命平原公郝孝德。琅邪公王伯當。齊郡公孟讓。勒兵分屯倉城之側。以待之。其夕三鼓。世充兵果至。伯當先遇之。與戰不利。世充兵卽陵城。總管魯儒拒却之。伯當更收兵擊之。世充大敗。斬其驍將費青奴。士卒戰溺死者千餘人。世充屢與密戰。不勝。越王侗遣使勞之。世充訴以兵少。數戰疲弊。侗以兵七萬益之。○劉文靜等引兵東略地。取弘農郡。遂定新安以西。○甲辰。李淵遣雲陽令詹俊。武功縣正李仲衰。徇巴蜀。下之。○乙巳。方與賊帥張善安。襲陷廬江郡。因度江歸。林士弘於豫章。士弘疑之。營於南塘上。善安恨之。襲破士弘。焚其郭郭而去。士弘徙居南康。蕭銑遣其將蘇胡兒。襲豫章。克之。士弘退保餘干。

發行所

東京一八五十二番
市田三三三番

國文報研會

書目録

編輯	田	中	田
發行	田	中	田
印刷	田	中	田
出版	田	中	田

昭和四年四月二十二日

國文報研會

東京

654
56



